





Ex Bibliotheca  
majori Coll. Rom.  
Societ. Jesu



43.6.18.

~~43 43~~  
~~c c~~  
~~18. 20~~

14.32.6.9







C. 101. 2  
M. H. R. VIDAL  
GEMMONN.  
ALFRED FISC.  
DIALECT  
DEUTSCHES  
BIBLIOTHEK.





**CAVTVM** est interdicto Regio  
ne quis intra quinquennium hosce  
dialogos, Contis iniussu in terris ditio-  
nis Mediol. impune denuo imprimat,  
neu alibi impressos vendat, neu vena-  
les habeat.





CAVAM, et interdictio Regio  
ne deus nra quidam nra  
chilozos, Conis in nra in nra  
nis Michiol. in nra in nra  
per nra in nra in nra  
les in nra.

2

M. HIER. VIDAE  
DE DIGNITATE REIPUBLICAE  
SEV CIVILIS SOCIETATIS AD  
REGINALDVM POLVM CARDINALEM.

LIBER PRIMVS.



**Q**uistinc ueniunt Reginalde Pole  
non tam tui familiares, quam cate-  
ri homines hac iter facientes omnes  
ferè me adeunt, quem tui amantissi-  
mum, cupidissimumq; norunt, ut me  
doceant de statu tuo, deq; tuis am-  
plissimis, & florentissimis rebus, quæ quauis omnium  
prædicatione, literisq; publicis, & monumentis confi-  
gnatæ sint, ac consecratæ decretis publica auctoritate  
ubiq; locorum in Italia multorum dierum supplicationi-  
bus, est mihi tamen perquàm iucundum eadem audire ab  
illis, qui interfuere & præsentēs uiderunt, ut eos de  
singulis, quæ magis scire aueo, minutatim, gradatimq;  
percunctor, a quibus omnibus ea intelligo, quæ max-  
ime de tua diuina uirtute expetebam. Britanniam, ad  
quam sanandam, expiandamq; summa auctoritate lega-  
tus fueras, optima quidem Philippi Regis, & Mariæ  
reginæ præstantissimæ, ac sanctissimæ scemine uolūtate,  
atq; uirtute, sed tua maxime conciliatione, ac diligen-  
tia rediisse in gratiam cum religione, & omnem illam

nationem, quæ malorum geniorum instinctu, atq; a-  
 flatu ab antiqua sanctorum patrum institutione fœdo  
 descuerat, sanitati redditam ad sanctioris reipub. Ro-  
 maniꝑ; pontificis auctoritatem reuertisse, ac dicto pla-  
 nè nunc esse audientem. quo nihil salutaris a deo im-  
 mortali nobis concedi poterat, ijs præsertim tempori-  
 bus, propter illorum factionem, qui nouarũ rerum cu-  
 pidi, in summaꝑ; opinionum peruersitate, ac prauitate  
 uersati, noua inducta disciplina rerum omnium, &  
 officiorum perturbatrice, nobiscum de tota ferè reli-  
 gionis ratione dissentiant, damnatisꝑ; patrum senten-  
 tijs iam uetustate robustis, ac præiudicatis, a nobis de-  
 fecerunt, ex qua nefaria secessione secuta est maxima  
 perturbatio, morumꝑ; & totius ferè ciuilis uite euer-  
 sio. Nunc tandem reipub. a te tam præclare gesta lux  
 quedam oblata est omnium animis, qua sibi quisꝑ; ui-  
 detur res posse sperare meliores, et tantorum malorum  
 iam propè adesse finem, quibus rebus necesse sit te om-  
 nium seculorum præconio usꝑ; quaq; clarum fore, ac  
 semper laudibus florentem, nullamꝑ; posteritatem ullo  
 unquam tempore tui immortalis beneficij, ac singularis  
 facti immemorem, aut ingratam futuram, quanuis tu  
 animi quadã incredibile magnitudine dijs propior, quàm  
 hominibus parui semper duxeris mortalem huius gloriæ  
 splendorem, semperꝑ; uolueris in uita honoribus nō tam  
 uti, quàm dignus, non dico uideri, sed esse, ipsaq; uir-  
 tute uera, ac solida nullis spectatoribus, sed deo tantum  
 & teste, & iudice tecum frui, licet gloria ipsa uel  
 non expetita tanquã umbra uirtutem per se quoꝑ; sequi

soleat, consentiente diu bonorū laude. Referunt præterea iidem illi in tuis summis, atq; incredibilibus tantarum rerum occupationibus te haud unquā doctrinæ studia intermittere, adduntq; unum, quod mihi uisum est quasi incredibile, cupere te admodum scire pro tuo in literas singulari studio, quid ego agam ijs perturbatis temporibus tam acerbo, & pernicioso ardente in subalpinis bello. ecquid adhuc mihi commercij cum mustis, quid cudam, quid moliar: quo præsertim in statu sit opus illud a me iampridem susceptum de optima reipub. ratione, deq; optimo ciuitatis statu, de quo memini me multa tecum egisse Magutiani pridie illius diei, quo primum in Britanniam iter facere cœpisti, cum te omnino uidere uoluisssem antequā ab Italia solueres, ut, quando a nobis tam repētino discessu auferebaris, paulisper saltem aspectus tui, atq; præsentie mihi optatissime incredibili suauitate animum pascere, atq; si fieri posset, usura unius diei exatiarem. Ne igitur omnino ignores quicquā eorum, quæ ad me, et rationes meas attinent, in medio incendio, & in ipsius belli quodammodo ore, ac faucibus flagrante Alba Cremonam me tandem conieci in ueterem patriam, ut hic cum amicis, & propinquis hanc totam tempestatem tutò, si possem, declinarem, & omnē huius temporis turbulentissimi molestiam minus moleste deuorarem, in quo abs te uiro grauissimo, ac sapientissimo spero probatum iri meum consilium, cum diocesim reliquerim non tam capiti meo, aut uitæ metuens, quàm consulens, & cauens publicæ dignitati, atq; honestati, ne uilissimo cuiq; luxæ, aut tur-

tus, sublati, atq; deperditis barbarorum iniuria sex illis libris, quibus M. Tullius Cicero se ipse testatur explicasse hanc philosophiæ partem, quotquot ipse scripsit præstantissimis. Verum in ijs studijs uix credas, quàm mihi ipsi displiceam, quòd non omni cura, ac studio prouiderim, ne tãta cogitationis susceptio, nisi perfecta re, emanaret. Equidem non possum ferre quorundã hominum nimis festinantium importunam expectationem, qui a me id munus exactum, tanquam creditam a se pecuniam, pensumq; debitum nimiopere exigunt, atq; efflagitant, meq; qui nunquam nisi uolens, ac mea sponte currere soleo, uolare cogunt sarcina iniquissimi oneris uehementer pressum, atq; impeditum. Porro ignorant quantæ sit lucubrationis, rē tantã, tamq; inuolutã explicare, & quodãmodo consequi, aut expugnare, in tantaq; rerũ silua, tamq; multiplici ea, quæ tantopere dispersa, atq; propè infinita uidentur, ratione quadam circumscripte, distributq; colligere, & sub unum quasi aspectum subijcere, ut interdũ fateri cogar, plus me huc animi, quàm iudiciij attulisse, plus uoluntatis, quàm facultatis, magis studio, quàm ingenio suffultum, sentioq; ipse mecum sæpius, quàm non sit mearum uirium. Siquidem non unam ciuitatem, ut antiqui legum latores, sed uniuersos populos, ac nationes Christi legibus obtemperantes, atq; in posterum obtemperaturas instituimus, beneq; & beate uiuendi uis disserendo aperimus, ac præcepta damus tam ijs, qui imperant, quàm qui parent, & omnes ad omne officij genus instituimus, uniuersasq; rerumpub. rectiones, ge-



nera, status, mutationes, mores, leges, & instituta  
 explicanda suscepimus. neque equidem existimo ullam  
 aliam rem esse in uita hominum, quæ plura doctrinæ  
 præsidia, & adminicula desideret non tam propter ob-  
 scuritatem, quàm ob rei quandam incredibilem magni-  
 tudinem, et quasi infinitatem. In illis tamen rerum pu-  
 blicarum formis, quas Græci maxime probant, unius  
 imperio, optimatumq; , et populari gubernatione mul-  
 ta haurire possum ex ipsorum Græcorum riuis, quæ  
 mihi sint adiumento. Verum quoniam post illorū eta-  
 tem introducta fuit ualde diuersa uiuendi forma, aliq;  
 planè nunc est respub. alia ciuitatis institutio, alia re-  
 ctio, atq; tunc erat, propter religionis, quæ totam  
 ferè rempub. continet, ualde mutatæ diuersam rationē,  
 parum admodum illorum scripta mihi opitulari pos-  
 sunt. omnis enim ferè nostra disputatio, tanquā homi-  
 nis christiani, et eiusdem sacerdotis ad augustioris istius  
 reipub. formam referatur oportet, quam Christus ipse,  
 quem deus pater ante initium seculorum constituit hæ-  
 redem uniuerforum, diuino, ac sempiterno nutu mode-  
 ratur in cælo rex, et dominus, in terris uero a sacerdo-  
 tibus uicaria potestate uno inter ceteros gubernatore  
 summæ eminente administratur. Hanc philosophi illi  
 ueteres, de quibus modo dictum fuit, penitus ignora-  
 runt. neq; omnino nosse poterant, cum sit aliquot an-  
 nos orta, ex quo illi esse desierunt, non hominum inge-  
 nijs adinuenta, sed diuinitus quodammodo conflata, cu-  
 ius auctore dicere possumus ipsam uniuersæ naturæ re-  
 gem, et effectorem, rerumq; omnium molitorem deum.

Nempe quæ a philosophis de repub. scripta sunt, ita uarie, ita controuerse, & dissentanee tractantur, ut non modo illi inter se, sed etiam a seipsi interdum dissideant, secumq; iidem pugnent, quodq; aliquis in uno affirmat, in alio saepe libro planè neget, atque refellat parum sibi constans, suiq; prorsus immemor. atq; hic equidè haud de infimis, ac minutulis, quos sophistas uocant, sed de cordatioribus, & sapientioribus loquor, quos omnis ætas illa admirata est principes, & quasi philosophorum reges sese omnis doctrinæ magistros profiteri instructisq; in media Græcia disciplinarum officinis uirtutes, & sapientias ebullire. Neq; enim ulla hominum congregatio respub. uere dici potest, ubi Christus, qui est ipsa iustitia, non dominetur. Qui enim rogo sine cœlesti lumine ueritatem illi intueri, atq; agnoscere poterāt? Erratum est itaq; diu in tenebris, donec de cœlo, tanquam diuina lux rebus affulgens ipse unigena dei filius admirabili satū, inexplicabilem in modum humanam naturam indutus ad nos delapsus est, ut esset nobis rerum cœlestium interpres, atq; internuntius, ipsiq; summo parenti deo, & hominibus ueluti quoddam interiectum medium extrema colligans, diuina humanis coniungeret, & quasi unum admiranda continuatione efficeret. Cùm is igitur in terris adhuc inter homines uersaretur, omisissis, præteritisq; omnium rerum publicarum formulis, quas philosophi, et legum latores extenus tradidissent, diuina sapientia præditus, immo summa ipse totus sapientia ad rationē cœlestis imperij, diuinæq; illius immense ciuitatis, quæ omni morbo, ac

senio caret, unde profectus erat, hanc quodammodo semicœlestem, quasiq; diuinam instituit, miscendoq; diuina humanis augustissimam fecit ad omnem excellentiam, optimisq; legibus non minus religiose, quàm ciuiler temperauit, non unis mœnibus septam, sed toto terrarum orbe diffusam, firmiterq; in cordibus hominum fundatam. atq; ita rerum cœlestium ordinem, & diuinam institutionem e cœlo deuocauit, et ad usum popularem transtulit; atq; ciuilem, ut homines in terra adhuc positi propè cœlestem uitam agerent, sibiq; uiam munirent, qua quasi compendiaria ascensum in cœlum molirentur. Quoniam uero deinde progredientibus atq; a tam præclara institutione moribus, & uita descuerunt homines relanguentibus studijs satietate quadam, ac fastidio affecti, deflexitq; ualde de spatio, curriculoq; maiorum consuetudo, mihi elaborandū est, ut ueræ doctrinæ præceptis, quam nemo queat refellere, res tantopere collapsa obuiam eundo, meditandoq; hominum cupiditatibus in pristinum restituatur, utq; purgata religio, quasiq; suffimentis quibusdam lustrata denuo ad priscorum ludem splendescere incipiat. quæ quidem quanti sit laboris, quantarum uigiliarum, tu te ipse, qui harum rerum es peritissimus, optime omnium iudicare potes. Ingredior enim scribere latine: si potero, de re minus literis latinis illustrata, eorum inquam monimentis, qui bene latine scribunt. neq; etiam hic quicquã ueteres philosophi, seu Græci, seu latini iuuare possunt meam industriam. Mihi potius aduandū est theologorum nostrorum sanctissimo

rum hominum abditos, atq; reconditos fontes non tam amœnos, quàm salubres, magis synceros, & puros, quàm nitidos, aut illustres, cum ea respub. florere cœperit tunc, cum literæ loqui latine planè desijsent mutata in latio, totaq; Italia propter barbarorum commerciū sermonis ratione, ut qui scripserunt de ijs rebus, non tam uerbis quàm sententijs sint insignes, non tam lingua, quàm corde, ut ita dicam, disertī, sicut barbarorum quedam pergrandes statuae, quæ quidem totæ sunt aureæ, & ex auro purissimo conflatæ, sed ad speciem inconditæ admodum, nulla elegantia, aut concinnitate, turgidæ, & undiq; redundantes. Quid autem, inquiet forte quispiam, ista cum theologis, cum potius ad mores pertineant, quæ est pars philosophiæ, magis a philosophis, quàm a theologis pertractanda? huius autem rei facilis defensio, cum mihi res sit tecum, idest cum uiro harū rerum scientissimo, atq; doctissimo. Mihi profectò ea scribenti idem usu uenit, quod philosophis illis ueteribus, qui præcepta uiuendi in ciuili communione tradiderunt, nam cum uellent instituere eam ciuitatem, quæ omnes numeros impleret, nullaq; talis se animis eorū offerret ex cunctis, quæ ab alijs seu Græcis, seu barbaris iam posita essent, atq; institutæ, unde possent exemplum petere, & similitudines ducere, omis̃is, relictisq; omnibus, quæ sub aspectum cadere poterant, aliam rempub. longe præstantiorem, omnibus detractis uitijs, omni laude cumulatam per se ipsi animo cogitabant, mentisq; complexu, & intelligentia comprehensam habebant, cuius speciem intuentes ad

eius similitudinem omnem suam institutionem dirigerent, omniaq; redigerent ad eam, tanquã ad sui generis speciem, & formã, quas ideas uocant, easq; æternas esse volunt, fingeantq; ideo interdum illas ciuitates, quæ nusquã essent, neq; unquã fuissent, neq; ullo tempore futuræ forent, cõmenti etiam nescio quas fortunatorũ populorum insulas, ac ciuitates, meras hercle nugas, uanaq; rerũ simulacra, quorũ usus esset nullus. itidem nobis faciendũ est, ut non tantum de ea re pub. ob quam tota nostra disputatio suscepta fuit, quæramus, ac differamus, uerũetiam, & in primis, de illa perfectissima cœlesti, & diuina, ad cuius rationem ista informata fuit, in quo quidẽ certior, & firmior est nostra ratio, quod nos, non, ut illi, uanum, uagũq; & inconstans simulacrũ, quod sequamur, propositum animo habemus, sed omnino uerũ, stabile, atq; exploratum exemplũ summã illam ciuitatem, summe ex omni parte, in omni genere perfectam, omnibus numeris expletam, cumulatã, absolutam, ut nihil inde absit, nihil planè redundet, omnibus bonis nullo malorũ interuentu confertissimam, in qua nihil desideratur, sed uirgula diuinã piorũ concilijs suppeditantur omnia, quæ uitam beatã efficere, & conseruare possunt, ubi summa imperandi sapientia præditus nutu, ac potestate dominatur rex ille ter optimus, terq; maximus, in cuius femore diuino oraculo proditum fuit inscripta esse literis aureis quatuor illa summæ maiestatis uerba **R E X  
REGVM DOMINVS DOMINANTIVM**, a cuius eximie ciuitatis cœlesti exẽplari primigeno, ac sum-

mo in hanc inferiorem omnis pietas , omnis sanctitas , omnis uirtus , cunctaq; recte uiuendi ratio inundauit , ac nihil boni in ulla mortaliũ ciuitate , aut repub. esse potest , quod non ab illa una cœlesti defluxerit , cum sit instar omnium , vnde aliarum quasi ductæ imagines exprimuntur . Quod quidẽ uidentur aliqui philosophi innuere memorantes hunc aspectabilem , & lucentẽ mundum esse alterius æterni simulacrũ . Illustrius prophetae rem aperto uaticinio declarauit , cum præ gaudio quasi exiliens exclamaret se uidisse ciuitatem nouã , sanctamq; , et admirandæ pulchritudinis descendere de cœlo adeo cultam , atq; ornatam , sicut sponsam comptam , uiro suo , secuta etiam uoce præpotentis , ac summi illius moderatoris de folio suo attestantis circumscriptionis omnium legumlatorũ institutis , omnisq; omnibus uenturibus rebuspub. cõstitutione istius recentis se noua facere omnia , ad quarum rerum explicationem mihi peræque sæpius exploranda sunt in reipub. quam in manibus habeo , institutione , an cum amplissimæ illius cœlestis ciuitatis ratione , ac formula congruant . quod quàm facile fieri possit sine theologorum præsidij , aut adminiculis , tu optime omnium nosti . De quibus cunctis tibi nihil exigenti rationem reddere uolui pluribus fortasse , quàm oportuerat , ut una eademq; opera responsum esset tot meis flagitatoribus . Interim tamen ne quis forte suspicetur me penitus cessare , et in ocio languescere rei magnitudine , ac difficultate deterritũ , statui ad te mittere illam unius diei disputationem , quæ superioribus annis Tridenti te quoq; præsentem priuatim

habita fuit a me, & M. Antonio Flaminio de reipub. seu ciuiliſ ſocietatis utilitate, ac dignitate, quum illo omnem ciuilem conciliationem impugnante, & quaſt accuſante, reſq; in cōtrouerſiā, & cōtentionē uōcata, quome uel ſic ad loquendū de reipub. ratione eliceretis, cōa-ctus fui eā defendere, ac, quoad ingenium ſuppetijt, dilaudare. Illius igitur accuſationem, meamq; deſenſionē, laudationēq; , et totius illius diei diſceptationē in utranq; partē, quæ omnia, ſicuti res acta eſt, literis diligenter mandauī, accipies, tanquā aliquod huiuſmodi rerum a me ſuſceptarum ſpecimen, ex quo de cæteris iudicium facere queas. Hic tamen liber erit ſeorsū ab alijs ſe-iūctusq; , & omnino extra ordinem eorum, in quibus agitur non tam de reipub. & ciuiliſ ſocietatis laudibus, quā de vniuerſa ciuitatis inſtituendæ rationē, totaq; reipub. materia explicatur, haſq; quaſi orationes duas inter ſe collatis argumentationibus controuerſas leges, ſi quod interdum uacuum tempus datur a tuis maximis rebus; & præclariffimis actionibus, quibus rempub. tam præclare geris. Vtinā uero ſicut religioni in Britannia tua opera, atq; conſilio tam egregie conſultum fuit, ita te quoq; eodem pacificatore concordia inter reges noſtros conciliata, ocium, & quies ubiq; rebus reddatur. quod unum adhuc ſumma omnium opinionē, ac ſpe de te uno; deque tua ſingulari uirtute expectatur.

COACTO igitur Tridenti multorum antiſtitum concilio, nondum tamen quicquam ceptum erat agitari in curia publico conſilio de ijs, quæ perti-



nent ad rempub. cuius rei gratia cōueneramus eò accer-  
 siti, sed adhuc suspensa tenebantur omnia propter illo-  
 rum cunctationem, qui ex Germanis tam fœde ab eccle-  
 sia, uel uerius a se ipsis descuerant subterfugientes pu-  
 blicum patrum congressum, neq; in certamen, & are-  
 nam ullo pacto prolici poterant, sicut etiam nunc sem-  
 per prolatando rem trahunt, morasq; omnis tergiuer-  
 fando interponunt, dum tantus conuentus longa expe-  
 ctatione defatigatus, dilabentibus quotidie ijs, et illis,  
 dissoluatur, haud adeo stolidi, ut planè ignorent lon-  
 ge alia ratione sibi agendum fore cum doctis, et corda-  
 tis uiris atq; cum imperita multitudine, cui facile fuit,  
 quicquid ipsis collibuit, persuadere, indoctorumq; &  
 agrestium animis caliginem, & quasi noctem quandam  
 offundere. quæ improborum hominum mora nullā po-  
 test habere excusationem, cum eorum incolumitati satis  
 cautum uideri queat etiam Cæsaris nutu, atq; auctorita-  
 te fide publica luculentissimo diplomate interposita. In  
 tam diuturna cessatione, cum omnes planè disfluere-  
 mus ocio diem ex die ducentes, uenerunt ad me Aloisius Pri-  
 ullus, & M. Ant. Flaminius in hortos suburbanos ad  
 crucem auream, ubi, tanquam in gratissimo diuersorio  
 mihi per æstatem domicilium collocaueram cōcessu am-  
 pliissimi inter cardinales patres uiri Christophori Ma-  
 drucij episcopi, & principis Tridentini, longè maioribus  
 imperijs, insulisq; dignissimi, quos ego ubi in topiario  
 opacissimo antemeridianis horis adhuc deambulans ex-  
 cepissem, inuicemq; amicissimè nos nostro more consalu-  
 tauissemus, erant enim mihi ambo longa consuetudine



coniunctissimi . Quid uos tandem huc inquàm hac hora ? quid Polus noster ijs caloribus ? nullius equidẽ diei hoc anno memini maiores . Eandem, inquiunt ambo, incudem tundit in studijs suis se oblectans . Adiecit insuper Priullus . Nulla ui cocli neq; æstiuus mensibus, neque summa hyeme adduci potest , ut illa sua inexhausta legendi cupiditate , insatiabiliq; uoluptate quadam cognoscendi quicquam à statis horis detrahat , aut remittat , cum sit tamen tenui ualetudine , neq; admodũ firma natura , dixit autem hodie expectare, dum se remittat calor , quo in hosce hortos tuos perpaulum relaxandi animi gratia diuertatur . nos vero vti antecursores præuenimus , cum vt totius huius diei calores tuo sermone recreati temperemus , tum vt vestri amborum colloquij auditores simus . nam dixit se habere quæpiã , quæ tecum cõmentetur de reipub. conformandæ ratione , quæ aut ipse , aut tu , aut certe utriq; ( nempe à neutro nostrum liquido satis perceptum fuit ) in manibus habetis propter eos , qui hac tempestate in eam fraudem reipub. delapsi sunt , ut conentur non modo omnem ecclesiæ splendorem contagione disciplinæ pestilentis obscurare , verum etiam ipsam ecclesiam funditus conuellere , atq; in sempiternum delere , sublata penitus , quantum in ipsis fuit, religione , euersisq; moribus , sine quibus duabus rebus nulla existere potest respub. gratias equidem , inquam , habeo ijs hortulis , quorũ beneficio mihi datur interdum tam diuini , singularisq; uiri frui suauitate , cuius contubernio , perpetuoq; conuictu ambos vos esse fortunatos semper existimaui , simulq; fami-

liaribus imperavi, in porticu sellas, & pulvinos pararent in tanti viri expectatione. Ad illos vero interim. Quid musæ vestræ inquam? Priullus, meæ, inquit, frigent. nescio quid tuæ Flamini. Immo, inquit ille, silent meæ. Permirum inquam utrunq; , ac planè incredibile, tuas nunc Priulle algere, cum Tridenti non caleant modo, sed ignescant omnia, tuas vero Flamini conticescere, cum cicadæ ipse nunquam audiantur, nisi maximis caloribus, quo vno anni tempore etiam de multa nocte canunt. Risum est hic suauissime inter nos aliquantum. Tum ecce Reginaldum Polum video positus, relictisq; ante fores fascibus, quasi è domesticis vnum familiarissimè ingredientem, cui illicò assurgentes, quasiq; venerabundi occurrimus. visus sum equidè repente quasi quoddam rarum sanctitatis exemplum, priscæq; religionis imaginem intueri. eum autè sub porticum deduximus. Verum vix assederamus, cum nuntiatur à familiaribus adesse quoq; amplissimos viros Io. Marium Montium, & Marcellum Ceruinum ambos Poli ipsius collegas, qui auctoritate pontificis maximi ex amplissimo cardinalium patrum collegio legati fuerant, vt coniuncta potestate iudices, ac disceptatores præessent cōmuni Christianorum consilio. fortuitu ne, an consulto, compositione, re cum Polo ante communicata, concinnataq; nondum planè exploratum habeo.

Cum tres illi igitur summates nostri confedisissent, suisq; loco, certoq; ordine, ego quoq; verecundè secundum illos, coegerunt etiam Priullum, & Flaminium iuxta assidere humanissimi, summisq; honoribus semper

modestissime vtentes, cæteris exclusis eorum sectatoribus, stipatoribusq; , & per hortos interim deambulantibus. Tum subridens hilarem in modum Montius, qui eius legationis principẽ locum obtinebat, nullo verborum, aut sermonis apparatu, ingenuẽ quidem, et liberaliter, vt est natura apertissima, neq; ex illorum numero, qui dignitatem in superbiam vertunt. Nequaquam inquit sic vobis abierit, qui nobis non vocatis, planeq; præteritis clam inter vos rerum illustrium institutis disputationes. & nos quoq; , si forte vos præterit, habemus nostros codicillos domi, quibus legendis aliquando operam dedimus, non nihilq; olei insumpsimus. pergite dum. non erimus regno indecores, neque auditores tales habebitis, quorum vos aliquando suppœniteat. Sub ea addidit Ceruinus, qui nouit interdum suæ grauitati comitatem, facilitatemq; inspergere, & se amicis iucundissimum præstare. Vereor inquit, ne vobis molesti interuenerimus. Sed queso vos, ordine, quo occeperatis rem prosequimini interruptam nostro interuentu, sermonemq; redintegrate. neq; enim disputationem istam iam à vobis, vt arbitror inchoatam, interuerti volumus. ipsi vero nos excipite, perinde ac solet sodalium discumbentium cœtus, si quis forte serus, nec satis tempore cœpta iam cœna accesserit. etenim eum illico accumbere cogunt nullo alio epularum apparatu, atq; ipsi cœnabant, adhibito, præter vnam sellam, qua illum medium accipiunt. neq; denuo ipsi ab ouo cœnam repetunt, sed in eodem, quo erant, epularum statu prosequuntur. neq;

vos oppidò de epulis oportet esse sollicitos. habebitis  
 hospites fortasse integra fame edaces, non tamen ad-  
 modum delicatos, fastidientésue, sed sicut philosophos  
 decet, minime graues, faciles potius, tenui disculo,  
 mensaq; parabili contentos, quanuis non ignorem Po-  
 lum nostrum nunquã imparatum semper solitum appa-  
 ratè, & nitidè ad se diuertentes tractare, neminemq;  
 pati à se dimittere non benè, lauteq; acceptum. Ego  
 ne? comiter, vt solet, inquit Polus, qui huc prece-  
 rio cœnaturus accessi? Si vos tam re, quàm verbo  
 philosophi haberi vultis, qui ex natura viuere possunt,  
 nos cunctos magnificentissimè accepturus est Vida,  
 qui, vt desint cætera, posset multos dies suorum hor-  
 torum olusculis pascere Epicureorum greges. Statim  
 ego subridens, si inquã non inuitati mecum cœnaturi  
 acceditis, vereor ne culpæ vestræ sit subito comes fu-  
 tura pœnitentia. ad hospitem certe rerum omnium impa-  
 ratissimum venistis, qui hodie nihil imperaui domi,  
 quod foras ad amicum promississem. sed quid ego impe-  
 rarem, vt vos primates viros, tantosq; heroas con-  
 uiuias exciperem, cui tota domus, quantulicunq;, vt  
 ille inquit, est inanijs refertissima. si me audietis, atq;  
 si ex dignitate vestra vultis cœnare, nobis omnibus  
 hinc remigrandum erit, & ad cuiuslibet vestrum triũ  
 triclinia delicatè, magnificeq; strata cōmeandum. vbi  
 lautissimis lancib. confertissimisq; canistris res geri so-  
 let. hæc vero mea oluscula relinquemus Epicureis,  
 quorum consuetudinem, vt morbum, & pestem sem-  
 per fugi. aut certe, si forte in hisce omnino hortulis

cœnare statuitis , non multũ adeo ab ædibus vestris disiungimur . poterit huc percõmode transferri vestri cuiusquã bona , et magna cœna . Nõ soleo ego vos principes viros facile ad me inuitare omniũ rerũ inopia locupletissimus . in æquales tamen meos , qui inquã sunt inferioris ordinis , meiq; subsellij , nõ sum planẽ illiberabilis , aut præter modum rei meæ tenax . Tum Montius , remotis , inquit istis sermonũ integumentis , atq; inuolucris , venimus huc ego , & hic meus collega , vt audiremus te cum Polo colloquentem reconditiora , ac selectiora quædam de repub. de qua te modò inchoasse sermonem cum his Flaminio , & Priullo perlatum fuit . quod libenter , percupideq; fecimus , cum nulla alia magis possit huius temporis esse cõmentatio , quò à nobis querenda sunt remedia , quæ tot morbis languentis , & affectæ reipub. adhibeantur . His dictis , cum ipse , cæteri q; omnes , qui aderant , in me vnum oculos coniecti intendissent , tum demum sensi mihi collocatas fuisse insidias , in quas imprudens me indueram . Rem inquã magnam , grauem , plurimi q; ocij , & commentationis à me haud sanè pererudito homine poscitis , lautũ hercules negotium , neq; mediocris ingenij , neq; artis non exquisitæ , quod nisi præparato ocio institui possit , neque exiguo tempore absolui , magis philosophorum ambulacris , hoc est docto viro , & parato conueniens , non in curatione rerum diuinarum occupato homini . maioris ingenij indiget , hominemq; deposcit omnium doctrinarum studiosum . quicquid verò id sit , & quantumq; , optime omnium Polus nobis exactum dabit . hic

enim omne studiū suum , in doctrina , et sapientia collo-  
cauit , iam diuq; securus animi in portu philosophiæ con-  
quiescit . Et id quidem opportunè cadit . nam ipse per  
hos Priullum , Et Flaminium modò mihi denuntiavit , se  
habere quæpiam , quæ mecum de repub. conferat . id ego  
sum interpretatus dictum fuisse de eius studijs , Et lu-  
cubrationibus , in quas die , noctuq; incumbit seculum  
nostrum literarum monimentis illustraturus . Me ne ,  
inquit Polus habere quædam quæ tecum colloquar de  
repub ? si rectè hi percepere , qui id tibi nuntiarunt , di-  
xi esse non nulla , quæ de te audire vellem de repub. ete-  
nim est fama constans , Et percelebris , te magna quæ-  
dam moliri de reipub. omnis generis administrandæ ra-  
tione ad hæc tempora valde accommodata , quæ res vsq;  
ad hanc ætatem lumine literarum latinarum semper ca-  
ruit post vastatam à barbaris Italiam , qui non minus  
optimis libris , Et ingenij monimentis bellum intulere ,  
quàm fortunis Italorum non contenti hanc splendidam  
orbis partem cunctis opibus euertisse , nisi etiam opti-  
mas artis , Et disciplinas inde sustulissent , deleuissētq;  
quoad in ipsis fuit , in sempiternum . tu vnus ea cōmo-  
dè exequi potes . nempe cum sis de ijs scripturus , cre-  
do equidem te iam habere percursum animo , quicquid  
in hac materia tibi erit pluribus , Et illustribus rebus  
explicandum . siquidem rerum eximiarum disputatio-  
nes oportet longè ante , quàm scribantur paratas esse ,  
neq; id planè fieri posse reor sine multa rerum omnium  
publicarum pertractatione , tantamq; rem iudico dici  
oportere scienter , peritè , atq; ornatè . sed de te hæc ,

Et similia, non dicam maiora, expectare debemus, ne-  
 que enim video quem alium isto maiorem in philosophia  
 locum, amplioremue dicere possim. nam præterquam,  
 quod non imparatum offendimus, ita es in omni dictio-  
 ne exercitatus, ut tibi deesse non possit oratio, præ-  
 sertim cum de philosophiæ parte nobili differendum sit,  
 in cuius sinu à teneris educatus fuisti, omiſſisq; studiis  
 earum rerum, quæ res à vulgo in summis habentur,  
 esse apud te multos annos pergis, præcipue cū sis inter  
 hos verba factururus, qui cuncti inter bonas artis adole-  
 uerunt, noruntq; , quantis difficultatibus ea res ob-  
 structa sit, et inuoluta, suæq; ideo quisq; facultatis  
 memores in aliena industria iudicanda æquiores se asti-  
 matores præstabunt. Nescio, inquam, unde istæ fa-  
 ma ortum habuerit. tantum memini interloquendum  
 cum amico et seniore, et graui, ac, si quid ad rem  
 spectat, Romano homine, mihi nescio quomodo exci-  
 disse, cupere me videre literis latinis totam philoso-  
 phiam, quæ ad mores attinet, explicatā, cui rei tan-  
 tum deest ea pars, quæ est de ciuitatum, et rerum pub-  
 rectione, ac temperatione, deperditis sex aureis illis  
 libris, quos M. Tullius Cicero omnis eloquentiæ parens  
 se scripsisse testatur in alijs libris, dixiq; , si vnquam  
 ab hac celebritate, ijsq; subsellijs abductus in ocium, et  
 solitudinem me restituerem, fortasse periclitaturum,  
 quousq; in hoc tam splendido negotio progredi possem.  
 Etenim rem tantam sciebam non suscipi posse occupata  
 opera, animoq; impedito. sed expectabam, si vnquam  
 hoc peracto conuentu in Sambaſtianum meum ab arbi-



tris remotum me recepissem, ad amœniſſimas Serij ſaluberrimi amnis ripas auita prædiola præterfluentis, quibus nihil æſtius menſibus opacius, nihil alſius inueniri poteſt. putabam equidem id homini fido, et frugi à me tutò creditum, ſed plenus rimarum paſſus eſt à ſe tam citò eſſuere, ſtatimq; , quod multa religione celare debuerat, palam fecit, & vbiq; deprædicauit. Quin age inquit Ceruinus tantis viris, tanto tibi amore Vida coniunctis te dede, & tandem deſiſte delitias facere, ita te inuitè nobis obſequi oſtendis. agis proſecto nobiſcum verecundius, quàm te decet. nobis negas, quod cuiq; vel ignoto homini non rogatus fortasſe concederes. iam elicuiſſemus lapidem ad loquendum. Ora dire tandem iam inclinato in poſtmeridianum tempus die. Subijciens quoq; Montius. Per nobis per, inquã, gratum feceris, ſi omiſſis tot tergiuerſationibus exorſus fueris explicare, quid de repub. ſentias. noli theſaurus, qui ſunt penes te, tibi vni incubare. verum cū amicis partem aliquam communica. memineris in oraculis veræ ſapientiæ accuſari eos inertię, atq; ignauię, qui talenta neſcio quæ in terra deſodiunt, quæ obruta neq; ipsis, neq; alijs vſui vnquã ſint futura. Hic deniq; conſpicatus mihi omnem incidi deliberationem, abſciſſa penitus fugæ ſpe nolui vlterius videri moroſus, & ad eos cōuerſus. Vincam, inquã animum meū optimi viri. hanc fabulam tranſigam, quando tantopere inſtatis omnibus adhibitis machinis. Varronis theſauros, quos fortasſe Monti putas apud me occultari, aſſluenter profundam. quod hætenus negarim,



voluiffem vos in eam partem, in quam æquū erat ac-  
 cipere, mihi magis rem deeffe, quā volūtatem, præ-  
 fertim cū præfentia veftræ, ac dignitatis lux, et fplē-  
 dor mihi oculos perstringeret. ne vobis tacentibus ego  
 neq; doctus, neq; aptus ad dicendum, fed vix literis  
 communibus tinctus de ampliffimis rebus auderem lo-  
 qui. id fuit causæ cur hætenus vobifcum repugnanter  
 admodum egerim, dicam tandem magis coactus, quā  
 paratus, hac tamen conditione, vt fi oneri fuccumbere  
 videbor, vnus veftrum, qui fibi paratior videbitur,  
 mihi opitulaturus fuccedat. inftat enim mihi iter fubi-  
 tum, & oppido longū. vniuerfam vero ipfe rem dun-  
 taxat aperiam fummam, & per capita, vt vos eli-  
 ciam. fingulos ad dicendum de fingulis partibus diftri-  
 butè, & articulatim, extundamq; ea, atq; dolabo, quæ  
 vos deinde perpoliatis, atq; inchoata perficiatis, &  
 quæ ego præteruolauero, vos inftātes dilatetis. Chry-  
 fippus Stoicæ familiæ princeps dicebat cætera animan-  
 tia propter homines effe nata, homines vero ad con-  
 gregationem, & ad focietatem humani generis, fuæq;  
 ipforum coniunctionis caufa procreatos affirmabat. ta-  
 lem profectò focietatem nō possumus non fufpicari ali-  
 quid permagnum, & præclarum exiftere, fi eius caufa  
 nati, & in lucem editi fuimus, ab eaq; vitam omnem  
 humanam, & naturam contineri eſt neceſſe. multas  
 autem cōmunitates, et confociationes eſſe conſtat, qua-  
 rum diuerſi ſunt fines, inter eas tamen omnis tam na-  
 turales, quā illas, quæ ſunt artis, ſummam, et per-  
 fectiſſimam exiſtere ciuitatis communionem perſpicuum

omnibus esse reor, adinuentam, seu potius cum hominibus natam, non tantum propter commoditates vite, sed maxime, & apprimè propter vitam ipsam, quæ sine societate, & coniunctione esse non possit. ad hanc vnam necesse est referri omnes alias cõmunitates, tanquam ad principem, & ad illam, quæ ad vltimum, et perfectissimum bonum in rebus humanis intendit. ceteræ diriguntur quæq; ad bonum quidem, non extremum tamen, neq; perfectum, aut summum. quicquid enim agunt homines, ad id agendum boni alicuius siue veri, siue probabilis, causa mouentur. earũ vero rerum bona varia quidem existunt, pro cuiusq; sensu, atq; libidine. Sed ciuilis societas, sicut est suprema, & omnes alias communionēs complectitur, ita supremum, et vltimum bonum tanquam finem propositum habet, quod petat, atq; illud omnes philosophi communi verbo felicitatem vocant, eamq; concludunt esse finem omnium finem, quo cuncta referuntur, & cuius causa facienda sunt omnia. Id est enim scilicet illud excellens, optimũ vltimum, et summũ bonum, quod omnes homines summè appetunt. propterea arbitror Aristotelem in eo libro, quem Ethica inscribit, in hunc sensum dixisse adpolitian perfici omnem philosophiam, quæ præsertim versatur circa res humanas. Politian autem esse conciliationem naturalem ratione adducor vt credã. quoniam partes, ex quibus constituitur, naturales esse liquet. Etenim ciuitatem nemo non nouit nihil aliud esse, quàm hominum congregationẽ, quibus hominibus natura insitum est, cum, quemadmodum diximus, ad id

procreati sint, ut in iuris communione vivere expectant, quos ideo ciuiles animantes non absurdè quis appellarit. ob id ex sapientioribus aliqui scriptum reliquerunt ciuitatem prius extitisse, quàm essent ciues, ut reipub. ortum ab ipsa natura repeterent. neq; secus res ordine naturæ perfectæ se habere queat. quoniam, quod totum est, id priusquàm singulas eius partis extare necesse sit. Porro ciuitatem, & ciuilem communitatem, ad quam naturali quodam desiderio feruntur homines, prius genus humanum, hoc est singulos homines expetisse intelligimus, deinde humana industria cõdita vrbes, & institutas fuisse ciuitates. quod etiam in moribus fieri contingit, siquidè prius virtutes quodam animi motu appetimus, quas deinde labore nostro, studio, atq; exercitatione adipiscimur. neq; tamen huiusce conuictus appetitio est in hominibus tantum, verum etiam eam in plerisq; alijs animantibus inesse animaduertimus. quandoquidem non nulla sunt, quæ non modo societate gaudent, verum etiam omnino defugiunt, oderuntq; solitudinem. quod apprimè in apibus, & formicis tantulis animalibus intuemur, quæ utræq; ciuitatis coetum quodammodo imitantur, et utræq; pariter reipub. instar habent. id tamen longius præstare conuenit, atq; eminere in eo animali, quod prouidum, sagax, acutum, memor, plenumq; rationis, & consilij vocamus hominem. longè enim plura homines inter se communicare possunt, pluribusq; modis sese mutuò frui, quàm quodq; aliud animal, cū ob rationis ipsius vsum, quæ etiam cœlestibus humana ingenia cõiungit, pariaq; propemodum

propemodum facit, tum propter sermonem humani animi interpretem, propterea dicere solitum Socratem accepimus, homines quidem à cæteris animantibus viribus vinci, nos autem ea vincere ratione, & sermone. Proinde, vt rationem omittam adeo præstantem, singularem, atq; incredibilem ingenij motum, quo vno diuino munere non solum belluis præstamus, sed etiam nobis cum deo ipso nonnulla est similitudo, atq; cognatio. Næ secundum eam natura nihil homini sermone præstabilius est elargita. cæteris quidem animantibus vocem dedit, quæ duntaxat significare possunt, si quid iucundi, molestiæ sentiunt, homini vero præter vocem, et sonum, numeri, et concentus, ac modus dantur, vocemq; ipsam varijs articulis, atq; interuallis, miraq; varietate distinguere potest, vnde sermo, et oratio conficitur simulacrum mentis, atq; animi, quod nulli viuientium attribuitur, præterquàm illi, quod humanæ societatis per se vinculum satis validum esse potest. hoc vno munere homines inter se loquentes non modo illa, quæ sibi iucunda; aut molesta sunt, mutuò communicare possunt, verum etiam omnia animi cogitata significantius, explicatiusq; colloquendo aperire, & abdita sensa animi penitus tum alter alteri inuicem, tum in circulis, et in frequenti corona disputationibus, congressibus, atq; in concionibus audientium, vt velint, animos tractare, & permouere, interdumq; quibusdā quasi facibus ita inflammare, vt quocunq; collibuit impellant. Sic semper, qui sunt prudentiores in medium consulunt, & ea quæ sunt vtilia, aut inutilia, iusta.

vel iniusta, sequenda, vel fugienda; indicant, suadentq; aut dissuadent, quæ volunt, seu verius imperant, ac vetant certi iuris, quod omnibus sit æquum, omnibusq; tribuendum; recta constitutione, sine qua nulla esse; aut diu consistere queat ciuilis coniunctio, ex qua constat omnis, de qua quærimus, respub. cuius nominis vim vniuersam qui explicare velit, cunctū fundamentum in iuris ipsius æquabilitate iaciat est necesse, siue res ab vno gubernatore, siue à paucis, siue ab vniuerso populo administraretur. Primum quidem, vt ne cui noceatur, deinde, vt communi vtilitati seruiatur, cum omnis huiusmodi societas constituatur ad bene, beatęq; vitam degendam, idq; nullo modo fieri possit, nisi iustitiæ, ex qua ius oritur, præsidij, quo bono nullum neq; præstabilius, neq; optabilius datum est, neq; dabitur vnquam hominum generi dei optimi munere, atq; concessu, si modo tempus vllum fuit vnquam quo hominum societas existentibus hominibus non fuisse intelligi possit, quam ideo non nulli putant coortam esse cum hominum genere, eiusq; animam esse dixit vir sapientissimus Plato, cuius quoq; ortum à natura repetunt, sine qua etiā ipsa natura existere nequeat. Quod tantum bonum si alicuius mortalis prudentia in genus humanum introductū fuisset. non ne ille diuinus Laconum more habendus foret? qui inquam ciuitatem prior excogitasset, dissipatosq; homines in societatem vitæ, & iuris communionem cōuocasset, ille profectò vrbi-  
 bus constitutis & fidem colere, & iustitiā retinere docuit, persuasitq;, vt homines consuescerent sua volun-

tate alijs parere, vellentq; cōmunis commodi causa, non modo labores excipere, sed etiam, si opus sit, vitam amittendam existimarent, & reipub. omnibus necessitudinibus ante haberent, quam Socrates apud eundem Platonem patriæ nomine appellans deā facit supra mortales omnis colēdam. hac enim magistra, ex agresti, immaniq; vita homines ad humanitatem exculti fuerunt, et mitigati, primum domicilijs, deinde literarum, et linguae, iurisq; communione iuncti. ille ille profecto inuentor legum, magister morum, officij, et bene viuendi disciplinæ indagator fuit, omnium sane bonorū, quibus vita humana fruītur, repertor, ipsiusq; vitæ planē dator, cui nescio an genus humanum minus, atq; naturæ ipsi debere fatendum sit, si modò quisquā talis inter mortales fuisse vñquam arbitrandus est, nec potius acceptū Deo præpotenti, aut saltem ipsi naturæ tantū boni sit referendum. Deus certe, deus ille fuit amplissimi viri, qui hominum genus à se conditum tot simul bonis ostensa civili communitate. & consociatione cumulatē collocupletauit, auxit, & quasi recreauit, neq; omnino humani ingenij, neq; consilij inuentum esse nobis planē est confitendum. Hæc si à vobis probantur, quæ sunt quasi stirps, & fundamentum nostræ quæstionis, & quæ aliquando dilatabuntur à nobis, si vsus fuerit, progrediar ad ea, quæ restant, sunt enim non parum multa. Tum Montius. quia video inquit hic cunctos tacere, & quodam modo assentiri ijs, quæ à te dicta sunt, par erat me quoq; acquiescere, & perpetuū cursum orationis tuæ tam longè repetitæ non interrom-

pere . dicam tamen quid me moueat , nec omnino silere  
 quco . Vt cetera tibi Vida assentiar , nescio an pro-  
 bare possim ordinem disserendi , quem modò exor-  
 sus fuisti . nam ante quam nos docueris , quid sit  
 id , de quo querimus , in eius laudes . præceptis repente  
 prorupisti . explicanda prius tibi erat fortasse vniuer-  
 sa vis reipub. ciuilibq; coniunctionis natura , quam adeo  
 cumulatè , satis tamen intempestiuè meo iudicio dilauda-  
 sti . Atq; admodum vereor , vt hic Flaminius tibi cō-  
 cedere possit hanc ciuilem hominum consociationem , ex  
 qua oritur respub. tot , atq; adeo omnium bonorum cau-  
 sam extitisse , cū sepe legerit apud spectatissimos poe-  
 tas , à quorum lectione , quàm quisquam nostrum , vt  
 ego arbitror , est recentior , in illa prisca fortunata an-  
 tiquitate , & quasi in primo animantium ortu , quanta  
 fuerit vitæ illius simplicis iucunditas , atq; felicitas , cū  
 nondum institutæ ciuitates ; nondum vllæ positæ essent  
 vrbes , sed homines soliuagi , nullius societatis vincu-  
 lis coniuncti , sed planè liberi in agris vitā agerent pro-  
 cul à legum , et pœnarū metu , cum inquam , vt ait no-  
 bilis poeta , tellus ipsa per se

Omnia liberius nullo poscente ferebat ,

Et duræ quercus sudabant roscida mella . Cum  
 hæc ille dixisset , omnes Flaminium intuentes expectabāt  
 summis studijs , quid ille aduersus totam reipub. ratio-  
 nem , contraq; ipsam ciuilem conciliationē , si non ve-  
 ris , saltem probabilibus rationibus moliretur . Nol-  
 lem , inquit Flaminius , mihi imponi personam , à qua  
 mihi planè animus abhorret . memini , Romæ cum essem ,



à summis viris vehementer laudari adolescentem quendam, in quo forma erat, & species perquam liberalis quod nullis neq; amicorum precibus, neq; potentiorum virorū hortationibus, aut pollicitationibus induci poterat, ut in scena scortum, illiberalemūe personā agere vellet. Porro quæ hæc leuus Vida profecutus fuit, tametsi vix tantam rerum siluam ingressus videri possit, me magno quidem opere delectant, eumq; omnibus studijs incredibili cum animi voluptate audiebam. nollem equidem eum ab illo cursu reuocari, quem secundissimo vento in altum properans tenebat. mihi profecto sum visus audire ea, quæ à quoq; alio hunc in modum tractari nunquam vidi, & eum potius audiendum censeo. Quæ cum dixisset, & illum nihilominus vrgerent omnes. Morem equidem inquit geram, quando alieno potius me stomacho, atq; iudicio loqui vultis, quàm meo, & quod me angit magis, nullo dato ad commentandum spatio. Sed amabo mi Vida haud æquum est, te moleste ferre, si, dum scenæ inseruio, tibi incōmodem, atq; ita tecum agam, ut videar animo præfente, meoq; ingenio, ac sensu loqui. Memineris verò moris, & consuetudinis veteris academix, in quærat summa licētia, atq; libertas. Sic enim in omni quæstione sententiarū inter se contrariarum concursu, rationumq; contentione veritas excuditur. Per me, inquàm in quaslibet formas te veritas licet, sume quoscunque velis vultus. nequaquam verendum est, tibi ne male dicam, si mihi contradixeris, neue te asperius appellem à te etiam inclementer lacebitus.



Age vero dum . vel in aquam dilabaris nouus Protheus . conabor te equidem tenere pro viribus , quocunque eluctatus euaseris . præfari tamen libet , nihil esse adeo incredibile , quod non oratione probabile fiat . Arcesile , aut Carneadis more , præsertim , cum mihi futura sit res cum tali artifice , qui non tantum in rhetorum scholis diu versatus , sed etiam poetarum , qui norunt omnia confingere , consuetudine vsq; ad id atatis delectatus sit poeta ipse quoq; neq; malus , neq; de populo . quomodocunq; te gesseris , siue egeris ex animo , siue simulate , feram omnino moderate , atq; exquisitissimo animo . volo equidem te liberatum hac cura . At qui vide quomodo postea te ex hac explices turba .

Noui optimi viri huius consuetudinem , et sensum teneo ( Montium simul intuebar ) qui suoapte ingenio incredibili cum animi voluptate disceptationes , & pugnas doctorum virorum spectare solet . atq; eum magnopere delectat philosophos inter se digladiantes audire , & si quando controuersiarum materia per se satis ampla minus suppetitat , quiescens ipse , seq; oblectans in ocio , et animo obsequens suo vberrime sufficit , questionesq; difficillimas persepe in medium proponit , quasi quædam belli semina iaciens , atq; etiam vt alios ad dimicandum proliciat , primus ipse in campum interdum descendit , tantisperq; in acie , & ferro versatur , dum conspiciatus fuerit hinc , & inde omnibus comotis cornibus , calefactisq; vtrinq; animis commissum , accensumq; in medio campi certamen , tum subito eum cernas se sensim , & cautè prælio subducere , proculq; à peri-

culo sedere spectatorem , quāsq; totius contentionis disceptatorem , & arbitrum honorarium , more prouidi ducis , qui , vbi alios instruxit , ipse sibi cauet loco , quod tibi praedictum volo , ne forte , cum vi , et impressione turbatis ordinibus loco deijceris expectes , tibi vt succenturiatus siet . frustra porro expectabis ab eo superpetias , copiasq; auxiliares . tota belli moles tibi vni Flamini erit sustinenda . si tibi videris per te tanto oneri sufficere posse , date in certamen , & manum consere .

His à me dictis , omnibus in Flaminium intentis sic exorsus est ille . Quoniam res , quae nunc in quaestionem venit , videtur , ijs , qui sunt doctissimi , non perdifficilis , neq; multae commentationis , sed quasi in vulgari prudentia posita , ideo eos mihi partis tibi contradicendi Vida facile detulisse intelligo reseruantes se ad maiora , neq; hercle possum credere te esse plane in ea sententia , atq; omnino esse tui iudicii ea , quae protulisti . Sed à te perinde dicta arbitror , vt aliorum sententiam pertentares , atq; eliceres . Quis enim tam caecus , & tam sensus communis expertus non videat innumera , ac penè infinita mala cum nascentibus ciuitatibus in genus humanum irruisse , cumq; ista tua , quā vsq; quaq; in caelum effers , communitate , hominumq; conciliatione ingentem rerum perturbationem fuisse secutā , & illum , qui primus in siluis , & montibus dispersos homines in coetus congregauit , multorum , & magnorum malorum causam extitisse ? Mihi certe nunquam ex animo exuri poterit , eum plus mali , quàm commodi humano generi attulisse , quicumq; ille fuerit , siue Sa-

turnus, siue Mercurius, siue Orpheus, Amphion<sup>ue</sup>, aut  
 quouis alius eorum, quos ipsi fingitis. Medius fidius  
 multa pernicioſa, multa peſtifera in mundum inuexit,  
 omniaq; vtilitatis ſpecie conturbauit, quæ proſecto  
 perſpicua ſunt, ſenſuq; percipiuntur, & quodam modo  
 tangi poſſunt. ea qui non videt, nihil videt. viderunt  
 hercle Athenienſes homines peracuti, ſimul atq; ea ciui-  
 tas initio conſtituta fuit, in ipſisq; vrbiſq; naſcentis in  
 cunabulis fruſtra eos pigiti<sup>u</sup> eſt erroris. quod vel vn<sup>u</sup>  
 argumentum te Vida mouere debuerat, & ab iſta tam  
 inutili rerumpub. tractatione deuocare, cum omnis an-  
 tiquitatis haud qua; ignarus habearis, tanta euolutio-  
 ne librorum, tanta ſcriptorum lectione. Olim enim  
 Atticæ regionis incolæ vicatim dei<sup>u</sup>cti, diſſipatiq; ha-  
 bitabant nullis ſepti mœnibus, ciuiliſq; conui<sup>u</sup>ctus peni-  
 tus expertes. Theſeus Aegei filius vir fortiſſimus vr-  
 be ædiſſicata eos omnis in vnum conuentum cœgit, atq;  
 ex agreſti, & paſtorali ad ciuilem vitam formauit, vt  
 non multo poſt in ampliſſimæ ciuitatis formã, & ſpe-  
 ciem euaderet. nec ſolum eam munitionibus firmavit,  
 validamq; fecit, verum etiam, vt ſibi videbatur, mul-  
 tis exornauit & legibus, & inſtitutis, vt in ipſo or-  
 tu cuilibet ampliſſimæ Græcarum vrbiũ comparari  
 poſſet, fuitq; ſerè vir ille Athenis, quod principi or-  
 bis terrarũ vrbi Romulus. Eo autem adhuc viuo po-  
 pulus Athenienſis animaduertit, perſpexitq; melior  
 pars, in quod ſe cœieciffent malum, à quanta vitæ tran-  
 quillitate, atq; ſecuritate in quantam perturbationem,  
 ac conſuſionem præcipitati eſſent, Statimq; ciuitatis  
 obſaturati,

obsaturati, quam ille eis obtruserat, ipsum eius auctorem tot malorum conciliatorem in exilium perpetuum eiecerunt. et id quidem hoc quoque argumento confirmari potest, quod in paulo magis frequentibus ciuitatibus plura, et longè maiora scelera, etiam pro rata incolarum portione, et ad frequentiae rationem committuntur quàm in pagis, et vicis, aut infrequentioribus oppidulis, rurius, vbi est nulla, aut certe longè minor celebritas, nemo non fatebitur minus callidos, et malitiosos homines viuere, quàm in vrbibus, qui, si eis necessitatem victus, atque egestatem adimas, aequitatem sanè colant, iustitiæque omnes prorsus numeros sinceritate vitæ impleant, nullo artificio simulationis instructi, simplices, innocentes, fideles, aperti, veri, atque vti vno verbo complectar omnia, antiqui. Id vnde quaeso te? nisi quod quò maior existit hominum cœtus, atque conuentus, eò ibi plus loci sit corruptela, et contagioni? quod vulgus quoque videtur non ignorare ex iam contrito prouerbio, quod dicitur de omni hominum cœtu. Vbi paucitas, ibi beatitas. quod non inconcinne sonat in sermone, cuius est nunc in Italia vsus vulgaris. Sed vulgus omittamus, in quo obijcere potes non existere consilium, non rationem, neque discrimen. Vetus est sapientium sententia, philosophiam, quam vos dicitis omnium bonarum artium reginam, paucis contentam iudicibus multitudinem consulto fugere. Verum quid longius aucupor argumenta? id tibi sanè expressius, illustriusque probari potest. Nempe cū aliquempiam pleniore ore laudare volumus, dicere sole-

mus, eo nihil non modò sanctius, sed neq; etiam antiquius, et antiqua hominem virtute, ac fide. antiquitus autem ciuitates, aut istiusmodi conuenticula non fuisse. vlla tute met ipse fateris. Accirco nequeo equidè equo animo ferre abs te, ab alijsq; compluribus contendì inuentam fuisse istiusmodi hominum consociationē ad vitam non modo bonē, sed etiam beate degendam, quam videmus potius fuisse corruptelarum omnis generis disciplinam, ad exaturandas hominum cupiditates, vitiq; introducenda excogitatam, si quis rectè perpendere velit præsentem humani generis statum, atq; conferre huius temporis viuendi morem, in quo tot, & tanta scelera in deum, hominesq; committuntur, cum priscorum hominum vita, qui à primo totius animalis generis ortu Arcadum, & Cyclopum ritu liberi, ac soluti vitam degebant in montibus, & siluis, in sua quisque familia, & domo, nulli communitati obnoxij, cum ius, & bonum non legibus; sed natura colerent sancti, atq; innocentes, cum inquam secundum naturam viuētes nullis indigerent neq; Lycurgi, neq; Solonis legibus, neq; Romanorum xxi. tabulis, aut vliius populi institutis, plebiscitisue. Non enim patiar, si quis me ad fabulas reuocet, fuisse inquit tempus aliquando, cum homines ferarum more humanis carnibus mutuo vescerentur, cum neq; ius, neq; pietatem noscerent. Sunt ista sanè commentitia, digna anicularum lucubratione, ab antiquissimis Græcorum siquidem conficta, vt philosophiam in cælum aliquopere extollerent, cuius beneficio humanum genus mitigatum fuisse, & excultum

ad humanitatem cogere volunt . Eiusdem generis illud quoq; existit , quod poetæ fingunt . Fuisse olim cum alijs imperarent non sapientiores , neq; ditiores , sed illi , qui tum viribus , tum , vt apud Aethiopes , corporis proceritate , & pulchritudine cæteris præstarent , et vt quidam eorum ait , facies multum valuit , viresq; vigeabant ante , quàm aurum inuentum esset .

Quod facile & validis , et pulchris æmpossit honorẽ .  
Diuitioris enim sectam plerunq; sequuntur

Quamlibet & fortes , & pulchro corpore cæti .

Sunt istæ profecto non tam vera , quàm dictu speciosa , atq; propter poetæ illius elegantiam , & festiuitatem lectu iucunda . Ne mihi quæso quisquam neque in illa rudi antiquitate hominum genus ita immansuetum , ita agreste , & ferum , adeoq; horridis , atque immanibus sensibus describat , vt nihil planè distet à feris . ne homines tanquam pecora ventri tantum obedientia cõstituat sine legibus , sine moribus cunctis prorsus disciplinæ expertes . Proinde neq; eos audio , qui tempus quoddam fuisse existimant , cum homines bestiarum more in agris vagarentur sibi victu ferino vitam propagantes , cum neq; ignis vsum haberent , neq; quicquam prouiderent animi motu , sed omnia corporis viribus administrarent , nullas tunc extitisse nuptias , certosue liberos , nullam religionis diuinæ , nullam humani officij rationem haberi cœptam , nullum ius , nullam æquitatem valuisse , nullam homines fidem coluisse , nullam tenuisse iustitiam , sed omnia ab omnibus tunc fieri solita , prout libido , vis , & impetus queng; rapiebat . 13

planè error ab Homero poetarum parente initium sumpsit, qui more suo per fabulas antiquitatem hominum ad siluestrem viuendi modum reduxit, quem secutus fuit Plato tam cordatus philosophus, qui etiam materiam quandam comminiscitur extitisse serendi humani generis, quod sparsum in terris, Satum, atq; profeminatum fuisse memorat. ille idem tamen secum ipse pugnans, sibiq; impacatus planè ambigit, an semper fuerit hominum genus, & cum de temporum antiquitate loquitur, nunquam ait immenso, aut infinito tempore, sed inæstimabili potius semper vsurpat, constatq; illa tot annorum millia, quæ ex Aegyptiorum monumentis refert in Critia, esse planè fabulosa. Is profecto si sacras potius Hebræorum literas, quàm fabulas Aegyptiorum euoluisset, nequaquam ea protulisset, quæ in Prothago-  
ra de humani generis, aliorumq; animantium satum, atq; ortu scripta reliquit, deq; Prometheo, quem de cælo furatum fuisse ignem, & sapientiam commentus fuit, quæ omnia sanè cum sint falsa, & ab hominibus per ocium excogitata, necesse est cætera quoq; quæ idem philosophus prosequitur inde manantia, veritate carere, & planè corruere, de feritate inquam, atque immanitate humani generis. Tantum autem abest, vt vnquam carnibus humanis ingluuiem explerint, se seq; inuicem homines deuorauerint, vt Orpheus antiquissimus theologorum ( ne ijs fabulis diuinam Hebræorum historiam immisceam ) canat fuisse illud tempus, cum neq; ouile, neq; vllæ aliæ carnes sacrificarentur, sed tantum liba, & fructus arborum melle respersi. carnia



bus vero insuper omnis generis animantium homines Pythagoreorum quasi ritu omnino abstinerent, sed inanimis planè escis vescerentur, quod etiam Plato idem refert in eo libro, quem de legibus scribit. Hinc quoque iacēt causæ illæ, quas ariolantur cōpulisse agrestes illos homines sine legibus, sine imperio se se oppidis, et moribus sepsisse, propter inquam validiorū iniurias auerendas. Quæ enim ante conuictum, & ciuilem conso- ciationem iniuriæ metui, atque expectari quibant ab hominibus illis innocentibus, quorum simplicitatem, integritatemque nulla tunc commercia immutasse poterant, nullusque contagioni, aut corruptelæ locus fuerat? tanta enim est vis naturæ, ut nemo, nisi per varias corruptelas à se ipso discedat. Omnis namque res diligit mirum in modum se, & statum suum, nec facile à se ipsa discedit, sed summopere retinere tendit occulto quodam nixu quicquid habet à natura insitum, illudque tenacissime conseruat, nec ab eo sua sponte deflectere patitur. Itaque per quas corruptelas primi illi homines simplices, integri, & innocentes ab humanitate deflectere poterant, quæ homini usque adeo tenaciter inheret, ut nulla vi, nulla ratione ab eo detrahi queat? nam perinde esset, ac si ipse à se ipso deiungeretur. Contra vero si qui nunc videntur ab humanitate discedere perditī, atque omnibus flagitijs inquinati; id procul dubio euenit ob malas artis, quibus in commercijs imbuti sunt, dum in ista vestra societate ciuili malorum omnium, & vitiorum segete viuunt. Quicquid enim in vno quoque est vitij, ab eo in alios, atque alios perpetua contagione



profectum, propagatumq; facile dimanat, latiusq; ser-  
 pit, atq; diffunditur, donec tota ciuitas contaminata  
 inficiatur, & omnibus flagitijs contabescat magis, ma-  
 gisq; vsqueusq; decolor, ac deformis, atq; ita deuen-  
 tum est paulatim ad id morum, in eam rerum colluui-  
 onem, viteq; humane deformitatem præcipitati sumus,  
 vt ipsam naturam humani generis suppoenitere putem.  
 In vita vero illa priscorum mortalium libera, ac solita-  
 ria quis non sentiat minime locum fuisse vlli contagio-  
 ni, cum separatim, ac disperse omnes, alius seorsum ab  
 alio diuisi in familias viuerent? Concluditur igitur  
 vestram istam communitatem, ac consociationem om-  
 nia conturbasse commodorum specie iniecta, eamq; in-  
 uentam fuisse ad explendas cupiditates, vt omnium li-  
 bidinum & animi, & corporis illecebris refecirentur  
 vrbes, & conuenticula omnia, hominumq; animi lu-  
 xuria, atq; lasciuiæ disfluere. Haud potes ire infi-  
 cias Vida neq; tu, neq; quicquid est vbiq; philosopho-  
 rum, qui istam hominum conciliationem tantopere de-  
 fenditis, quo magis genus humanum distat ab illa quan-  
 tum vis rudi simplicitate, cum nondū oppida, aut vr-  
 bes ædificari coeptæ essent vllæ, eo deterius, atq; de-  
 formius semper euasisse, donec in hanc temporum no-  
 ætem præcipiti casu corruit, in quibus mores sunt in ex-  
 tremo siti, & omnia ceciderunt: iustitiæ cæterarumq;  
 virtutum solum nomen remansit, de quo philosophi ipsi  
 inter se in angulis garriant. Cæterum, vt desint cæte-  
 ra, nemo certe vnquam refellere possit librum illum de  
 hominum interitu Dicearchi inter antiquos peripateti-

cos nobilissimi , & magnæ auctoritatis philosophi , quem sua ætate adhuc extantem Cicero legisse videtur . refert enim illum philosophum collectis omnibus vndiq; causis , quæ persæpe afferunt gentibus interitum , vt eluisionis , pestilentie , vastitatis , ruine , terremotus , vt etiam non prætereant quarundam regionum populos à belluarum repentina multitudine consumptos fuisse , demum concludere ait , plures homines hominum impetu , vi , aut fraude , atq; insidijs deletos fuisse , quàm omnibus simul alijs interitus causis , nullamq; esse tam detestabilem pestem , quæ non homini ab homine nascatur . Vos tamen vsquequaq; in cælum tollitis conuietum , & societatem hominum , coetusq; , ciuitates , et respub. adiuuentas fuisse contenditis , vt homines bene , & beatè viuerent . quod perinde est , ac si hominibus persuadere niteremini vitam beatam , & felicitatem querendam esse à trucibus , atq; immanibus illis feris , quæ infestissimæ existunt hominum generi . Libri quidem , & philosophi auctoritatem verbis fortasse eleuare poteris , atq; refellere , nunquam tamen rem ipsam , quæ nihil verius , nihil euidentius , euitare dabitur , Est enim adeo manifesta , vt oculis videri , & communibus sensibus percipi queat . Ante vero cõditas vrbes vna tantum omnium ciuitas vniuersus hic mundus habebatur , vnus cunctorum rector , & gubernator , qui etiam extiterat eorundem conditor , molitor , & effector Deus . eius nomen suadente ipsa natura , tacitaq; ratione colebant , & verebantur , eiq; suapte sponte subijciebatur , ac quotquot erant domus , aut familie , tot erant

respub. senior imperabat iunioribus. parebant vxores  
 maritis, parentibus liberi, minores maioribus natu,  
 quorum voluntatem pro lege sanctam habebant, & do-  
 mi eis nunquam deerat, vnde discerent. Non erant tot  
 artes, tot vitæ humanæ, vt vos vocatis, commodita-  
 tes ad luxuriam excogitatae, tot gulæ irritamenta, tot  
 munditiæ, & voluptatum illecebræ, quibus animi ho-  
 minum remollescunt, atq; effæminantur. non obsona-  
 bant. non potabant. non olebant vnguenta, & istius-  
 modi delitias. Satis illis erat ad imbres, ventosq; &  
 ad cæteras cœli iniurias vitandas quouis operimento te-  
 gi, seu in scenæ morem frondibus coaceruatis, seu ca-  
 uernis, quæ sibi quisq; nullo negotio parabat. At nunc  
 magnificas villas pauimentis marmoreis, laqueata te-  
 cta, auro, argentoq; & ebore fulgentia tantopere,  
 tantisq; sumptibus fabricamur. tabulas, signa, toreu-  
 mata, aurum ingens, plenumq; artis argentum, opera  
 Corinthia, gemmas diuersi generis, vestes egregias  
 coloribus repëtitis bis tinctas, torques, equos, manci-  
 pia, lectos, mensasq; exquisitissimis epulis tanta molî-  
 tione extructas nobis comparamus mundi, elegantes,  
 nitidi, optimis coquis, et pistoribus vtentes, piscatu,  
 aucupio, ijsq; omnibus exquisitis, vt nec libidini, nec  
 sumptibus modus sit vllus. quod quidem magis feren-  
 dum esset, si res æquabili ratione se haberent, essentq;  
 mortales non tam disparis conditionis. Alijs quidem  
 diuitiæ, pecuniæq; superant, quas profundant, quasq;  
 omnibus modis trahant, vexent summa libidine, non  
 nunquam in extruendo mari, & montibus æquandis.

alijs

alijs res familiaris ad necessaria deest . ij abundant auro , atq; argento , quod compressum habent . illi ære alieno pressi laborant , diuturnoq; scœnore trucidati cum fame litigant . Cæterum quia tunc nulla erant regna , nulla imperia , nulla dominatio , nullus magistratus , nullum publicum consilium , ideo neq; esse poterat tanta , tamq; profunda imperandi cupiditas , atq; libido , qua neq; diuini , neq; humani quicquam iuris seruatur . Euripidis inde versus ille toties à multis vsurpatus . Si violandum est ius , regnandi causa violandum est . in cæteris iustitiam colas . inde maxima fenestra patefacta est ad omnia vitia , inde fere omnes male artes in genus humanum inuasere . Iccirco populi regibus , aut gubernatoribus subiecti in omni reipub. genere eos sibi plusquam hostes cauent timentes eorum crudelitatem , auaritiam , libidinem , superbiam , eorum voraginē quanta libet iactura sua , aut patientia explere nequeunt , vt verissimè Actius vetustissimus poeta apud Latinos dixerit , multos iniquos , atq; infideles regno , paucos bonos esse . Apud simplices homines illos ante istas respub. nulli fateor triumphī , nulla trophæa , nullæ laureæ , nulla vehicula triumphalia nota erant , nulla militaris gloria . nulla erat scientia belli neq; terrestris , neq; maritimi . Atqui neq; seditiones erant vllæ , neq; bellorū vel externorum , vel ciuiliū calamitates , ac ruine sentiebantur vllæ , quorum semen nunquam deerit , dum istæ erunt hominum consociationes , & ciuium cœtus , neq; item profectò tot militum iniurijs , & crudelitibus humanum genus erat obnoxium , à quibus etiam so-



eij, & pacati non multò minus, quàm hostilia sæpius  
 patiuntur. nulla de causa contra ius gentium rapiunt;  
 diripiunt, spoliant, conuicijs onerāt, verberant, vul-  
 nerant, mactant, constuprant. aio nullum genus scele-  
 ris, libidinis, auaritiæ, crudelitatis superesse, quo mi-  
 lites huius temporis ferè omnes turpem in modum non  
 sint contaminati, conspurcatiq; , ipsis ducibus, tribu-  
 nis, & præfectis omnium vitiorum exempla præbenti-  
 bus, dum militiam sectantur potius ad quæstū, & nun-  
 dinationem, quàm ad gloriam, laudemq; adipiscendam  
 ciuibus iuxta, atq; hostibus infesti, paulo minusq; ab  
 iniuria, & maleficio temperantes, vt parum militia  
 distet à latrocinio, vt hac ætate verius dici possit ho-  
 mines ferino more carnibus humanis vesci, quàm in illa  
 vltima antiquitate, quam tantæ immanitatis insimula-  
 tis. Leges scriptas, aut ære incisas non habebant primi  
 illi homines, neq; iura, neq; iudicia, sicut neq; literas,  
 neq; disciplinas, sed suapte natura iustiores erant, for-  
 tiores, & modestiores, consuetudinem, & morem do-  
 mus quisq; suæ sequentes, atq; vt prius à natura didi-  
 cerant sensuum ministerio appetere corpori salutaria,  
 cōtrariaq; aspernari, ita à parentibus rationis, quæ da-  
 ta est omnibus, adminiculo, atq; præsidio assuefacti  
 erant, & deum rerum omnium auctorem, quasiq; pa-  
 rentem huius vniuersitatis vereri, & naturali quadam  
 prudentia intelligentes se ad iustitiam esse natos cauere,  
 ne aliena iactura collocupletarentur, neu quid commo-  
 di sibi quærerent alterius incommodo. atq; ita fidem  
 colere assuefacti sua sponte probi erant, iusti, et inno-

centes, vt ille quidem mortalium status à poetis primū,  
mox etiam à philosophis aureus appellatus fuerit, de-  
niq; promiscue omnes ætatem illam, auream planè no-  
minarent, nescientes quo alio nomine verius, significā-  
tiusue exprimere possent, laudibusq; cumulatiuè tem-  
pora felicissima exornarent. Fingunt item poetarum  
vetustissimi rem veram more suo integumentis adum-  
brantes, iustitiam ipsam tanquam deam, & humana  
specie præditam e cælo delatam in terram cum homini-  
bus versatam olim fuisse. mox positis vrbibus per hu-  
mana commercia vitij pullulantibus, magisq; , ac ma-  
gis in dies semper ingruentibus, atq; increbescentibus  
flagitijs, ac sceleribus infensam, è terra in cælum, vn-  
de profecta fuerat; remigrasse, donec paulatim ætas  
vsquequaq; deterior ex aurea primo quidem argentea,  
mox ænea, ferrea deniq; facta in hanc temporum collu-  
uionē, et fecem prolapsa est. id scilicet vtilitatis attu-  
lit generi humano ista vestra ciuilis societas. id com-  
modi, id beatitatis leges illæ à sapientissimis adinuentæ  
pepererunt. quod vnum argumentum per se satis esse  
possit ad cogendum nihil vnquā perniciosius, nihil exi-  
tiosius in genus humanum excogitari potuisse. Quid  
enim rogo in rebus humanis boni, ac beati existere  
queat amissa iustitia, ex qua vna virtute viri boni no-  
minamur. & sine qua nihil potest esse laudabile? est  
nanq; in illa virtute splendor maximus, vt Euripides  
poetice dixerit neq; Luciferum, neq; Hesperum ea esse  
Lucidiorem. Age vero videamus, non dico quam vti-  
litatem attulerint istæ vestræ leges, sed quàm pernicio-

sa, ac pestifera fuerit earum inuentio, rogatio, latio, ac promulgatio. Primum dico hominum genus liberū nasci, et omnium humanarum legum vinctulis solutum, hominiquē insitum esse, atque innatum amorem libertatis, quæ si tollatur, omnis vitæ iucunditas tollitur. ideo tantopere libertatem acuire humana pectora videmus, ut eam homines, qui sint alicui rei, non nisi cum vita amittere velint, neque quisquam tam sordida, et infima conditione vitæ reperitur, qui non velit, si possit, esse liber, atque ut liberi homines, iuris sui, serui sponte sua fiant, non cadit in hominis cogitationem, nostraque mentes id penitus respiciunt, atque auersantur. Etenim sicut nullum animal potest non appetere id, quod accōmodatum esse naturæ videtur, ita necesse est oderit quoque id, quod est contrarium. Seruitutem itaque sapientes morte peius esse semper arbitrati fuerunt. Sapientes vero illi vestri, qui homines per familias dispersos, atque disiectos in coctus, et ciuitates conciliant, sub legis superbissimæ vincula coniungentes, nihil porro aliud egerunt, nisi nobis sempiternam seruitutem adiunxerunt. Hoc est igitur illud tantum, tanque admirabile, atque diuinum bonum, quo genus hominum auerunt, ac locupletarunt, quandoquidem qui legibus est obnoxius, ea obeat necesse est, quæ leges iubent, quicquidue magistratus edixerint, in quorum potestate sunt leges, quæ, ut videmus, nihil planè prosunt, nisi illis, qui eis præficiuntur. Quippe sicut leges magistratibus, ita magistratus populo præsent, qui quam æquos, et abstinentes se præsent hac tempesta



te, in tua conscientia positum esse volo . quotus obsecro quisque est , qui magistratum à se tantopere questum non loco prædæ accipit ? æquum magistratum , inquit ille , adhuc reperire non potui . quid quæso contra naturam magis existere arbitrandum , quam non suo sensu , atque arbitrato vivere , præcipue homini ingenuè educato , cui cordi est libertas , sed iussu alterius , atque imperio cogi semper , et se ad aliorum nutum fingere , atque componere , nihilque nisi præfinito facere , quod alteri collibitum fuerit ? Quod quidem Xenophon intuebatur , cum diceret , nullum aliud animal minus induci posse suis pastoribus obedire , quam hominem rectoribus , et quorum est in potestate , neque ullum pecus consurgere tam immaniter aduersus custodem suum , atque hominem contra regem , et dominum , semper enim obnititur , semper eluctatur , seque ab eius imperio tendit eximere . Barbarorum ingeniorum , quibus dominorum imperia semper pro legibus fuerunt , est velle vivere in seruitute , cum nunquam , cum abiectissima mancipia , libertatis dulcedinem experti fuerint . ideoque accepimus apud Persas eodem auctore Xenophonte etiam patris imperium in filios tyrannicum fuisse , quod parentes liberis asperè , superbeque imperarent . Ceterum experimur quotidie legibus istis vestris homines non tam fieri meliores , quam callidiores , tradunt enim nobis non tam iustitiam , quam litigandi vias , inde emanavit vetustate contritum proverbium , ius summum , summam esse malitiam . neque à legibus æquitas , fides , iustitia , ceteraque virtutes , sed ab ipsa natura proficiuntur , ac potius eas nobis

insitas esse, atq; innatas sentimus, et earum vim exer-  
 citatione, & consuetudine perfici. ius enim, iustum,  
 & honestum, quemadmodum omnes quoq; virtutes,  
 sunt sponte sua, & per se expetenda, ne sint coacta,  
 & quodammodo violenta. Nonne etiam qui has con-  
 gregationes probant, memorant respublicas ipsas tunc  
 meliores fuisse, cum in ciuitatibus nondum tot leges,  
 alie, atq; alie coaceruatæ essent. Maiores nempe no-  
 stros paucis legibus omnia bene gubernasse literis tradi-  
 tur, cui rei argumento esse possit, quod plerunq; vali-  
 diores eas leges cernimus, quæ ex moribus, quàm quæ  
 ex scriptis habentur. Discebant olim pueri Romæ, vt  
 carmen necessarium xxi. illas tabulas, quibus solis,  
 nulla alia lege lata, ius summa æquitate apud eum po-  
 pulum diu retentum fuisse tradunt, neq; latæ postea le-  
 ges magnopere erant necessariae, quod quidem facile  
 perspicere potest, quisquis conferre voluerit statum  
 nascentis Romanæ reipub. cum forma illius temporis,  
 quando ad summas opes peruentum fuit, cum Romani  
 coacti fuerunt licentiam vitiorum tot legum inculcata-  
 rum multitudine cohibere. adolescente enim reipub. pri-  
 sci illi patres more potius se tenebant, quàm scriptione,  
 neq; tot opinionibus opprimebantur. Quid opus erat  
 per deum tot minaces leges, tanquam vindices, ne di-  
 cam carnifices, mortalium ceruicibus imponere, quæ  
 eos mulctarent morte, vinculis, verberibus, exilio,  
 ignominia, cum per se quisq; sua sponte boni existere  
 possent? Vt porro omittam, quòd multa sæpe perni-  
 ciosa sciscuntur in populis, quod hinc præclare perspicì

potest, cum quotidie permultæ rogatæ leges aut per se antiquentur, aut eadem potestate abrogentur, Quid quæso opus fuit consultorum libros implere usq; ad nauseam tot ineptijs, de iure parietum, & stillicidiorum, de domus, aut fundi seruitutibus? an partus ancillæ sit in fructu habendus? quibus verbis herciscere oporteat, an foenum sit aliud, quàm herba sicca? de aquarũ præterea ductibus, & cloacis, deq; istiusmodi stipulationum, & iudiciorum formulis quàm plurimis conficere libellos, & bibliothecas implere? Gentes ego equidem esse adhuc alicubi aliquas arbitror integras, atq; incorruptas, quæ leges scriptas non habent, duce tamen natura, & eius instinctu, atq; industria obeunt ea, quæ lege sanciantur. Cæterum dictum modo fuit, nos natos esse ad iustitiam. iccirco non arbitror quenquã ambigere ius naturaliter datum esse omnibus (cauilletur, nugeturue Carneades more suo, quantum velit) quod non opinione, sed natura ipsa, quæ perpetua est, & sempiterna, constitutum fuit, ab eaq; vt, modo diximus, proficiscuntur æquitas, fides, iustitia, ceteraq; virtutes, non à legibus scriptis. Oportet igitur hominem in cauendo, responsitando, ac iudicando consulere mentem suam, qua nobis deus nihil dedit præcellentius. in ea reperiet legem nobiscum natam, præscriptionemq; naturæ cordibus, atq; animis nostris infixã, qua duce nihil vnquam errare poterit, modo velit, modoq; aduersus sensuum libidines fortiter, ac strenue obluetetur. Ac vt planius quid hacce de re sentiam, atq; intelligam, vobis expromam, ego certe Socratem

in hoc sapientissimum semper probavi, quod se non vnus  
septum mœnibus alicuius loci popularē, sed totius mun-  
di, tanquā vnus oppidi ciuem profiteretur. eius exem-  
plo talem itidem me semper habui, huncq; hactenus  
agnoui, semperq; agnoscam, ac palam profitebor, dum  
vita suppetet, neq; istæ leges vestræ, aut plebiscita,  
neq; magistratus vlli ab iniuriosa, facinorosaq; vita  
me deterrent, non pœna, non metus supplicij, sed tur-  
pitudine ipsa, iudicisq; illius, qui vniuersam hanc ciuita-  
tem nutu temperat, maiestas. Hic nanq; rex regum  
omnium præpotens, vniuersorum dominus, & mode-  
rator, non modo cœlestia, sed etiam hæc infera procu-  
rat incredibili imperandi, prohibendiq; sapientia, vi-  
detq;, quid quisq; non modo agat, sed etiam secum cogi-  
tet, qualis item quisq; sit, quid in alios machinetur,  
quid in se ipse admittat, qua intus sit mente, qua pie-  
tate religionem colat, nullumq; relinquit vacuum aut  
remunerationi, aut animaduersioni locum, piorumq;, et  
impiorum rationem habet, omnia recto iudicio, et nu-  
minē incredibilem in modum administrat, neq; incassum  
deniq;, qui vim patiuntur, eius iudicium implorant.  
possunt quidem mortales pœnam legū effugere, ipsasq;  
leges eludere, aut perrumpere, verum mentis diuinæ  
animaduersionē, atq; vindictā non ita. At vero viri  
probi vna se se lege natura tenentes, etiam si omnes ho-  
mines, deumq; ipsum celare possent, nihil tamen tur-  
piter, nihil auarē, nihil iniuste faciendum putarent,  
sed vnus virtutis, aut recti causa mentem, manusq;  
abstinendas censeant. Hanc potentissimam legem nemo  
est,

est, qui ignoret. nemo inquam est tam rudis, tam incultus, & agrestibus moribus asper, quem iustum, rectumq; , quod est ipsum pulchrum, & honestum, non moueat. Male medijs fidijs generi humano consultum foret, si homines nihil rectè agerent, nisi vt legibus popularibus, & ciuilibus poenæ metu pararent. Vt enim nihil aliud obftet, censes ne omnia in hac rerum infinitate præscribi potuisse, quæ ius ipsum naturæ, hoc est illa diuina, ac summa lex, quæ latissimè, patet, complectitur, taciteq; se mentibus nostris insinuat, & potenter imperat? Athenis, vt aiunt, nulla lex lata erat contra patricidas, nemo tamen erat in ea ciuitate, qui parentem occidere nõ existimaret scelus esse inter atrociora flagitia nullis victimis expiabile. quid ita, nisi quia natura id tacitè hominum mentibus impresserat?

Hinc etiam illud, quod memoriæ proditum est, cum recente adhuc vrbe Sextus Tarquinius Lucretiæ Tricipitini filie stuprum per vim intulit, nondum Romæ legem latam fuisse vllam de stupris, exilio tamen multatus fuit adulter ipse, regnoq; pater cum tota stirpe Tarquinijs in perpetuum deiectus, quod iniuria factum videri poterat. nullis enim tunc legibus tenebatur, nisi tanto flagitio obstitisset æterna ratio, idest summa illa ipsa lex ad rectè faciendum faciliè impellens, auocansq; à delicto, profecta à natura, quæ non tunc primum esse coepit, cum fuit scripta, sed semper fuit cum mente diuina, vereor enim dicere, orta, aut nata. Ceterum quæso te Vidæ, quam rempub. inter omnes rectè vnquam constitutam arbitraris? Quippe inur

meras philosophi de istis communitatibus scribentes nominarunt, ut Cretensem, Carthaginensem, Laconicam, Atticam, Persarum, Aegyptiorum, Ephesiorum, Milesiorum, Ionum, Heracleotarum. Thessalorum, Romanorum. addo ego, quam nunc etiam florentissimam intuemur, Venetorum, Italiae ornamentum, & totius Christiani imperij, ac nominis propugnaculum. Multi praeterea doctissimorum hominum monimentis traduntur, qui aut respub. à se constitutas legibus, atq; institutis firmatas, optimeq; digestas temperauerunt, aut procul à ciuitatum gubernaculis in ocio, semoti à turba atq; subsellijs de optima ciuitatis ratione scripserunt, quorum ut aliquos promiscue, ut prior quisq; mihi occurret, nominem, ante Platonē, et Aristotelem fuerunt Phidon Corinthius, Hyppodamus, Lycurgus, Minos, Draco, Solon cū Epimenide Cretensi adiutore, Zaleucus, Charondas, Onomacritus, Tales, Diocles, Philolaus, Androdomus, Sesostrius Rhæginus, Thelecheus, et qui de optimo ciuitatis statu scripsit, Hyppodamas Milesius Euriphontis filius. Nullam ex tanto rerum publicarum numero formam, qui deinde, alius post alium scripserunt, omnino approbarunt, nullam immunem, quam inquā non carpserint, ac notarint, reliquerunt, & tanquam inutilem, interdum etiam perniciosam non reiecerint, vsque adeo, ut Plato affirmarit, sua etate ciuitates omnis, atq; respub. improbè ubiq; terrarum gubernari. Multi ideo & sunt, et fuerunt, qui hanc communionem, conuictumq; non ferentes se se à publicis negotijs, à multitudinēq; in ocium, et

solitudinem contulerunt . neq; admodum miror repertos etiam fuisse nonnullos , qui iudicati sunt vniuersum genus humanum odisse , quod à cœtu , et coniunctione hominum , atq; omnibus commercijs se omni studio auocauerunt nihil cum populo contrahentes , multitudinemq; in vita semper defugerent , vt Conon , Hiphicrates quidam , Timotheus , Gabrias , Timon , compluresq; alij à scriptoribus celebrati . Haud illi hercle , sicut vulgus autumat , homines oderant , sed cōmunitates istas , & concilia , aut respub. minus probabant , quorū vnus Timon cum ceteros omnis ciues Athenis odio persequi videretur omnium defugiens consuetudinem , vnum Alcibiaden , studiosè obseruabat , amplexabatur , exosculabatur , atq; adeo diligebat , vt cum eo esse semper cuperet . Rogatus aliquando , quid illum vnum tam facilis admitteret in suam consuetudinem usq; adeo alios omnis auersatus , & quasi perhorrescens , respondisse fertur , non ab re id à se fieri , quod vnus ille ciuis ruinæ causa futurus esset reipub. Atheniensis , atq; interitus . Hos ego quidem credo fuisse potius homines graues , ac seucros , qui cum neq; principum , neq; populi mores ferre possent , vixerunt in agris tantum re sua delectati . Socratis vero ipsius , aut verius Platonis rempub. tantopere elucubratam , elaboratamq; Aristoteles vir acutissimi ingenij , exquisitiq; iudicij omni pagina acriter insectatur , carpit , conscindit , irridet , explodit , atq; exhibat . neq; admodum parcat illis tribus , quas præ omnibus laudare videtur , Lacedæmoniensis , Cretensis , Carthaginensis . Ab Atheniensi profecto in



exilium eiectus fuit Aristides nulla noxia, aut crimine,  
 sed hoc tantum nomine, quòd præ cæteris vnus iustus  
 esset. Si qua vero celebrata fuit à scriptoribus in bea-  
 torum insulis sapientium ciuitas, quos cura omni libe-  
 ros perhibent nullum vitæ necessarium cultum, aut pa-  
 ratum requirere, sed cogitando, lectitando, discendoq;  
 in naturæ tantum vestigatione occupatos esse, illam  
 profecto docti homines ocio abundantes magis fingunt,  
 quàm norint, describūtq; illas respub. quæ esse non pos-  
 sunt, vt pictores tragelaphos, centauros, & Chime-  
 ras. Sed quæ per deum ciuitas potest recte gubernari?  
 quæ respub. sapienter ad iustitiam temperari? cum Pla-  
 to ipse tam solers rerum pub. machinator, & archite-  
 ctus in libro, qui *Epinomis* inscribitur, luculenter pro-  
 bet omnia humana tanquam in Euripo sursum, deorsum  
 vsquequaq; iactari, nihilq; in terris firmum, aut sta-  
 bile permanere. quod apertius apud Hebræos Solomon  
 vir sapientissimus dixit, id vero ille scire poterat lon-  
 ga periclitatione edoctus. permultos enim iam tunc an-  
 nos regno Isacidarum, ludæorūq; præfuerat. Pater  
 quoq; rex simul, & propheta idem aliquot annos an-  
 te in laudibus diuinis, & canticis obnuntiarat, incassū  
 eos laborare, qui instituunt, institutūq; conseruare  
 nituntur ciuitatem, nisi eam vniuersa ciuitatis, id est  
 cæli, & terræ præpotens effector, moderatorq; tem-  
 perauerit, custodierit, conseruauerit. Quod quidem  
 nemo negauerit, qui ex annalibus ciuitatum, & multo-  
 rum seculorum historijs antiquitatis indagator norit re-  
 rum pub. varias inclinationes, & momenta temporū,

Et quàm crebræ fuerint status conuersiones , mutatio-  
 nesq; , quàm per leui momento fortunæ ciuium volun-  
 tates pendeant , et ad tenuem queng; auræ flatum incli-  
 pentur . quæ heri , & nudius tertius firma erant , fixa ,  
 atq; stabilia , hodie nutant , labant , atq; vacillant re-  
 pentina voluntatum inclinatione . nempe res est ista ,  
 quæ maxime nititur populi arbitrio , atq; nutu , tene-  
 turq; vulgi studio , ac fauore , quo nihil mobilius , ni-  
 hil incertius . Hinc illæ in sacrum montem plebis seces-  
 siones . hinc tribunitiæ potestatis procellæ , immodicq;  
 magistratus impotentes impressiones , atq; ruinæ . per-  
 sæpe populi fauor aliquem in altum repente ita extulit ,  
 ita euectum honoribus amplificauit , vt tota ciuitatis in  
 eo niteretur salus , ad eiusq; arbitrium summa rerum ,  
 & consiliorum omnium referretur , magnaq; non tan-  
 tum in eius sententia , sed in nutu quoq; ipso sederet au-  
 thoritas , euestigiò verò eundem eiusdem populi repen-  
 tè restante aura , à reipub. gubernaculis , clauoq; impe-  
 rij deiectum , & à ciuitate exterminatum , penitus re-  
 scissis actis perpetuò exulasse legimus . Dies me defi-  
 ciat , si omnes enumerare velim tam nostræ ciuitatis ,  
 quàm Græcarum , exterarumque nationum principes  
 viros , rerum cum domi , tum militiæ gestarum gloria  
 præclaros , quos Fortuna ijs exemplis ludificata fuit ,  
 vt in nostra repub. Camillos , Scipiones , Halas , Fa-  
 bios , Marios , Pompeios , Cicerones ; in exteris Ari-  
 stippum , Milciaden , Themistoclem , Lycurgum , Solo-  
 nem , Photionem , Demetrium , Phalereum , addo ijs  
 Pœnum Annibalem . Quid memorem seditiones , fa-

ctiones, & improborum ciuium occultas cōspirationes,  
 coniurationesq; , quibus tam magistratuum, quàm reli-  
 quorum animi non possunt quiescere, & securi esse in  
 ciuitate? Quis rogo fluctuantis saepe maris motibus,  
 fluctuumq; agitationibus, tot inquam æstibus, & eu-  
 ripsis legem præscribat? Quis monstri tam varij incō-  
 stantis, secum pugnantis, sibiq; impacati feritatem,  
 insaniamq; ad certæ rationis, & ordinis normam diri-  
 gat? Hanc mobilitatem, inconstantiamq; nonnulli phi-  
 losophi animaduertentes affirmarunt ad cuiusq; rei mu-  
 tationem ipsas quoq; ciuitates labefactari, negatq; pla-  
 nè Plato mutari posse muscas leges in vlla repub. sine  
 ipsius reipub. mutatione. id vtcunq; sit. videmus certè  
 leges multas, quæ initio prouidentissimè latæ putaban-  
 tur aut à rege, aut ab optimatibus, necnon iussa, &  
 vetita populorum, vel paulatim antiquari, vel alijs  
 rogatis legibus abrogari, atq; refigi, principesq; ipsos  
 publici consilij modò hunc, modò illum quasq; volūt  
 leges sciscere, quæ cum sint variae, & ad tempus ali-  
 quorum fauore scriptæ, tollanturq; persæpe omnes, ac  
 deleantur senatus ipsius vno versiculo, quam esse posse  
 in illa ciuitate iuris temperationem credā, in qua quic-  
 quid reipub. principes, siue rex, tyrannusue, aut satra-  
 pes, optimates, et potentes, seu populi commune con-  
 siliū creuerint, iustum, iniustumue, cuncti ciues adu-  
 lantes, supparasitantesq; imperantium libidini defen-  
 dere coguntur, & tanquam legem habere, eiq; , si pœ-  
 nam effugere velint, parere? Lycurgi leges à Lacedæ-  
 monijs, vt sanctissimæ, initio acceptæ fuerūt magno to-

tius populi assensu. paulo post verò ipse earundem legum  
 lator ab eodem populo ob id ipsum, quod eas tulisset,  
 lapidibus petitus, priuatusq; oculo, multisq; oneratus  
 contumelijs, atq; iniurijs in exilium proiectus fuit. Se-  
 uerissimè item Draco leges scripsit, quibus tanquam ius-  
 titiæ consentaneis multos annos paruerunt Athenien-  
 ses. Deinde eas ferè omnes Solon adiutore Epimenide  
 Cretenst, voluntate publici consilij sustulit. Verum So-  
 loni ipsi quoq; eadem gratiæ ferè ab Atheniensibus, quæ  
 Lycurgo à Spartanis, habitæ fuerunt, atq; relatæ. At  
 vero, vt ad propiora veniamus. Romanorum respub.  
 semper habitæ fuit rectissimè, ac sapientissimè instituta,  
 quòd illi nostri legum conscriptores non modo multa de  
 Solonis legibus in xxi. tabulas suas transtulerunt, ve-  
 rum etiam omnes alias tam Græciæ, quàm totius Asiæ  
 respub. earumq; temperationes scrutati fuisse creduntur,  
 nihilominus qui Romanæ ciuitatis annales euoluerint;  
 nosse poterunt, quàm instabilis, nutans, atq; incertus  
 semper fuerit eius reipub. status, quanta varietas,  
 quanta inconstantia. Nullum fretum medijs fidijs tot  
 motus habet, tot tantasq; & tam varias fluctuum  
 agitationes. Quot quæso sanctiones, quod plebiscita  
 ( de grauissimis loquor, non tantum de Cassianis, Næ-  
 uianisue, aut Liuianis ) sæpius senatus vna rogatione  
 sustulit? Et nos trademus leges ciuitatibus, quæ no-  
 bis viujs antiquentur, abrogentur, deleantur? & nos  
 scilicet de optimo ciuitatis statu libros scriptitabimus?  
 & nos si dijs placet delectationis, & ocij consumendi  
 gratia in hortulis coacti tanquam aliquam scholam ex-

plicantes differemus de rerum pub. administratione? Cur non potius sophistarum more, qui quotidie, credo negotij inopia, inter se disputant, quæramus de indiuiduis, atq; intermundijs, quæ neq; sunt, neq; esse possunt vlla? Expecto quid nobis promas de iustitia, sine qua philosophi clamant, omnia regna, omnes ciuitates, conuentus, et cõciliabula mera esse latrocinia. censes ne in vlla congregatione, siue magna, siue quãlibet parua communi vtilitate seruata tribui posse cuiq; pro cuiusq; dignitate? existimas ne vllam rempublicam vsq; eò recte administrari, vt nulli noceatur, publicæ vero vtilitati seruiatur, quæ est veri iuris, germanæq; iustitiæ forma constans, et solida ratio? quotus quisq; est in ciuitate, qui si possit, non ad se rapiat aliorum commoda, aut alterius spolijs detractis suas copias, et facultates non augeat? Credo tibi notos esse versus antiquissimos, qui vulgo incerto auctore circunferentur, attamen mihi Lucilij salem redolere videntur, neq; alioqui sunt sine nitore, aut palæstra.

Nec verò mane ad noctem festo, atq; profesto Totus item pariterq; die populúsq;, patrésq; lactare induforo se omnes, decedere nusquam, Vni se, atq; eidem studio se dedere, et arti, Verba dare, vt caute possint pugnare, dolose Blandiri, certare, bonum simulare virum se, Insidias facere, vt si hostes sint omnibus omnes. his præclare studijs intelligi potest. quæ sit ciuitatis, quam tantopere laudant, consuetudo, quæ ciuium vita, eorúmque aduersus alios ciues studia, quæ charitas, quã-

tum

tum alter alteri inuicem sit præsidio, quantum in commune consulere quisq; cogitet. Hancine vitam? hoscine mores? Philosophi tamen illi, præsertim, qui leges ciuitatibus præscripserunt, clamant, testantur, obtestanturq; , & meritò quidem, aliquid alteri detrahere, & hominem hominis incòmodo suum còmodum procurare, non esse minus contra naturam, quàm mortem, quàm egestatem, et dolorem, cæteraq; mala, quæ possunt nobis aut in corpore nostro, aut in rebus externis accidere. quin etiam eodem flagitio teneri arbitrantur, qui alienū animo concupiuerit, iubentq; nos nō tantum manus habere innoxias, sed etiam mentē ipsam. Quot rogo inueniuntur in ciuitate, qui hunc tam laudabilem animi motum, tam rectam mentis affectionem habere se sentiant? loquor de ijs, qui toti sunt in ciuitate, seseq; cupidè ad reipub. procurationem inferunt, atq; inculcant, ac præter modum expetunt imperia, et magistratus tam anxie ambiunt. nam alioqui in tanta hominum copia, ac multitudine credo hercle vspiam reperiri nōnullos probos viros, qui conuenienter naturæ viuentēs norunt se ad honestatem natos, & quod honestum est, aut solum, aut certe summum bonum in hac mortali vita ducunt, illudq; maximè expetunt, & sequuntur, atq; à recto nulla neq; vtilitatis specie, neq; commodi alicuius, aut voluptatis gratia diuelli possent. ij profecto imperia non modò non cupiunt, sed etiam interdum vltro oblata, si non planè ritè, & ex ordine factum sit, non accipienda ducant, et cum alteri demandari ea vident, nihil planè moueantur, semper secum iidem. ta-

les ego equidem aliquos noui, bonos sanè viros, antiqua virtute, & fide iustos, sapientes, fortes, & moderatos, qui nemini noceant, prosint quibus possint, et omnibus mortalibus consultum velint. Verum ij licet in conuentu hominum corpore versari videantur, vt eorum existimationi, & rationi vitæ susceptæ conuenit, attamen semper sese à turba subtrahentes, nihil cum populo contrahunt, sibiq; & secum ipsi viuunt in multitudine, ac frequentia solitarij. Quotus vero inquam quisq; est ex illis, qui via vulgari magistratus tantopere expetunt, et ad rerum pub. gubernacula vulgi fauore, aut principum libidine sedent, qui in rebus gerendis, in administrandaq; ciuitate sua commoda omittens omnia ad aliorum vtilitatem, & fructum communem referat? quod illi quidem omnino faciendum est, qui rectè, & ad præscriptum philosophiæ rempub. capeessere velit. cedo mihi rogo istum iustum, istum Aristidem.

Si quempiam huc statueris ex illis, in quibus aliqua virtutis indoles exterius inesse videtur, qui sit inquam hominū opinione talis, nihil agis. ostendis potius te nescire, id nomen, ea res quàm multis officijs, & laudibus contineatur. quisquis est ille, quem tu affers, ita tectus, atq; occultus, vt vulgo iustus existimetur, si tamen intra se multas labe, et conscientie vulnera patitur, hoc pacto mea quidem sententia nemo callidus, aut cautus non iustus erit. Quare nunquam mihi ex animo euelli poterit id, quam fuisse cōmunem antiquorum opinionem ferunt, nullam rempub. regi posse sine summa iniuria. Cæterum aliarum ciuitatum institutiones



minus rectas, moresq; absurdos tibi remitto. reuoco te denuo ad eā rempub. quæ deprædicatur iustitiæ impleſſe omnes numeros. arbitror te ſcire quā exiguis initijs, quā tenui fortuna vrbs Roma tum orta ſit, tum adoleuerit, illa conuenarum, & fugitiuorum, paſtorumq; collectio. ad quantas deinde opes fuerit progreſſa, vt vniuerſum orbem victorijs, & triumphis uſq; quaq; peragrauerit, gentes, & nationes omnis ſuæ ditionis fecerit, vt ſibi terræ, ac maria ubiq; parerent omnia. Scire de te velim, an ea ſuum cuiq; genti, & nationi ius tribuerit, an potius ad ſe aliarum ciuitatum, & populorum commoda tranſtulerit, an omnia omnium nō modò concupiuerit, ſed etiam detraxerit, arripuerit, abſorpſerit. hæc tamen eſt illa reſpub. tam recta, tam præclare conſtituta, quam omnibus alijs, quotquot uſquā ſunt, fueruntue, aut vnuquā futuræ ſunt, longè anteferendam cenſent & Cicero, vel cum philoſophatur, & ſerè omnes alij, etiam externi, ſcriptores. et audent auribus meis toties inculcare fruendæ iuſtitie cauſa conſtitutos fuiſſe olim reges homines benè moratos, cum multitudo initio premeretur ab illis, qui maiores opes habebant, confugeretq; ad vnum aliquē fortem, & virtute præſtāntem, qui eſſet ſenatus columē, & præſidium populi, tenuioresq; iniuria prohiberet æquitate conſtituenda, ſummosq; cum infimis pari iure retineret? an id ex ſententia proceſſerit, ſuo maximo malo periclitati fuerunt Hebræi, qui olim in libertate poſiti cum ſacerdotis Samuelis hominis innocentiffimī, magis conſilio, & religione, quā imperio regerētur,

petierunt regem sibi constitui à deo, qui tunc genti illi præ cæteris nationibus fauens sapius occurrebat huic, & illi in precibus, et votis, seseq; quodammodo familiarem, facilemq; præstabat, quorum postulationi annuendum statuens, antequam eis regem constitueret, regni conditiones, & leges grauissimas per eundem sacerdotem imprudentibus describi mandauit, vt à tam prauo, stultoq; consilio ignaros deterreret, quas qui in Hebræorum ipsorum literis legerit, animaduertitq;, quàm cito regis huiusmodi obsaturati fuerint, mirum, nisi malit viuere in solitudine rerum suarum procuratio-  
ne delectatus, quàm se tali, tamq; iniquo, & acerb-  
bo iugo subicere. quis enim regum, aut principum cupiditatibus obuiam ibit, præsertim cum omnis licentia ad vnum peruenerit? quis eius coercebit luxuriã, fran-  
get libidines omni interdum intemperantia effusas? quis resistet, vt non sacra, profana, diuina, atq; humana ad suum conuertat vsum? norunt ipsi, qui præsent, quàm sit difficile mortalibus in potestate temperare. quid est sanè aliud regem esse, quàm omnia, quæ quis velit, impunè facere, atq; vt ipsi collibitum fuerit cuncta mi-  
scere, cuncta audere, atq; moliri? homines inquam ho-  
nesta conditione natos non tantum freno, sed etiam iu-  
go, aut clitellis impostis premere, cum nullis ipsi re-  
ges legibus astricti vitæ, ac necis in cunctos habeant potestatem, cum blanditijs præsentium voluptatum al-  
lecti cupiant, appetantq; omnium omnia, opes, hære-  
ditates, lautissima patrimonia, signa, tabulas, vestes.  
egregias, vasa pretiosa, fundos, domos, villas, equos,

elegantiora mancipia, liberos, vxores, & quodcunq;  
velint, ad exaturandas suas effrenatas, indomitasq; cu-  
peditates, sibiq; subiectos non ciues, sed famulos mise-  
ros in turpissimam seruitutem adducant, cum nihil sit  
nefas nec in facinore, nec in libidine, omniaq; quæ in  
mentem, aut in libidinem incidunt, sibi licere velint,  
quod nemo eorum cupiditati obsistere valeat, sed omnes  
mussantes, neq; mutire ausi, vitæ et tergo metuere co-  
guntur, cum animaduertant quotidie hos, & illos, qui  
regiæ licentiæ reclamare, atq; resistere adorti fuerint,  
damnis, & ignominijs, atq; interdum morte mulctari.  
Quaso vos, atq; obtestor amplissimi viri. vnde tot,  
& tanta onera, quæ publice imponuntur mortalibus?  
vnde tot tributa, tot munia, tot pēstationes, tot sum-  
ptus, & labores, nisi ab istis congregationibus? siqui-  
dem qui in ciuitatibus dominantur, vt aliqua iustitiæ,  
& honestatis specie furta sua, & rapinas prætexerent  
auaritiæ afflatu, atq; instinctu excogitata fuere extra  
publica ciuium munera viritim obeunda in ciuitatibus,  
& prouincijs vectigalia fructibus, & mercibus im-  
ponenda, tributa, portoriaq; circumuectionum, de-  
cumæ, & centesimæ, onera præterea innumera extra-  
ordinaria *ἐπιμερολικά*, ostiaria columnaria, tigna-  
ria, perticaria, quorum nomina quotidie noua adinue-  
niuntur, quæ cum explere nequeant regum istorū, prin-  
cipumq;, & magistratuum libidinem, atq; auiditatem,  
pro expeditis vectigalibus, & portorijs plerunq; ha-  
bentur ipsorum ciuium bona, quæ inopiam ærarij sæpis-  
sime suppleant. imperantur itaq; populis, & ciuitati-

bus pecuniæ, milites, operæq; frumenta, & quæcunq;  
 ad bellum tuendum vsui sunt reipub. hinc tot vbiq; va-  
 gantur publicani, redemptores, pigneratores, manci-  
 pes, quæstores, scripturæ magistri, lictoresq; & qui  
 ea acerbissimè exigunt, decumatores, satellites, appa-  
 ritores, accensi, sectores, quadruplatores, diuifores,  
 delatores, verius autem carnifices, gladiatores, lanistæ  
 sicarii, et id genus pestes, quorum omnium iniurijs ci-  
 ues miserè oppressi coguntur sæpissimè iniquissimo fœ-  
 nore versuram facere, tandemq; bonis suis decedere, ac  
 fame enecti extrema pati. Itaq; ciuitates, prouinciæ,  
 & regna in perpetuū evertūtur. Suscipiūt namq; per-  
 sepe reges temerè bella iniusta, minimeq; necessaria, aut  
 auaritia, & augendi regni cupiditate inflammati, aut  
 si dijs placet, animi duntaxat causa ad voluptatem, et  
 libidinem, tanquam aliquam venationem, & ludū, nec  
 animaduertunt ante susceptas expeditiones, bellū esse  
 ararij pestem, atq; hirudinē, & vndiq; continenter in  
 exercitus alendos imminere infinitos sumptus, imma-  
 nesq; iacturas populis suæ ditioni subiectis subeundas.  
 quo fit, vt quicquid ipsi reges delirāt, vt est in vulga-  
 to versu, miseri ciues, & populi insontes, torquean-  
 tur, ac poenas alienæ dementiæ dependant. Non hic  
 atrociora eorū scelera persequor. deficeret enim me tē-  
 pus, neq; id est huius ocij, cum neq; ad inexpertos lo-  
 quar. haud omittam tamen vnum, quod etiam per  
 ludum, et iocum, tanquā nugentur, patrare audent.  
 Vsq; eò ad nihil pudoris est deuentum, vt regum bar-  
 barorum iussu ad inanem aurium voluptatem, et oble-

Stationem pueri ingenui luce palàm sine dissimulatione omnibus inspectantibus execentur, quò ita Vocem li- quidiorem, acutioremq; , & magis canoram conseruent. tam inquam tenui, leuiq; de causa. in quo quanta iniu- ria fiat naturæ, non moribus solum, nemo est qui non videat. tantum vero deformitatis, sceleris, & flagitij priusquam essent constitutæ ciuitates, et reges impera- rent, si auditum fuit vnquam, aut vllis literis lectum, totum me VIDA ad te traducas licebit. neq; erit. quod de hac controuersa verbum vltra addam. Si id nunc agerem totos vt tyrannos penitus patefacere vellem, possem cogere, atq; peruincere ab ista vestra consocia- tione malorum omnium sentina genus humanum planè deprauatum, deformatumq; fuisse, dū qui regunt, ni- hil pensi habent, nihil non ad suam libidinem referunt.

Si vero non rex dominatur, sed respub. à pluribus vno administratur, siue sint illi pauci, qui plurimum in ciuitate possunt, siue res sit penes vniuersum popu- lum, magistratus, & qui præsunt, neglecta communi vtilitate priuatis rationibus, & commodis suis quisq;, student, atq; in compilanda repub. consentientes ami- corum auaritiæ, cupiditatibusq; inuicem inserviunt, et mutuas operas tradunt, et quæ populi sunt communia, domum suam quisq; auertunt. mandantur ideo magi- stratus sine recti, prauiq; discrimine ad gratiam, & li- bidinem. atq; ita indignis ad publicæ rei administra- tionem vocatis iacent publica vbiq; iura. silent iudicia, iustitiæq; de foro sublata penitus obmutuit, & ipsi iu- dices, qui tam de publicis, quàm de priuatis controuer-

sijs constituunt, propalam venalia habent omnia, iur-  
 stitiam, fidem, iusiuranudm, religionem, seseq; cuiq;  
 emere volenti proscribunt. Hæ sunt illæ amplæ, atq;  
 præclaræ causæ, quæ homines ad reipub. capeffendæ  
 gubernacula, ad imperiumq;, cuius natura hominis est  
 per se satis auida, inuitant, non hercle, quemadmodum  
 ipsi præfescrunt, quo alijs prosint. Hac imperandi  
 cupidine inflammati quoq; philosophi, vt inquam ipsi  
 ceteros iuuent, haud manifestò quidem, neq; vñtatis  
 artibus, & via vulgata, sed occultè, dissimulanter, et  
 per cuniculos sibi viam ad regnum munientes tãtopere  
 laudant istam consociationem, et hominum conuictum,  
 librosq; cumulate alios, atq; alios de rerum publicarum  
 temperatione scriptitant. verum tamen non eualuerunt  
 istud ita cautè, ita callidè, tamq; tectâ molitione archi-  
 tectari, quin tandem erumpentes cupiditatem suam, &  
 quid affecarent, aliquando prodiderint. Non erubue-  
 runt boni viri profligato pudore palam prædicare, bea-  
 tas fore respub. & ciuitates omnis, si aut philosophi re-  
 gnarent ( vide hominum impudentiam ) aut certe reges  
 philosopharentur. difficile est nanq; ita tegere, ac ce-  
 lare, quod cupide expetas. vt id interdum deprensus  
 non appareat. hinc illa omnis pendet cantilena. hinc  
 illa eloquēs philosophia nugatur in circulis. Atq; adeo  
 præceptus in eam sententiã delapsus est princeps ille sem-  
 per habitus philosophorum Socrates, vt non contentus  
 hac vulgari, atq; vñtata ciuium communitate censue-  
 rit omnia omnium inter ciues oportere esse communia,  
 vt neq; ab ea communionem eximeret vxores ipsas, &  
 liberos,

liberos, quos omnino voluit esse promiscuos, ac communes. in eandem quoque sententiā tuit manibus, ac pedibus eius auditor Plato, eamque perpetuis literarū monumentis (nugentur qui velint) mandauit. Si qui vero philosophorum affecuti olim fuere id, ad quod consequendum omnes machinas intenderant, Si inquam ad ciuitatis gubernationem vnuquam peruenire, tum crudelissime imperarunt, tum suas respub. in perpetuū euerterunt. nullus illis fuit neque avaritiæ, neque libidinis, neque aliarum cupiditatum modus. Non hic porro suppetit tempus, ut eos omnes recenseam, quos vobis omnibus eruditissimis probe notos esse reor, ex Græcorum historijs. ut Aristonem philosophum, qui Athenis rempub. multos annos superbissime graui iugo oppressam tenuit. denique eam præclarissimam totius Græciæ ciuitatem maluit ab exercitu Romanorum duce Sylla capi, diripi, atque incendi, quam ipse temporari cedens se regno abdicare, ut item Perian drum vnum ex septem, qui Corinthi regnarunt, cunctosque barbaros tyrannos inhumanitate, et sædē factis superauit. qui vero regnum non potuerunt assequi, ut opes, potentiæque, et omnia præter vnam sapientiam callida ostentatione aspernari videantur, atque infra se posita contemnere, se auertunt à publico, et à turba auocant, soli que cognitioni, verique inuestigationi vacāt, neque rempub. capessunt, nisi coacti. quod ille idem Socrates obstinatissime seruauit, qui ab alijs improbe, atque iniuriose regi maluit, quam ipse ciuitatem cum alijs temperando regi socios habere. vnde nimirum in maximas calamitates



incidit . Plato verò , qui se à publicis negotijs Socra-  
 tis exemplo abduxerat , professus in sola veri perspi-  
 cientia , solertiaq; versari , inuitatus tamen olim à Dio-  
 nysio tyranno in Siciliam perrexit . in spem enim ve-  
 nerat regnum illud nutu suo , ac ductu administratum  
 iri . verum à tyranno , qui ostentationis causa , vt sit ,  
 doctos homines apud se esse affectabat , indignum in mo-  
 dum ludibrio habitus fuit , ac deridiculo sicut complu-  
 res alij philosophi , qui in eiusdem tyranni aula multa  
 cum indignitate versabantur . deniq; regnandi spe deie-  
 ctus ab insula clam aufugit . Sed credamus illis , sitq;  
 nobis persuasum eos haud quaquàm simulate , atq; insi-  
 diose agere , & omni prorsus vacare imperandi cupidi-  
 tate . alia autem aggrediamur via , & agamus ratione ,  
 quæ mihi nunc primum ex modo dictis exoritur . Ho-  
 mines igitur isti quantum vis sapientes ad rempub. non  
 accedunt , nisi coacti , vt illis faciendum censet Plato .  
 cur non vltro quæso , & lubentibus animis , si res est  
 humano generi tam utilis , & necessaria , tamq; per se  
 decora , & honesta ista hominum coniunctio , ac conspi-  
 ratio ? Cur item populis iura , & leges describunt , à  
 quibus se subtrahant ? quid alijs persuadere nituntur am-  
 plectendum , quod ipsi tanquam scopulum fugiunt ? quæ-  
 so quis eos ferat tam varios , tam inconstantes , secumq;  
 tam inconsulte pugnantes ? Quid ? non ne Plato quoq;  
 ipse de legibus scribēs multa prædicat de felicitate pri-  
 scæ illius ætatis rudis , & incultæ , cum nullæ essent le-  
 ges , nullæ ciuitates , nec dum esset auditum reipub. no-  
 men , atq; vtinam nunquam fuisset . non profecto ad id

morum deuentum foret, non inuassisset tam profunda, insatiabilisq; regnandi cupiditas in animos principum, inter quos aliquando aliquis inuentus memoratur, cuius libidini vniuersus orbis terrarum regnandus nimis exiguus, atq; angustus videretur, pluresq; mundos ad Anaximandri Philosophi opinionem suæ diuioni subiiciendos, triumphandosq; vestigāret. non tam præcipientes, tam pròrupte, & præter modum etiam ipsi philosophi raperentur ad ciuitatum gubernacula dominandi libidine, quæ homines ad omne facinus suscipiendum impellit, cuius causa tot bella, tot certamina existunt inter mortales. non opus esset tot ducibus, tot imperatoribus, tot bellatoribus. non tot exercitus quotidie occisione occiderentur: Hinc profecto Xerxes, ceteriq; complures barbarorum tyranni omnia omnium appetentes tot armatorum classibus maria constrarunt, tot copijs equestrium, pedestriumq; Helesponto iuncto, Atbo persosso ingentes tractus terrarum compleuerunt, multaq; conati fūere. quæ sunt supra hominum vires. Hinc Romanus imperium orbis affectans tot cladibus vltro, citroq; illatis, & acceptis tantum humani sanguinis hostium, ciuiumq; effudit. Hinc contra Carthago per æquæ amula Romani imperij nō ante conqueuit, quā victa, excisaq;, & solo penitus ab hoste. Victore complanata esse desiit. Hinc deniq;, quod sine magna animi permotione, maximaq; lachrymarum vifari nequeo, nunc immanissimus Turearum tyrannus omnium regnorum appetens tot milibus barbarorū, tot nubibus cohortium, quas quotidie in arma cogit, im-

minet Christianorum rebus, cui nomini vehementer esse perpetuò infestus, regū, et principū nostrorū inuitatus discordijs immortalibus, et exitiosis cōtentionib. qui reges cū potius deberēt, si quid eis pensi esset, cōmuni periculo obuiā ire cōiunctis uiribus, cōmunicatisq; cōsilijs cū ijs, qui rectis sensibus eunt, eosq; potius in hoc emulari, de potentatu iam diu certātes incredibili dissipatione, atq; effusione pecuniæ, iugum sempiternæ seruitutis in nostris, totiusq; reipub. ceruicibus collocare pergunt, atque tam se, quā alios perditum eunt, et in apertam perniciem adducūt tan manifestō errore ducti, neq; enim scelere crediderim. utinā uero ipsi soli, penes quos culpa residet, pertinaciæ suæ poenas daturi essent, neq; publica ruina inuoluerent seclū omnes populos Christi legibus subiectos, neq; religionis tam certæ, tã augustæ famā restringere, neq; totius Christiani nominis gloriam, et ipsum inclytum nomen obliuione sempiterna, ac nocte obscurare, penitusq; delere pergerent. Quis ista intuens, ac cogitans audeat Dicearchi sententiæ, de qua modò, refragari? aut quis eius potius librum de interitu hominum planè aureū vltro non fateatur? hāc felicitatem, hos beatæ vitæ fructus attulit ista vestra hominum conciliatio. et dicere audent respublicas, ciuitatesq; esse constitutas, vt sua cuiq; tenerentur? et adhuc quisquā mihi iustitiam nominet, aut beatæ vitæ mentionem facere pergat? O igitur iterum, atque iterum beata illa secula, cum istarum rerū publicarum nomen adhuc erat penitus inauditū, ignoratumq; fons fraudum, maleficiorum, et scelerum omnium. O ter-

Et quater fortunatam illam, exoptandamq; etatē, quam  
heroicam merito appellare possumus, cum ius, et fas  
vbiq; mortalium potentiſſima eſſent, cum mortales in-  
gula ſua ſponte, nullis legibus ſcriptis, aut plebiſcitis  
boni eſſent, legem optimam, et conſantiſſimā ſecum  
ſemper geſtantes, quibus, vt expoſui, innatum, inſitū,  
naturaq; præſcriptum erat, vt deum quidem primum  
tolerent, deinde parentes, et propinquos, talesq; eſ-  
ſent erga ceteros homines, quales alios aduerſus ſe exi-  
ſtere vellent, et quod ipſi reſpuebant, fugiebantq; in  
alios neq; molirentur, neq; cuiſpiam cuperent. erant ſa-  
ni omnes, quales haberi volebant, viamq; illā inſtin-  
ctu nature norant, quā eſſe cōpendiariā ad uirtutē So-  
crates dicere ſolebat. nihil erat illis fictū, nihil ſimulatū,  
nihil à quo quā non ex animi ſententia dicebatur, nihil  
agebatur non bona fide. aberant doli, aberant fraudes.  
erant omnes māiarum artium inſolentes. ignota erat  
omnibus imperij, dominandiq; cupiditas. nō irruerat in  
hominum animos auaritia, non ambitio, non glorie  
ſupra bonum, et æquum appetitio. non publicæ rei  
expilatio nominabatur, neq; peculatus, neq; luxuria,  
pauca, minimaq; exigente natura. illis videbatur mol-  
lis, et ferenda paupertas. omnibus erat cibi condimen-  
tum, lautumq; obſonium fames, potus ſitis, contentis  
tenuiſſimo victu, nullo apparatu, contemptiſſimis eſcis,  
et potionibus. ſatis erat omnibus uita modica, et aper-  
ta nature ipſius deſideria explere. atq; etiam ſicut vi-  
ctus erat tenuis, ac facilis, ita veſtitu utebantur para-  
bili ad frigoris, aut ad æſtus moleſtiam ſeu textili, ſeu

nexili . didicerant assuetudine hyemem , & æstatē iuxta  
 pati , inopiam , & laborem pariter tolerare . non erat  
 tot odijs , simultatibusq; conferta vita , non circumsre-  
 pebant tot arma . non tot duella audiebantur , nō tot ho-  
 minum strages , non tot urbium direptiones deplorabā-  
 tur . nullæ tendebantur insidiæ . erant pacati omnes , suo  
 quisq; contenti , nulli , neq; libidini , neq; delicto obnoxij ,  
 fidem sanctissimè colebant , recte , frugaliter , & absti-  
 nenter vitam degentes . O' qui me sublatum è turba , et  
 ista confusione vitæ plenæ insidiarum , & metus , ex  
 omniq; scelerum colluione conflatae protinus restituat  
 ad beatam illam solitudinem , felicemq; seiunctionem ,  
 qua vnusquisq; apud se rerum omnium securus procul à  
 terroribus viuebat . O' qui me tandem abducat à tu-  
 multu , procellisq; , ac tempestate vagæ , semper flu-  
 ctuantis , conflictantisq; multitudinis , quam tot odia ,  
 discordiæ , dissensiones , despicationes , simultates , emu-  
 lationes , inimiciæ , bellaq; ciuilia perpetuò exercent ,  
 euestigioq; sistat in illa placata , tranquillaq; vita , in  
 quam nihil , aut certe parum possit fortuna , quæ vita  
 quondam iustitiam cum ceteris virtutibus è coelo in sui  
 contemplationem attraxerat . regnabat tunc simplex ,  
 nudaq; , & aperta veritas . omnia inquam erant synce-  
 ra , omnia propalam patentia . lucebant vbiq; per se  
 æquitas , iustitia , virtus , pietas , sanctitas , religio .  
 sua re quisq; beatus viuebat . Si quid autem expeteba-  
 tur in vita , querebatur duntaxat ad vsus necessarios ,  
 non ad perfrendas voluptates . inde aberant multitudi-  
 nis inuidia , odium , obtrectatio . nulli quenquam poten-

tiorum irridebant adulescentes . nulli erant largitores , nulli maledici , nulli factiosi . omnia euertit ista hominum conciliatio , ciuitas , aut respub. infima summis paria fecit , turbauit , miscuit , in hominum animis vere virtutis neruos incidit mentes humanas omnibus vitijs , tanquam venenis delibutas imbut , tot inductis artibus magis amoenis , quam necessarijs . Te appello summe Sol , qui opera omnium , qui terram incolunt , cernis , omnia collustras , ac tua luce complēs , temporum dux , et moderator . queso te vidisti ne vnquam inter hominum adinuenta hoc vno indignius , vitæq; humane perniciosius , ex quo vniuersum hunc mundum cursu perpetuo ambire cœpisti ? diluuiū ex illo tot inductæ fuere inextinguibiles religiones , tot superstitionibus referti sunt mortalium animi , tot vanis ritibus , et ceremonijs assuefacti , erratumq; est plurima secula in tenebris , antequam vera religio , hoc est , ipsa lux ope diuina , non hominum adinventionē , mundo illucesceret . ex illo inquam desierunt homines à virtute agere imbuti malis artibus , quas prisca illi rudes ne suspicari quidem poterant . Subierunt inde tot illecebræ voluptatum , tot magnifici apparatus , vitæq; ciuilis superuacanei cultus , ac munditiæ ad delicias introductæ , potius inutiles , quam necessarie . ex illo rogo , vel potius ex illa fornace , cupiditatum incendijs humanum genus inflammatum fuit . inde mortalium animis irrepsit ambitio infinita , profundaq; pecuniæ , diuitiarum , potentiae , honorum appetitio . inde inde virtutes ferè omnes interiere , in quarum locum succedere vitia contraria pro labore



desidia . pro æquitate , abstinentiaq; , & continentia ,  
 improbitas , licentia , luxuria , pro pudore , & vere-  
 cundia audacia , atq; temeritas . pro liberalitate , et be-  
 neficentia tum auaritia , tum largitio , vt nec libidini ,  
 nec sumptibus modus sit vllus . inde doli , furta , fraudes ,  
 inuidia . inde belluatio , lustra ganeæ , popinæ , ceteraq;  
 gulæ labes . inde permultorum mortalium neces , ve-  
 xatio , direptioq; sociorum . inde regum vel potius ty-  
 rannorum crudelitas , magistratuum , iudicumq; into-  
 leranda dominatio , opificum quoq; vulgus , sellularij ,  
 & qui in sordidis artibus versantur quotidiano quæstu  
 viuentes , quiq; in agris manuum labore inopiam tole-  
 rant , improbi euasere , ac nihil , his præsertim tempo-  
 ribus , proficiunt , nisi mentiantur . nihil illis veri . ni-  
 hil vsquam in terris sancti , nihil synceri relictum , nul-  
 lus apud quenguam cœlestium metus . nullum iusturan-  
 dum sanctum . nulla religio integra . pietas , probitasq;  
 aut fides per se parum tuta est . nemo testimoniorum  
 religionem , & fidem colit . animi hominū propter ma-  
 las disciplinas libidine cæci , luxu , lasciuiæ , atq; des-  
 idia corrupti intabuere . omnibus ferè diuitiæ , volupta-  
 tesq; bono sunt , honestoq; potiores . vsq; adeo duobus  
 maximè diuersis , atq; contrarijs vitij hominum genus  
 fœdum in modum laborat auaritia , atq; luxuria , dum  
 ventri , atq; libidini sumptus querunt , pecuniæq; sola  
 est in pretio non tantum opum , & potentie , sed etiam  
 multarum , & magnarum effectrix voluptatum . hinc  
 scæ , et gladij . hinc venena . hinc furta , peculatus , ex-  
 pilationes , direptiones ciuium , & sociorum , atq; in-  
 numera



numera præterea flagitia , vt homines nihil iam humani habere videantur præter hominis figuram , et oris speciem . nego vllum genus sceleris , libidinis , avaritiæ excogitari posse , quo id temporis ciuitates non laborēt . nihil est iam , non dico , pudori , probitati , virtuti , rectis studijs , aut bonis artibus , sed neq; libertati , & saluti , loci . nugantur quidem philosophi in hortulis , et umbraculis suis inter se summa contentione digladiantes de iustitia , fortitudine , honestate , dignitate , moderatione , continentia , liberalitate , deq; magnitudine animi , cæterisq; virtutibus , deq; officio , in quo colendo sitam consistere aiunt vitæ honestatem omnem , in negligendo autem , turpitudinem , speciosa profecto dictu , quæ habent visum insignem , atq; illustrem , sed re , aut vsu nihil prorsus adiuuant , nihil affirmant , quo meliores simus . ista vero magis naturam deprauare experimento didicimus , dum virtutibus contraria simul vitia docent , quæ hominum animi contagione corporū depressi facilius comprehendunt , alieni appetentes , sui profusi . inde inde medius fidius irruerunt in genus humanum illa capitalia quoq; flagitia , & scelera , ausiq; sunt homines depositum abiurare , leges euertere , patriam hostibus prodere , parentes violare , Fana depopulari , conscribere mortuorum testamenta , adolescentes circumscribere , & , vt deniq; finiam , quicquid vnamquam scelerum in genus humanum inuasit , ex illo vno , eodemq; pullulauit seminario . Conclusa hac igitur rebus tam necessarijs ratione , nisi conspectum vestrum augustissimum vererer , nisi præterea metuerem , ne quis

extra criminetur me violare ius maiestatis, atq; imperij, vnum adderem, quod fortasse auditu paulum à cōmuni hominum sensu, atq; intelligentia disjunctum videretur. verum inter bonos, & fortes agendum ingenuè. quam vis enim carnificinam prius subeam, quam nō promam apertè, & liberè quæ sentio. enuntiabo voce summa, quoad vires valebunt, audacter, nullius plane in hac re fraudis conscius, neq; verum in tam optata occasione ( fremant licet omnes ) occultabo. Igitur insanum, vt ait ille, magnum moliens negotium vehementer cuperem hanc vocem, tahquam ex altissima specula, vnde esset latissimus in omnes partis circumspectus, emissam à cunctis gentibus, & nationibus in cunctis orbis vniuersi regionibus vndiq; audiri, atque intelligi. Audiat natura, atq; humanitas. audiant, quæ olim solebant in terris cum hominibus versari, iustitia, & fides, cum splendido cæterarum virtutum comitatu. audite viri præstantissimi sententiam meam. Cum cōpertum sit ex constitutis vrbibus mala plurima hominibus congruisse, cunctaq; ferè vitia inuasisse in genus humanum, atq; inde fontem apertum maleficiorū omnium erupisse, & mores indies magis, ac magis lapsos. propter hominum inter se cōmercia, mutuamq; consuetudinem, atq; conuictum fieri deteriores, plus, plusq; quotidie animos deprauari, multoq; magis in posterum deprauatum iri prospiciam, periculumq; imminere humano generi, ne vltione diuina correptum penitus corruat, quod vltèrius homines neq; vitia sua, neq; eorum remedia pati possunt, censeo relictis ciuita-

tibus, cœtibus, & conuenticulis omnibus, vbi impro-  
 borum licetia corrupta, scœdataq; sunt omnia, ad agros,  
 & ad solitudinem vniuersè cunctis mortalibus redeun-  
 dum esse. dimittendamq; , ac fugiendam tetram hanc,  
 atq; immanem belluani, quam reipub. nomine secutus  
 veterem errorem philosophorū Videri ingressus est tot  
 laudibus inauspicatò obruere, triplex inquam tot capi-  
 tum, totiesq; tripartito tergeminum monstrum tot in-  
 nolueris, & integumentis inuolutum portentum, toties  
 multiplex, tot flexionibus, tot caudarum voluminibus,  
 & spiris contortuplicatum, hoc est ipsam germanam  
 reipub. qua conciliatrice, & quasi lena animum um-  
 bris, delicijs, ocio, languore, desidia, labefactauimus,  
 remigrandumq; ab ea vita, in qua est nobis longè plus  
 mali, quam commodi ad priscam vite priuatæ, ac soli-  
 tariæ tranquillitatem, ac securitatem, in qua propulso  
 legum, & pœnarum, consoriarumq; notationum metu  
 non anxij vsquequaq; futuri simus, sed cum grauitate,  
 & animi constantia nobis, & apud nos simus victuri,  
 relinquendaq; à nobis regna, imperia, honores, nobi-  
 litates, maiestates, dominatus, diuitias, opes, inanes  
 glorias illis, qui ea tantopere appetunt. Agite viri  
 fortissimi à tempestate porro omuium perturbationum  
 vndis excitata in portum salutissimum nos consciamus,  
 vindicemusq; à turpissima scœdissimaq; si viri esse vo-  
 lumus, seruitute in pristinam priscorum mortalium li-  
 bertatem. eximamus nos ab iniquissimo primatum ma-  
 gistratuum, & iudicum, quibus desitum est quicquam  
 iniquum videri, dominatu. euadamus tandem à populi

inuidia , tanquam ab ergastulo , & ab aliquo pistrino ,  
 et ad maiorum nostrorum felicissimum prisca illius an-  
 tiquitatis statum reuertamur , vbi principum , & po-  
 puli mores non sūt nobis tanta nausea ferendi , tot  
 ineptiæ , tot stultitiæ deuorandæ . vitemus conuentus ,  
 & congregationes tot insidijs , fraudibus , et fallacijs re-  
 fertas . meminerimus aureæ illius sententiæ prudentissi-  
 mi philosophi , nullam tam detestabilem pestem existe-  
 re , quæ homini ab homine non consletur . reuocemus ad  
 hanc ætatem tam deformem , tam squalidam , & obso-  
 letam heroicâ illa , & beata tempora , et aureum secu-  
 lum representemus . reducamus in terram iustitiæ post-  
 liminio redeuntem , pulchritudinemq; , & splendorem  
 virtutis iam olim à mortalibus repudiatum , atq; reie-  
 ctum . seuocemus nos à tot , tantisq; molestijs offensionū ,  
 & repulsarū , procul ab instabilis vulgi iudicio , pro-  
 cul ab ambitione , & honorum contentione . Quid ob-  
 secro dulcius , quid iucundius , quàm viuere ex natura ?  
 quam si sequamur ducem , atq; magistram , nunquam à  
 recto aberrabimus deo vni præpotenti obtemperantes  
 totius huius amplissimæ ciuitatis , mundi inquam , &  
 vniuersæ naturæ molitori , atq; moderatori suam quisq;  
 familiam regentes , facultatum se quisq; suarum finibus  
 continentes , paruoq; contenti , magis rebus necessarijs ,  
 & salubribus studentes . quam quietem , vitæq; securi-  
 tatem , & cunctarum perturbationum sedationem ego  
 mediussidius omnibus imperijs , omnibus omnium triū-  
 phis , magnificentijs , splendoribus , apparatibusq; cum  
 elegantia , & copia , cunctisq; opibus , atq; diuitijs , si

quid mei iudicij est , anteponendam duco . Dixi sententiam rogatus præstantissim i viri non modo me , sed utro quouis graui , & abstniente , quem voluptatum illecebræ à veris , et optimis consilijs dimouere nō possint , dignissimam . Ne quis tamen autumet me genus humanum omnino distrahere ad disperditionem , dissipare , atque diuellere velle , omnes ipse potius gentes , omnes nationes , omnes populos , cunctosque mortales ex oppidis , & municipijs , atque quibusvis conciliabulis ad ampliorem societatem , quæ lege naturæ latissime patet hominū inter omnes , ample , atque magnifice deduco . Hæc habui ferè in hanc sententiam quæ dicerem , quoquo modo potui , ad hanc dictionem subitam , & improuisam , adde quoque , mihi parum gratam aduersus ingenium meum detrusus , imparatus , atque inexercitatus . Scio equidem mihi opus fuisse longiori apparatione , cum maximè laborandum esset in odioſo causæ genere . Sed enim quid facerem ? mos gerendus fuit Montio . qui totam hanc turbam conciuie volens , cum pacata , tranquillaq; essent omnia , quòd præuiderat hac disputatione sibi , suisq; collegis , nī id faceret , protinus negotium exhibitum iri . æquū enim esse , atque è dignitate videbatur eos huius nostri conuentus , & societatis principes principe loco sententiam dicere , et excipere primos ictus in arenam descendentes . Itaque is , ut se ex hac turba euolueret , à seq; , et suis cōfessoribus omnem hanc molestiam amoueret , quicquid planè laboris , discriminis , & certaminis imminēbat , in nos ambos Vida , si nescis , minus sibi coniunctos . et

longo interuallo ad se pertinentes , ordinis inferioris  
 homines deriuauit . His ille dictis oculorum quadam  
 hilaritate liberali modestè nobis arrisit . euestigiòque  
 exiit omnem illam , quam in dicendo modo præfere-  
 bat , acerbitatem , & austeritatem , quo orationis vehe-  
 mentiam ardore oculorum , vultuq; planè non suo imi-  
 taretur , totius vt oris mutata specie confectum sit fa-  
 ctus planè alius , ostenderetq; omnino se alienæ personæ  
 actorem fuisse , neq; suo pte sensu ea pronuntiasse , præ-  
 sentemq; quodammodo tunc absentem fuisse . Cùm om-  
 nes verò docti hominis , atq; parati non satis admirari  
 possent eloquentiam . Montius conspiciatus rem ex sen-  
 tentia procedere , iactamq; esse aleam , vt omnino re-  
 spondendi cùm contentione necessitas mihi imposita es-  
 set , Hactenus equidem inquit , Flaminium semper ra-  
 tus sum poetam duntaxat dulcem , atq; compositum , ta-  
 temq; , cui nostra ætate pauci pares essent . lego enim  
 etiam interdum poetas , cum mihi à publicis muneribus  
 socij quippiam datur , neq; à recentioribus , & ab eis ,  
 qui hodie viuunt , tempero . Existimaui sanè semper  
 poetas , atq; oratores facultate inter se plurimum esse  
 disinctos , pauciq; ideo hactenus inuenti sunt inter om-  
 nium ætatum alicuius nominis poetas , qui , non dico  
 aptimè orarent , sed solutam orationem non omnino cõ-  
 temnendam conficerent : difficile est eum pluribus di-  
 stentum studijs non modo in omnibus , sed etiam in vno ,  
 & altero excellere . vna profecto quæq; ars totum ho-  
 minem occupat , neq; eundem faciliè patitur in diuersa  
 distrabi , curamq; , & cogitationem huc illuc diuidere .

quod sanè nosse possumus in duobus lingue latine luminibus M. Tullio Cicerone, & P. Virgilio Marone, quorum alter exceptis versibus ne literam quidem scriptam reliquit, alter vero per ocium interdum poeticā adornatus fuit. sed quàm bellè ei successerit præ illis studiis quæ illi erant propria, nemo nostrū non nouit. Proinde inter nos quoq; qui huc conuenimus, quendam esse scio ( simulq; Polum innuebat ) qui in omni scriptionis genere plurimum valet, cum tamen nullum vquam versum fecisse audio. at Flaminij noster quàm magnificè, quàm copiosè, atq; compositè videtur tibi Videri etiam oratoris munere perfunctum fuisse? Mihi ne, inquam? quem nihil tale expectantem accurata illa dicendi copia, atq; vbertate, tantoq; verborum, cursu quasi torrente penè perterruit, ac stupefecit, & nisi tam manifestò essent falsa, quæ dixit, eò me redegisset. loci, vt planè nescirem, quò me verterem. Si ille in solitudine, quam tantopere præsefert expetere, eductus fuisset, non in ea vrbe luce inter doctissimos optimis instructus artibus, atque virtutibus, nunquam ita obturasset, neque hercle hic mihi conflatus esset labor, cū ad ea, quibus non modo asperè, sed etiam atrociter, ac præfractè est infectatus rempub. mihi respondendi onus impositum sit. Verum tamen nobis, quibus Flaminij oratio visa est docti hominis, copiosi, atq; parati, non adeo mirum esse debet. habet enim ille non multò minus ab oratoribus, quàm à poetis. quauis etiā intueor poetas plerunq; in suis poematis virtutes oratorias persequi, et proximam esse cum oratoribus poe-



tarum cognationem ( de illis loquor , quibus summana  
 copiam, & dicendi facultatē est elargita natura ) poe-  
 tamq; oratori in multis ornandi generibus animaduerti  
 esse socium , & penē parem . atq; ideo visum est multis  
 Platonis scriptionem , tametsi absit à versu , magis poe-  
 ma habendum , quàm comicorum poetarum locutionem ,  
 quod paulo magis incitatus feratur , & crebris verbo-  
 rum luminibus , tanquā stellis quibusdam , semper gran-  
 dis orationem illustret . quo in genere Democritū quoq;  
 habitum fuisse audio . quandoquidem quanuis istae duae  
 facultates longē sint inter se distinctae , multa tamē exi-  
 stunt vtriq; communia , taliaq; , quae non parum inter  
 se mutuò adiutant . quod quidē experior in me ipse , nam  
 non defuerant , qui me quoq; in aliquem poetarum nu-  
 merum venisse crederent . Quasi vero , inquit Priullus ,  
 nunc primum norimus nos inter nos . vt contemptim  
 de te ipse ? perinde poetam dissimulas , ac si nunquam  
 poeticam attigeris , qui libros non parum multos ver-  
 sibus refersisti . atq; de ea ipsa arte poemā edidisti sanē  
 bene longulum , in quo praecepta tradis eius quicquid est  
 artificij , conatus adolescentulum à grammaticorum  
 sinu susceptum talem instruere , vt euaderet poeta om-  
 ni laude cumulatus , audioq; eum librum legi à multis ,  
 & in academijis ab adolescentibus memoriae mandari .

Iccirco iandudum mecum mirabar , quod omiſſis , vel  
 intermiſſis pristinis tuis studiis omnia alia ageres , atq;  
 ego quidem de hac re , quod vehementer optabam , nun-  
 quam te hactenus appellare ausus fui . Ego inquam ,  
 Priulle negare non possum posuisse multum temporis ,

& quasi

Et quasi etatem triuissse in illis studijs, quibus à puero  
 me totum dedidisssem, non tam, vt animo meo indul-  
 gerem, quod faciunt multi, quòd ve in illa facultate  
 aliquid posse mihi persuaderē, mihiq; placerem, quàm  
 vt aliorum voluntati morem gererem. Cum enim iam  
 adoleuisssem, relictis studijs illarum artium, quas qui  
 tenent, eruditi vocantur, me totum philosophis, tum  
 theologis tradideram erudiendum, grauissimisq; illis  
 studijs Romam adductus operam strenuē nauabam. ne-  
 scio quomodo à Leone decimo tunc pont. max. interpel-  
 latus fui, vt relictā, reiectaq; omni alia cura, ac stu-  
 dio periclitarer, quid efficere, quantumue progredi va-  
 lerem in exprimendis, & versu explicandis rebus diui-  
 nis, quæ pertinent ad Christi instituta, totamq; tam  
 augustā, religionis, ac sanctitatis rationem optimorū  
 poetarum figuris, atq; virtutibus Latine, quoad pos-  
 sem, ornareni. autumo quia fortasse legisset quosdam  
 meæ adolescentiæ lusus, versus inquam illos, quos olim  
 adolescens de re ludicra, sed non parum difficili, atque  
 inuoluta ( Scacchia vulgo vocant ) conscripseram,  
 nec non duos quoq; libros de Bombyce. erat enim pon-  
 tifex ille ex clarissima, atq; honestissima, vt neminem  
 vestrum præterit, Medyceorum Hetruscorum familia  
 omnium virtutum auctore, qui ad beneficentiam, ad  
 decus, & amplitudinem nati plusquàm homines, dijsq;  
 simillimi, dum artes, exercitationesq; virtutum in Ita-  
 lia vbiq; propagare, ac promouere studerent, nihil  
 prius habuerunt, quàm honestis præmijs optima inge-

nia elicere, atq; vel remotissimam queng; , & nihil ad se pertinentem , in quo esset ingenij, et virtutis indoles, liberalitate sua excitando in omni studiorum genere ad summam perfectionem ; ad excellentiamq; perducere, digni certe immortalitate viri . Non potui sanè tanti pontificis , tàmque de communi hominum societate bene meriti piæ voluntati non obtemperare, scripsiq; poetarum more de ipsius Christi rebus , & institutis libros v i . qui fortasse in aliquorum vestrum manus venire . conatus fui in illis , id , quod apprime Leo expetebat , verbis latinis explicare quædam sensa recondita expressu difficilia Hebræorum lingue propria , & à sermonis tum Romani , tum Græci maiestate admodum aliena, gravissimas inquam sententias parum verbis adhuc ornatas , quæ videbantur nulla unquam sermonis latini luce posse satis splendere, vt , si quis forte post me eadem præclarius illustrare cuperet , aliqua saltem à me impressa vestigia inueniret ; in quibus insistere posset , & sua ibidem altius imprimere . Sed cum diuina illa de Christi rebus à I I I I . viris conscripta historia non mihi omnem omnino occasionem sumministrasse visa esset opportune , & loco suo , atque ordine extra omnem nimis industrie suspicionem , ornandi ea , quæ sunt eius religionis propria , poetis nostris adhuc , si non placeat intacta , saltem inexpugnata , ea ipsa de causa Hymnida conscripsi . laudum inquam diuinarum librum , quibus vt po-

tui, pro imbecillitate humana profectus sum, deum quidem prius præpotentem trinis personis vnum, optimum, maximum, deinde etiam minores Cœlites, tanquam eius ciues, & administratos; imitatus in hoc scribendi genere diuersa tamen religionis ratione antiquissimos theologos Orpheum, Linum, Mercurium. Vides igitur Priulle me non ab re istæ studia dissimulasse. negaui me esse poetam, quod poetæ quæ canunt, scribuntque, ea suapte sponte, atque animi libera quadam oblectatione faciunt. ego vero ista, qualiacunque, iussus, ne dicam, coactus, scripsi rectiusque; fere Leonis decimi poemata, quam me dici possunt. tandem, restincto in me calore illo, sine quo negabat Democritus quengquam poetam magnum esse posse, serius quam voluissem ad me ipsum redij. meque; retuli ad pristina studia, quæ licet temporis seruiens intermisisssem, attamen ea semper animo retinueram. Flaminius vero noster extra hanc necessitatem positus, semper fuit suus, scripsitque; quæcunque ei collibuisse, nullius obnoxius imperio, verè poetæ nomine dignus. iccirco animaduertere potuistis in illa tam longa, multumque; litigiosa reipub. accusatione quam incitatus ferretur, quam grandis, valensque; assurgeret, quam creber luminibus quibusdam ornaret orationem, vt ambigas, oratorem ne rectius, an poetam dicas. ego verò cum vtracunque velis manu æquè aptum, potentemque; , ac paratum etiam plusquàm vellem experior. Non ignorat

Vida, inquit Flaminius nihil hic planè fuisse ijs opus, quæ nunc perleui arrepta occasione extra causam memorat. verum ea verborum tenuis duntaxat, nihil ex animi sententia, intimòue sensu loquitur. interim nimirum comperendinando se colligit, & quantuluncunque potest spatij ad cogitandum, commentandumq; sumit. quod equidem haud molestè fero, vt eum postea cum maiore reipub., de qua quærimus, prouentu, audiamus. Tum Polus, qui itidem quoq; tacitus animaduertat, cum sit mitissimi sensus, animiq; lenissimi, & omnibus mortalibus consultum esse cupiat incredibili beneuolentiæ charitate humano generi deuinctus, sui vsquequaque memor, sui semper persimilis, vt ipse quoque ampliaret, Nunquam possem satis inquit laudare beneficentissimi pontificis illius tam sapiens consilium in istiusmodi re prouidenda Christianis hominibus non modo decora, sed etiam salutari. vix exprimere valeam, quanto stomacho audire, aut legere soleo, Christiani hominis poemata, in quibus vbiq; Ioues, Veneres, Saturnos, Castores, Polluces, & id genus nugas auribus meis inculcant, præter sabellas, & molliculas, plenasq; libidinum, & titillationum omnis generis narrationes. tu quoque Vida visus es mihi aliquandiu via communi ingredi, cùm adhuc adolescens illos ipsos tuos lusus iuueniles, quos modò aiebas, amicis legendos dares, insuper & bucolica, multique alia carmina ad mores pertinentia dulcia quidem, & illa, quam tantopere vos poetæ

affectedis, suauitate, quadam inquam, vt ita nomen, stili lætitia, diffluentia. quàm metui, ne ingenium tuum in illiusmodi ludicris exercitationibus consenesceret: in illis tamen, quod minus è religione videatur, nihil vnquam offendi, nihil planè, quod non sit Socratis auribus, aut sanctitate dignum. postea verò quàm incidi in ea, quæ è Christi disciplina scripsisti, intellexi, quo deinde ad hæc feria te homine Christiano, præsertim sacerdote, digna, explicanda exercitatio accederes, atque limatior, prius in illis iocularibus te aliquandiu exercuisse, tanquam in sumpta Thesi, imitatum nouos, rudesq; medicos, aut tonsores, qui antequam in frequentioribus municipijs medicinam, aut tonsionam faciant, ruri, aut in desertissimis oppidulis arti suæ se quisque assuefaciunt, & quid valeant, prius in corporibus rusticanorum hominum, quorum non tanta est iactura, periclitantur discentes eorum periculo. Ad hæc Ceruinus eodem consilio, inquit, olim doctissimi sanctissimiq; viri Basilidius, & Gregorius Nazianzenus itidem factitarunt apud Græcos, quod tu Vida apud Latinos. vt enim auocarent adolescentes, & ociosos homines ab Homero, cæterorumq; Græcorum fabulis, & commentis, confecerunt ipsi poemata ad Christi disciplinam, quorum lectione se quisque oblectare posset, Alterius ego adhuc extantia non nulla legi, quæ band ita probantur, vt vellem, ab ijs, qui Græcè

luculenter sciunt, cum auctor cateroqui doctus es-  
 set. Vix ille loquendi finem fecerat, Cum Montius  
 me intuens, Ad rem tandem, inquit, Vida. mit-  
 tamus, si placet, de nihilo natam historiam, atq;  
 ad institutam disputationem redeamus.



M. HIER. VIDAE  
DE DIGNITATE REIPUBLICAE  
SEV CIVILIS SOCIETATIS AD  
REGINALDVM POLVM CARDINALEM:

LIBER II.



V N C. ego tacitus intuens Flami-  
nium, & caput leuiter quatiens,  
quasiq; abnutans, non tristis planè  
tamen, sed propior hilari, ac sub-  
ridenti. Itane Flamini inquam? An  
verò serio? Quid tu hominis es?  
Siccine eloquentia, et literis abuteris? dii uestram fidẽ.  
Itan prorsus oblitus es, tui; vt ad istam vitam nos in-  
uites, aut potius obtrudas? si ista ex animo loqueris,  
equidem cupio tibi a dijs immortalibus mentem melio-  
rem dari, qui accusatorie inter nos agens rēpub. & ho-  
minum coniunctionem, ex qua vna re cœlestium quasi  
vitam adepti sumus, indignis acceptam modis adeo ex-  
ornatam, atq; depexam dedisti, ciuilemq; communita-  
tem, qua nihil magis opportunum, magisq; ex vfu  
aut potius necessarium datum est humano generi a tu-  
re ipsius munere, adeo oratione vexasti, adeo rap-  
tasti, atq; coram tam grauib; viris, in tam augusto  
cœtu ea ausus fuisti enuntiare, quæ non à philosopho

confutanda essent, sed potius à censore religionum reprimenda. Tun' audes istum in modum vitæ parentem incescere, sibilisq; conscindere, eamq; pro ridiculo, ac delectamento putare, & te tam nefario parricidio conscelerare tam impie ingratus? Quid porro boni tu habes, quod non habeas ab ea, aduersus quam tam atrociter fulminas? id sanè est hominis in literis intemperantis, nimium confidentis sibi, & abutentis ingenio ad ostentationem. tota planè aberras via totus in phisicis alienus. Non tu te inquam cohibes? non tu te respicis? Non ne sentiebas, cum ea diceres, alioqui doctus homo contra sensus, & perspicuitatē, contraq; omnium gentium consensum disputare? miror pudorem tuum, quo te semper probavi, passum fuisse te tam diu in ea calumnia versari, neq; erubuisse te audita quasi voce naturæ, quæ tibi me tacente contradicebat, cum eas tragœdias declamares tonans, ac fulgens contra deprauatos hominum mores, in quo tuæ diu frustra se ista uitavit oratio. Quasi vero nos corruptelas defendamus, quis quid attinet toties inculcare? Næ tunc magnifice putabas rem geri, & ex sententia, cum Solem ipsum omnia videntem, Omnia collustrantem interpellabas, contestabarisq;. Miror quod itidem non cetera cœli sidera, tam quæ fixa sunt, quàm ea, quæ errare videntur, testatus fueris, neq; imploraueris omnes deos tam superos, quàm inferos, tam maximos, quàm infimos, & medioximos, illum præsertim, qui templâ cœli summa sonitu concutit, neq; aduocaris ciues,

nes, & populares omnis, aduenas, & peregrinos,  
 neq; item clamaueris. O' coelum, o' terra, o' maria  
 Neptuni. & Orcum ipsum, ac Plutonem non appella-  
 ueris. quæ per deum immanitas illa verborum? quæ  
 atrocitas? vel cum laudares discriptionem, dispersio-  
 nemq; humani generis, cum mortales in montibus, &  
 siluis nullis moribus viuerent, vitamq; illam non mo-  
 dō rudem, agrestem, atq; horridam, verum etiam osci-  
 tantem, languentem, & dormitantem tanta verborum  
 effusione in coelum tolleres? in qua re visus es mihi plus  
 æquo tibi indulgere identidem quædam dulcia dictu in-  
 culcans, quæ sunt ambrosia, & nectar poetarum, ma-  
 gis poetam, quàm philosophum, aut oratorem decen-  
 tia. Expectabam ideo, vt nobilissimi poetæ versus  
 quoq; de vita rustica tanquam testes tuæ sententiæ, &  
 suffragatores citares.

Rura mihi, & rigui placeant in vallibus amnes.

Flumina amem, siluasq; inglorius, o' vbi campi,

Sperchiusq;, & virginibus bacchata lacenis

Taygeta. Rursus paulo post

O' qui me gelidis in vallibus Hæmi

Sistat, & ingenti ramorum protegat vmbra.

Quædam scilicet fessi animi, & ocium summè expe-  
 tentis à publicis negocijs, atq; laboribus laxamenta,  
 magis dictu, aut lectu iucunda, quàm quæ sint ex ali-  
 quo vsu, cuiusmodi quoq; illa cantio apud Flaccum.

Beatus ille, qui procul negocijs,

Vt prisca gens mortalium.

Paterna rura bobus exercet suis.

& quæ sequun

tur, plurimâq; aliorum alia. Talia cum diceres, nos, qui te audiebamus, animaduertebamus nihil tibi planè deesse præterquàm causam, Cane tu potius istac feris & belluis, non hominum generi, cui natura comparatum est societate delectari, & in communiione viuere.

Non ignoro equidem Socraticam esse consuetudinem contra alterius quancunq; vls opinionem differendi, Gorgiamq; Sophistam locos communes inuenisse, quibus possint facillè omnia vel laudari, vel vituperari. parcius tamen, ac restrictius agere poteras, eaq; tibi erant tangenda duntaxat ad dialecticorum consuetudinem, qui veri, & falsi dijudicandi scientiam habent, cum præsertim coram doctis iudicibus mecum tibi esset res. Verum quæ præteruolare poteras, subtili, & compendiosa disputatione, maluisti dilatare fuso latius ad rhetorum disciplinam sermone, & vbi tibi videbaris posse oratione volitare, velis, remisq; nō pepercisti, vt mihi per oppressionem causam eriperes. Quid si ego quoq; aduersus te clamem, omniumq; mortalium, popularium, & peregrinorum postulem, orem, obsecrem, plorem, atq; implorem fidem? verum agam tecum simplicius, cum non desit mihi copia rationū, quibus te cogere queam. Vix dicere possem quàm nunc memet mei poeniteat, qui eo redactus sum, vt mihi opus sit argumentis probare Solē lucere, calere ignē, niuē esse albam, & id genus alia, quæ sunt per se perspicua, quæuē sensu nemo non percipit, atq; necesse sit respondere contortis quibusdam rationibus tuis, & fallacibus argumentis, quæ sophistarum more, tanquam bamos

quosdam, aut laqueos, in tota oratione insidias collocans innexuisti. metuo namq; ne rem minimè dubiam, argumentando dubiam faciam, atque incertam, cum saepe audierim, sicut fidem, perspicuitatem quoq; argumentatione eleuari. Si ego nunc tecum verba ad cōpendium conferens more dialecticorum agere velim, à quibus oratio breuiter ratione concluditur, perfacilis, perq; expedita defensio foret, essetq; confectum statim negotium. est enim eorum ars contracta, atq; astricta quasi eloquentia. Si te coepero interrogare de ijs, quæ tantopere, tantaq; molitione pronuntiasti in singulis insistens, vt de ipso te intelligam, quid abnuas, quid concedas, potero facile ex te, vt ille ait, verum exculpere, vt te met ipse statim mihi vinctum dedas, quod equidem adducor, vt faciam, vt ad ea, quæ mihi dicenda sunt, de tota reipub. ratione actutum accedere liceat. Tunc Montius, qui nobis laborantibus, quandiu poterat ipse quiescere & animo suo morem gerere cogitabat. Nisi aliter, inquit collegis meis, et huic Priullo videtur, mihi certe dialecticorum mos differendi minus probatur. quorum est subtile quidem, sed exile, & spinosum dicendi genus, vt vix intelligantur, quæ ab eis squalidius dicuntur, vsq; adeo concisa sunt argumentorum contortione, ita compressa, & inuoluta, vt videar mihi, cum eos audio, aut lego, per scrupulosas cotes nauigare. nimirum saepe iniiciunt laqueos, vt captionibus irretiant ingenia adolescentium, & persaepe veniendum est ad sorites breuib; & acutulis quibusdam conclusiunculis, lubricum, & periculosum

sanè differendi genus, quod nullam audienti, aut legen-  
 ti affert delectationem, & sepe falsis assentiri cogi-  
 mur. latior mihi, lucidiorq; semper placuit argumen-  
 tandi ratio, quam rhetores sequuntur. qui sicut minus  
 acutè, ita minus abscondite loquentes quodam modo  
 dilatant, atq; res fusè, & copiosè explicant, & om-  
 nia quibusdam quasi luminibus, sententijs, & verbis  
 illustant. Aequum est præterea te Vida eorū armo-  
 rum genere, quibus te Flaminius appetijt, eum repel-  
 lere, atq; si vales, conficere, vt sit par pugna, æquaq;  
 colluctatio, neq; verendum est, ne hora nos interpellat,  
 cum adhuc multum spatij ad vesperum supersit, etiam  
 nunc scandente Sole, totaq; dies sit nostra, quam huic  
 disputationi omnem dicaimus. Censeo itidem as-  
 sentiente etiam Polo Ceruinus, inquit. dices nihilò se-  
 cius inter respondendum, interq; refellendum, ea, quæ  
 tibi iandudum dicenda erant, ni Flaminiij interuentu,  
 interkursuq; impeditus fuisses, sublata interdum ver-  
 borum contentione, docentis magis similis, quam repu-  
 gnantis, neq; hanc prorsus orationem tibi contra eum  
 suscipiendam arbitror. tunc ego. sustinebo igitur duas  
 personas, qui vix vnā ferre valeo, quando ita vul-  
 tis, minuamq;, quantum potero, contentionem. per-  
 sequar inquam ea, quæ erant propria huius disputatio-  
 nis, & quod modo exorsus fui, prætexam, & totam  
 rem explicabo, atq; interdum occurram Flaminiij sat-  
 iacis, quoties mihi se offeret occasio imitatus impigrū  
 gladiatorem in arena pugnātem, qui aduersus inimi-  
 cum vsquequaq; dextrouorsa icit manu. Si tamen

sibi ex usu fore conspicatus sit, eadem manu sinistrorsum flexa ictum retorquet, atq; aut ferit, aut cauet, et imminentem sibi plagam reijcit, atq; refutat. Agam itaq; tecum Flamini potius, vt volunt nostri heroes, fusa, & fluente oratione, quàm illa contorta, acri, atq; vibrante, magis tamen orator ex academiæ spatij, quàm ex rhetorum officinjs, neq; tam tecum pugnabo, quàm aperiam quid sentiam de tota re, quæ est in manibus. Porro tuæ argumentationes me leuiter tangunt, qui vis rem ad glandes, ad casus, aut potius ad cauernas, ferarum lustra, & volutabra redire; namq; tuâ omnem disputationem, tanq; longam orationem paucis conficere ualerem, prosternere, atq; obterere, & tota causa dici posset, ac perorari duobus, aut tribus verbis. quandoquidem, quæ ego pono, atq; ea, quæ tu impugnas, non eadem sunt omnino, sed longè inter se abiuncta, atq; diuersa, & prorsus alia. Ego rempub. ciuitatemq; defendo. contra tu foedissimam tyrannidem, & improborum dominatum probris insectaris, res oppido, à sese mutuo distantes, et dispartitas. igitur mihi nulla tecum est controuersia, nulla certatio. Quod tu oratione plena stomachi detestaris, neq; mihi illud perplacet. Vide quantum à scopo aberraris. Laudo ego veræ, & solidæ reipub. diuinitatem, et perfectionem. tu contra in ciuitatis corruptæ, debilitatæ, decurtatæ, affectæ, afflictæ, morientis, planèque iam mortuæ simulacrum, & vmbra inane inueheris. de homine viuo, atq; vigente, et omni genere laudis præcellente à me queritur. tu affers proiectum, & planè



mortuum corpus, rancidumq; cadauer, de quo mihi cō-  
 tradicas. an tibi videntur concinere respub. atq; tyrann-  
 nis? vide quā nimis multa profuderis nulla de causa,  
 quā frustra tantopere laboraueris. si ego vellem, to-  
 tius huius, quæ mihi tecum est, controuersia hic ter-  
 minus adesset, causaq; dicta me salua existimatione ex  
 hac turba nullo negotio expedire possem. nihil planè  
 aduersus rempub. nihil contra ciuitatem perorasti. Sed  
 contra confusionem quandam, contra sceleratorum ho-  
 minum factionem, & consspirationem, contra scelera,  
 & latrocinia cuiusdam conflatæ, coeuntisq; multitudi-  
 nis, contra omnino aliud, atq; ego proposueram, de-  
 clamasti, & seculum nostrum hominum vitijs, & fla-  
 gitijs commemoratis nobilitasti. nihil hercle prorsus  
 dixisti. Ego regem iustum, ac bene moratum posco. tu  
 in medium affers teterrimum tyrannum, ad quem per-  
 tinet illa sententia. Si violandum est ius, & quod se-  
 quitur, ab Euripide Etheocli sceleratissimo, vt perso-  
 na seruiret attributa. talis nanq; rex datam sibi ad sa-  
 lutem, & ad conseruationem ciuium potestatem, ad bo-  
 norum pestem, perniciemq; conuertit. porrò quid atti-  
 net toties deprauatos esse mores inculcare? Si prius in-  
 ter nos conuenisset, quid sit respub. tua neutiquam adeo  
 vagata esset, neq; tam latè hac illac fluctuasset oratio.  
 ecquem tam amentem existere arbitraris, qui approbet  
 vitiosas respub. aut verius tyrannidas, de qua re vr-  
 ges identidem, & mordicus pugnas. Vt igitur, quæ  
 ambo dicimus, concinant, constetq; inter nos, quid sit  
 res, de qua loquimur, neue confuse agamus, quæso te

bona venia liceat mihi te saltem de hoc percunctari. quæ res huic voci subiecta sit. Prius id nomen quam vum habeat, tibi est aperiendum breui quadam, & circumscripta explicatione, id quod positum in Phædro à Platone probat vehementer Epicurus, affirmatq; in omni disputatione fieri oportere. Sic enim quod inuolutum esse videtur, euoluitur, atq; dilucidè explicatur. Ad ea Flaminius. Quando me, inquit rogas, Scio variè à philosophis rempub. definiri. Plato siquidem dixit esse vitam ciuitatis. eam Aristoteles apertius explicat inquiring, esse eorum, qui viuunt in ciuitate rectam quandam institutionem. alibi autem latius, ac luculentius declarauit. esse institutionem ciuitatis circa magistratus omnis in ea ordinandos, præsertim circa primū, ad quem spectat omnes alios summa auctoritate, & potestate instituere. Alij vero alijs verbis idem ferè innuunt dicentes rempub. esse rem populi. cum rem dicūt, summam ego intelligo, vt rei vniuersa vis & genere, & proprietate quadam enucleatè declaretur. neq; puto hic quicquàm eorum, quæ ponenda erant, deesse, neq; quicquam superfluere, aut redundare. Bene habet, inquam, nunc video tandem incipis te dare in viam, qua ad id, quo volumus, peruenitur. ita enim spero consistare posse id, quod venit in disceptationem. hanc verò breuiem, & circumscriptam explicationem video cōuenire omnibus reipub. formis, siue ab vno rege, siue à principibus ciuitatis, siue ab vniuerso populo geratur. neq; enim rectiones huiusmodi inter se genere, sed forma tantum, & specie differre dignoscuntur. Hoc iacto

disputationis nostræ fundamento, inchoata adhuc tantum est reipub. species, existitq; in animis nostris adûbrata eius cognitio. nondum absoluta, atq; perfecta. nā vtracunq; harum definitionum, quas vltimo loco dixisti, tibi probetur, eius partes adhuc tamen restant explicandæ. Conuenit sanè rempub. esse rem ciuitatis, aut populi. nam primam fuisse, vt tu quoq; memorasti ab Aristotele introductam noui, alterius autem auctorem extitisse accepi P. Scipionem Africanum apud Ciceronem in libris, quos reliquisse scriptos de hac ipsa re ipse testatur. nihil planè inter se differre, sed vnā eandemq; omnino esse intelligo. Oportet tamen à nobis lucidè, ac perspicuè declarari, quid sit populus, quidue ciuitas, ex qua populus omnis. secus adhuc versaremur in tenebris, atq; hallucinari possemus. Porro ego colligo ex verbis Aristotelis ciuitatem non esse omnem hominum coeuntium multitudinem, sed eam duntaxat, quæ congregata est ad benè, beatèque degendam vitam, vt etiam Africanum populum definisse audio, non omnem cœtum, sed illum tantum, qui iuris consensu, & vtilitatis communione est sociatus. Vides igitur ex ciuitatis, aut populi, idem enim sunt, breuī descriptione in repub. existere quandam vtilitatū communicationem inter eos, qui coniuncti, congregatiq; viuunt. neq; tamen propter omnem vtilitatem sit huiusmodi conciliatio, neq; solum vitæ ipsius causa, vt scilicet homines hac coniunctione vitam degere possint. parum enim in hoc à cæteris animantibus, quæ societate gaudent, differret hominum genus. nam & illa quoq;

quoque inter se multa communicant eorum, quæ attinent ad vitam producendam, atque tuendam. nempe nullum animal præter hominem est felicitatis capax, quem finem, et extremum esse ciuilis societatis omnes cordati philosophi ponunt, quod est non tantum viuere, sed etiam bene viuere, ad quod communicatio vitæ. et publice, et priuatim plurimum confert. communicamus enim inter nos actiones, quæ proficiuntur ab honestate, id est à perfecta virtute, quæ circa vsum, et exercitationem versatur, quam prudentiam appellamus, locatam in delectu bonorum, et malorum, semper cum iustitia coniuncta; sine qua nulla esse potest communis utilitas, quod quidem existit illud optimum bonum, quod rempub. gerentibus proponitur, tanquam extremum, et summum. Ut enim gubernator propositum habet finem, ad quem tendit, cursum secundum; medicus salutem, imperator victoriam, ita moderatori reipub. beata ciuium vita proponi debet, ut opibus, copiisque; et gloria ampla sit, atque virtute honesta. Porro ciuitatis naturam Aristoteles conclusit, et enucleatè expressit finem eiusmodi congregationis, ciuilisque societatis includendo, ut scilicet ciues bene, beateque uiuant, in quo quidem inest vis, atque sententia iusti, ac iuris colendi, sine quo nulla humana societas queat existere diuturna, cuius rei gratia dixit omnem eam institutionem pertinere ad magistratus ordinandos, quorum opera ius in ciuitate retinetur. omnis namque respub. instituitur ciuitatis ordinandæ causa, ex quo ordine omnis prouenit ciuium quies, pax, et tranquillitas. sine ci-

alium enim concordia, ex qua fit quies, & pax, in ciuitate nunquam bene, & beatè viui potest, qui, vt diximus, est ciuilis consociationis finis, concordia profectò nulla erit vnquam in ea cōgregatione, in qua ius, & equitas non colantur, ea que ciuitas nullo loco est habenda, neq; rectè eo nomine vocari potest, in qua illa virtus non regnet, que constat ex hominibus tuendis, idest ex societate generis humani cōseruanda, quā quidem iustitiam vocamus, ad quam nati sumus, & ex qua vna virtute viri boni nominamur, cū sit fundamentum totius boni, pulchri, atq; decori, sed etiam sine ea nulla humana societas existere valeat. sunt namque ea duo inter se vsque adeo coniuncta, ac coniugata, vt natura reciprocentur, & alterum sine altero esse nequeat. Sicut enim, nisi sit iustitia, non potest consistere humana societas, ita iustitia nō possit esse interris sine hominum societate. siquidem homines alius alio participando, communicandoq; inter omnes, iusti natura fiunt, vt postea latius dicetur. Hinc Herodotus prudens rerum scriptor ait fruendæ iustitiæ causa olim reges constitutos, id est respublicas adinuentas fuisse, quarum gubernationem initio omnium penes reges fuisse, & ipse, & alij luculentissimi scriptores literis prodiderunt, vt apud Medos, Persas, Aegyptios, Mycenæos, Argiuos, Bactrianos, Armenios. Nimirum eius virtutis tanta vis est, vt etiam qui maleficio viuunt, baud consistere possint sine aliqua iustitiæ particula. omnis namq; eorum coitio dissoluatur, nisi in dispartienda præda equalitas seruetur, et cuiq; tribua-

ear pro dignitate. vsq; adeò in omni congregatione re-  
 quiratur iustitia, quæ esse non potest, nisi inter eos, qui  
 congregati sunt, æquo iure viuatur. quod ex Platonis  
 repub. planè intelligere possumus. ambigere enim vi-  
 detur ipse philosophus, aut qui de eius scriptis iudicât,  
 vtrum nomen, ac titulus ei libro potius congruat, de  
 repub. ne, an de iusto, atque idèò, ne erratum esset,  
 vtrunque inscriptum fuit. igitur in definienda ciuitate,  
 nisi vis iusti, iurisq; exprimatur, non includitur ciui-  
 lis societatis finis, quæ est communis vtilitas, quod  
 per se est optimum bonum. Planus, explicatiusq; egit  
 Africanus in populo describendo, aduertens non esse  
 omnem coctum multitudinis, sed tantum eum, qui est  
 iuris consensu. & vtilitatum communicatione sociatus. sa-  
 nè complexus est & finem ciuili coniuñctionis, & id  
 cuius ope, atq; præsidij peruenitur ad finem. hinc col-  
 ligimus esse tunc rem populi, cum bene, iusteq; gert-  
 tur siue ab vno, siue à paucis, siue ab vniuerso popu-  
 lo. Itaq; respub. siue sit institutio ciuitatis, siue res  
 populi, vt Africano placuit, nisi iuste gubernetur, non  
 habenda est, neq; respub. neq; ciuitas, neq; populus.  
 quod etiam dictum volo de quamlibet amplissima pro-  
 uincia, aut regno, quod constet ex pluribus ciuitati-  
 bus. est nempe eadem ratio. Vt enim colligitur ciuita-  
 tem esse communicationem quandam vtilitatum inter  
 ciues, vt rectè inter eos viuatur, & cum virtute, ex  
 qua sit felicitas, quæ est opus animi ab ipsa virtute  
 proficiscens, ita quoq; regnum multarum vrbium in-  
 telligi potest, nihilq; discriminis existere inter ciuita-



tem, & gentem, vel, vt nunc loquuntur, regnum, nisi quod in gente, aut regno est maior multitudo nobilium, & clarissimorum virorum conuiuentium recte, & honeste, & ad virtutē. est namq; ciuitas pars gentis, aut regni. quippe prius domus sit ex pluribus hominibus, ex pluribus domibus, seu familijs sit vicus. ex multis vicis conflatur ciuitas, deniq; gens, seu regnum constituitur ex multis ciuitatibus legum communione vtentibus. Idem sane finis, qui est propositus ciuitati, debet esse etiam toti genti. nec tantum vni prouinciae, sed vniuerso hominum generi, si in vnā ciuitatem, aut prouinciam possint conuenire omnes homines, & vtilitates ciuile coniunctionis inter se communicare. Etenim & quilibet ciuis, & ciuitas, & gens omnis omnia referre debent ad virtutem, & ex ea agere, reipub. q; moderatorem eniti par est, atq; animum intendere, vt tam singuli ciues, quam tota ciuitas, aut gens vniuersa in laude viuant, atq; virtute, cuius bono omnes in tranquillitate positi sint felices. felicitatē vero consequi non valet qui non omnia ē virtute agit, ex qua oritur honestum illud, ad quod, tanquam ad signum, omnis rerum publicarum rectio, sicut ceterae quoq; actiones, maxime vero haec, est dirigenda. nihil autem honestum esse potest, nisi septum sit, ac stipatū omnium praeclarissimarum virtutum corona, in qua oportet eminere, atq; vt inquit Plato, praefulgere ipsam iustitiam, propter quam humana societas, respub. & ciuitas, omnesq; communitates inductae fuerunt. In illis vero hominum cœtibus, in quibus, ea quae dixi,



non inueniuntur, nulla existere potest respub. neque illæ ciuitates sunt habende. Potes denique Flamini intelligere ex his, quæ hætenus à me dicta sunt, inuectus ne fueris in rempub. an in quampiam aliam hominum con-sociationem, coitionemue ab hac, de qua querimus, longè seiunctam, in quo quidem errore tua diutius versata est, atque vagata oratio, et pro repub. longis spatijs insecutus fuisti eius umbrā quādam, et vanam effigiem, cum qua dimicares. ut apud Homerum Diomedes ratus sibi esse certamen cum Aenea, eumque se persequi, atque urgere, tandem respiscens sensit sibi rem esse cum inani imagine. poteras tute quidem agnoscere, an ea congregatio, de qua loquebaris nomen reipub. mereretur, ex sine ipso, qui proponitur, quouē omnium rerum, quæ ab arte, et ab hominum industria proficiuntur, natura, et vis apprimè cognoscitur. Poteras inquā ex Africani sententia liquidius inspicere, an illa, quam memorabas, esset res populi, et an ille populus. Hic Priullus. nollem inquit Videri interrumpere continentem orationem tuam. verum tamen hic, si liceret, te libenter interpellarem, ne quis in animo meo scrupus resideat. Licet, inquā, veteris academæ lege.

Quid est eorum, quæ hætenus à me dicta sunt, quod te animi torquet? At ille memorasti tu quidem, inquit, initio homines in montibus, et siluis palantes, ac dissipatos se oppidis, mœnibusque sepsisse coeuntes, ut ea societate coniuncti, ac conculti, virtutis amore inducti vitam beatam agerent, quem finem humanæ con-sociationis existere plurimis verbis disputasti. Omitto

à nostris, qui Christi sequuntur instituta, istis omnino  
 repugnari. nam video hanc à te disputationem institu-  
 tam magis ad placita antiquorum philosophorum, &  
 sententias respiciendo, quàm ad Christianæ veritatis  
 rationem. Plato ipse quem philosophorum quædam ve-  
 luti deum vos philosophi suspicitis, ac colitis, fatetur  
 nullos, paucissimis exceptis, beatos existere; ne dicā,  
 esse posse, dum corpori, tanquam saxo ostrea, alliga-  
 ti tenentur. quæ igitur beatitudo, aut felicitas spera-  
 ti potest ab illis, qui tot numero in communione vi-  
 uunt? censes ne edificandas tanta molitione, tantorūq;  
 operum impensis amplissimas vrbes, ut in eis ex tot  
 millibus ciuium communi iure sociatorum vnus fortasse  
 aliquando, aut plurimum duo felicitatem, quæ est ve-  
 rum humanarum finis, consequantur? Præterea quis  
 credat rudes illos primos homines ex vltima antiquita-  
 te ignauos, deditos ventri, ac somno, indoctos, incul-  
 tos, literarum, & bonarum artium insolentes, quorū  
 vitam, mortemq; iuxta existimandam duco, ex agre-  
 sti illa, immaniq; consuetudine, virtutis speciem, &  
 pulchritudinem cognitam habuisse, eamq; tanti fecisse,  
 ut in hanc communionem vitæ honesti causa concordēs  
 conuenerint, se seq; legum vinculis colligandos, con-  
 stringendosq; sua sponte tradiderint, atq; alienæ se effe-  
 cerint potestatis? videtur potius eos necessitate aliqua  
 adactos fuisse, & alijs planè causis impulsos magis ad  
 corporis, vitæq; præsentis commoditates, quas ada-  
 mabant, pertinentibus, quàm ad animi bona, quorum  
 penes eos nulla electio esse poterat, cum talia, nondum

existente philosophia, penitus ignorarent. Postremo ciuitatem definis, perinde ac si quippiam sit artificiosum, atqui semper equidem audiui, & apud principes philosophos legi huiusmodi hominum conciliationem natura ipsa suadente, atque occulta, ex tacita quadam vi perpetua, & aeterna cogente existere. Tunc ego, ad hoc ultimum, inquam, quæ fuit tui scrupuli tertia questio, ut præposterè respondeam, est expedita, facilisque responsio, quandoquidem quæcumque ex arte, & hominum cura, atque industria efficiuntur, cognoscuntur planè ex fine, & bono, ad quod constituta sunt. licet vero nati sumus ad societatem, ad quam naturali quodam animi impulsu vebementi, & affectione rapimur, tamen cum ciuitas ipsa non instituitur, aut perficitur absque hominum opera, atque industria, ab arte quodam modo proficisci videtur. ideo ex fine, & bono, quod est ipsum iustum, & ab Aristotele, & ab Africano definita fuerunt & ciuitas, & populus. Causam vero constituende ciuitatis, quæ fuit altera dubitatio, fuisse hominibus, ut bonè, beateque, idest honestè, & cum virtute viuerent, nemo, qui rectis utitur sensibus, ibi inficias. id omnes planè cordati philosophi fatentur. non negarim alias quoque causas permultas ad hos coetus, & societates conciliandas confluxisse, quod & Aristoteles, & alij philosophi quoque concedunt. si quidem communio loci unâ uiuentibus maximum affert delectationem. homo enim hominem natura diligit, ac gaudet iucundissima uitæ societate, neque vltius rei potest cuiquam esse diu iucunda possessio sine socio, cuius fide, officio,

ac diligentia iuuari queat. ipsum vero simul uiuere, per se multarum commoditatum causa existit, cum sibi mutuo ciues deferuire, prodesse, & subuenire valeant, tutiusq; ideo uiuant. atq; ita propter officiorum communionem homines multitudine congregati commodius uiuunt, multoq; melius tueri se valent contra validiorum vim, ferarumq; incursus, quam dispersi. nā communi malo salutem quærentes sua consilia in mediū conferunt, periculisq; communibus, communicatis opibus, obuiam eunt. Proinde causam quoq; civili consociationi attulisse potuit, cum sanguinis cōmunicatio per mutua connubia tum rerum permutandarum, & quauis alia ratione contrahendarum commoditas. bona quidem hæc omnia existunt, & perquam oppidō vsui sunt hominū generi, quæ ex civili coniunctione proueniunt, & ad ea illi fortasse respexere, qui primi hanc societate inierunt, non tamen ut ad extremum, & vltimum bonū, quod quidem quid aliud esse potuit, quam ut bene, & beatè viueretur, idest ipsa beatitas, quæ esse non potest, nisi in vita honestissima, atq; electissima? constat autem ex eis actionibus, quæ sunt virtuti, ex qua id, quod dicimus honestum oritur, consentaneæ. Potissimum igitur propter vitæ honestatem, quæ est ipsa virtus, aut quicquid virtute geritur, tanquam propter eam rem; in qua re completur illud extremum, atque excellens, perfectum, & absolutum bonum, constituta fuit primum ciuitas, ut, inquā homines agerent vitam consentientem, respondentemq; virtutibus, honestam, constantem, & naturæ congruentem, ut vtilitas

litas secuta sit ciuilem societatem, non societas vtilitatem. Inter autem omnes virtutes diximus nullam esse illustriorem, nec quæ latius diffundatur, ipsa iustitia, quæ est aliarum domina, & regina, constatq; ex hominibus tuendis, idest ex societate generis humani, dum communi vtilitate conseruata, suum cuiq; tribuit pro dignitate. quod haud facile fieri potest, nisi in congregatione, & coetu ciuili, vbi culpæ poena, atq; animaduersio, quæ est animi medicina, certa constituitur. in quacunq; ciuitate hæc virtus omnia moderatur, eam beatam putant. Raros autem esse beatos, vt obiter ad tertiam questionem, quæ tuo ordine erat prima, respondeam. erant enim duo illa coniuncta, quæ dubitabas, alterumq; pendebat ab altero, quod post pollutum, corruptumq; humani generis semen ob principis hominis omnium hominum parentis insignem aduersus deum fraudem, atq; perfidiã rari iustitiæ omnes numeros impleant, paucissimiq; inueniantur, quibus nihil desit eorum, quæ ad moralem, vt ita dicam, felicitatem perficiendam requiruntur. nam de ea felicitate more philosophorum loquor, quæ in hac mortali uita haberi potest. de alterius verò vite, immortalis, perpetuæ, ac sempiternæ absolutissima felicitate, de qua differunt theologi, alio loco à nobis agendum erit luculentius, locis manibus, & nudo ab operimento capite, lustratisq; animi sensibus. Licet igitur in communionem viuientes non omnes felices, aut beati planè existant, spe tamen felicitatis, ac beatitudinis consequendæ ( de probis, & honestis ciuibus loquor ) in laude viuunt, & virtute,

paucioraq; illis defunt, quàm improbis, & flagitiosis.  
Satis autem feliciter, pingui minerva agens ego illos  
in repub. viuere statuo, qui omnibus detractis vitijs,  
cumulati omni laude neq; alios afficiunt inturia, neq;  
ab alijs leduntur, quorum alterum quidem homini fru-  
gi non omnino difficile, alterum verò est difficillimum,  
nisi sint omnes boni, possintq; a quo iure viuere in ea  
ciuitate, in qua ius, lex, & fas sunt potentissima. Nec  
vero dubitandum est, quin illi primi homines, quan-  
tum uis, rudes atq; agrestes virtutis vim præsenserint,  
aliquamue prænotionem habuerint, licet subobscuram,  
& adumbratam. honestum enim, & decorum etiā pue-  
rorum animos natura, & specie commouet, quod per  
se sit pulchrum, & laudabile, licet illis nondum nobili-  
tatum, aut illustratum, à nulloq; laudatum, ipsum sua  
luce, & splendore præfulgens. His Priulle tibi à  
me satis responsum esse arbitror ad ea, quæ rogasti. nisi  
quid vis ad hæc, ad Flaminium reuertar, ut eius oppu-  
gnationi resistere pergam. Per me ut libet, inquit,  
ego sanè nihil amplius moror. Vides igitur Flami-  
ni nullam mihi tecum esse controuersiam. Ego profe-  
ctò loquor de matrona stolata, atq; honesta, tu contra  
de scorto, & turpissima supra verba facis. ego posco  
hominē, tu affers umbrā: nempe cū de repub. quesitū  
esset apud nos, tu quandam picturam reipub. squalidā,  
collapsam, coloribusq; euascentem, quam illuderes,  
in scenam induxisti. quærebam ego formam reipub. in-  
tegræ, ac florentis. tu mihi attulisti inane simulacrum  
claustratis vitia temporum lapsæ, corruptæ, vetustæ,



annis, ac pannis obstita, et obsoleta, neglecta, agra, elata, ac complorata. Censes ne, rogo, rempub. illam, quam accusatione acerrima proscidisti conuenire cum forma illa, quam tradiderunt tot illustribus literis sapientissimi Græcorum? cur non potius ciuitatem herroicorum temporum, de qua differeres, tibi proposuisti? ad fecē, atq; illuviē, ad labē, et lutū huius tēporis te demisisti, atq; in omnium sordium sentina planē demersisti, quo tempore non modò ex pulcherrima facta est deterrima, sed potius omnem rempub. amisimus, prolapsq; sunt omnia, vsq; adeo, vt homines quasi videantur conuersi in belluas retenta tantum oris, et humani corporis figura. tute ipse iudicare potes in tanta verborum profluentia nihil abs te dictum, quod tangeret sententiam meam. frustra q; te omnem laborem profudisse. Verū tamen videbimus quales tuæ fuerint rationes, quā fragiles, quā lubricæ, et inconstantes. Dirimere conaris, ac demoliri ciuilem hominum in terris omnibus societatem, quæ vitam omnē continet, vt homines euersis, relictisq; vbiq; vrbibus dissociati, palantesq; in montibus, et siluis rursus vitam solitariam degant. id profectò optimis rationibus probare possum, ac cogere, esse aduersus naturam ipsam bellum gerere, atq; pugnare. conniteris nimirum obitare, ne ignis, fumus, et odor, atq; id genus leuissimæ corpora vi sua, innataq; proprietate sursum versus ferantur, ne ne rursus lapides, terra, aqua, et quæ grauius sunt natura, suo pte pondere directio deorsum rapiantur. adoreris item fluminum, et aquarum decur-



*fus coercere, ne per decliua labendo tandē mare influāt.  
 istuc profectō est gigantum nixu in cœlum iter affe-  
 ctare, atq; moliri. Acta agis. facilius hercle igni vim,  
 & naturam eripies; ne admota calefaciat, aut soli lu-  
 minum cœlestium maximo, ne luceat, quā homini ad  
 societatem nato, ne sit hominum appetens, neūe cum  
 eis libenter copuletur, vel ob eam causam tantū, quod  
 sit homo, quod inquā sit ei à natura insitum. quod li-  
 cet sit commune etiam aliquibus animalibus præter ho-  
 minem; vt facile vnumquodq; cum illis, quæ sunt sui  
 generis congregentur, aliud quidem alio magis, neq; eo-  
 dem planè modo, attamen in hominibus longè alia ratio.  
 Nempe non solum natura homines aptos fecit ad socie-  
 tatem hominum, sed etiam ita comparatum est vitæ,  
 naturæq; nostræ, vt ne quidem soli esse diu, aut viue-  
 re valeamus. quod profectō negare non potes, nisi to-  
 tam physiologian euertere velis. ego verò efficiam so-  
 lidis rationibus, vt ne salua existimatione negare possis.*

*Principio arbitror inter omnes philosophos conue-  
 nire, naturam tam prouidum, solertemq; artificē, consi-  
 filij, & rationis minimè esse expertem. nihilq; ideo eā  
 temerè, fortuitò, ac sine causa facere, sed omnia consi-  
 derate, constanterq;, & ex iudicio moliri. hoc pos-  
 to fundamento res per se ipsa manifesta erit. Explo-  
 ratum est etiam physica ratione omni rei, quæ est secun-  
 dum naturam, oportere etiam ea naturalia adesse, sine  
 quibus existere. & conseruari non possit. parum vti-  
 liter nanq;, incassumq; laboraret natura, si ea, quæ fa-  
 cit, nullo modo tueri statum suum valerent, sed simul*

atq; orta essent, interirent, atq; esse desinerent, quare cum homini naturale sit viuere, naturalia itidem illi ea esse oportet, quæ sunt ei ad viuendum necessaria. inter alia autem, quæ maximè homini requiruntur ad vitam degendam, constat in primis esse hominum societatem, ad quam nati sumus, & sine qua viuere nequimus. sequitur igitur hominem natura esse sociale animal.

Quod vero humana societas, sit hominum vitæ necessaria, per se liquet, & experimento quotidie docemur. ex ijs; quæ ab ea multifariam vitæ ipsi suppeditantur. Porro non prætereundum est in ipso cuiusque ortu, quàm diuersa sit hominum, et cæterorum animantium conditio. nam muta quidem pleraq; , simul atque materno vtero edita sunt in lucem, erigunt se protinus ita ferente natura, & pedibus suis nituntur. incedunt item, & varijs discursibus huc, atq; illuc iam tum gestiunt. homo vero inualidus, imbecillusq; nascens, solo proiectus multos menses iacet, neq; mouere se loco, neq; per se stare valet, diutiusq; alienis opibus, subsidijsq; , & adminiculis sustentatur. quatuor enim rebus longè secus, quàm cætera animantia, homo indiget ad vitam tuendam, victu, vestitu, periculi propulsatione, et disciplina. Quippè natura cunctis animantibus, præterquàm homini, facilem, expeditumq; se alendi modum, facultatem, facilitatemq; elargitur, funditq; ex sese illis nihil laborantibus pastus varios, varieq; abundantes, terra herbas, et fructus nulla eorū cura, atq; industria ad cibum sumministrante, flumina, & fontes ad potum. at Lupis, Leonibus, ac Tigribus, cun-

Etisq; illis feris, quæ raptu, & sanguine se pascunt, alias  
 pecudes inualidiores eadem parens, atq; alitrix sufficit,  
 quarum carnibus alantur. Humanæ autem vitæ suste-  
 tandæ haud planè satis esse possent per se herba, aut fru-  
 ctus, pecudumue, aut ferarum carnes, nisi multa arte,  
 multoq; opere, atq; negotio istiusmodi cibaria mollita  
 essent, subacta, atq; confecta. nempe humani corporis  
 longè mollior, infirmior, atque imbecillior est natura,  
 quàm cæterorum. idem contingit in vestitu, quod erat  
 secundum. quandoquidem natura ipsa bestiarum corpo-  
 ra proprijs indumentis textit, ac sepimentis, ut absq;  
 ulla alterius ope per se satis cœli vim, atq; iniurias per-  
 ferre valeant. alias quidem corijs, pellibusq; durissimis  
 muniuit, & lanæ velleribus, ac pilorum densitate ve-  
 stuit. alijs plumas dedit; quibus tegantur. aut homi-  
 nem nudum, inopem, inertem, alienas opes expectan-  
 tem abiiecit. Ad propulsandum quoq; periculum quod  
 à me tertio loco possum fuit, mutis animantibus eadẽ  
 communis omnium mater, & magistra largior, atque  
 benignior fuisse videri potest, longeq; eia consultius  
 prouidisse. etenim illis cavit, ut suis viribus, suoq;  
 Marte aduersus iniurias tueri sese valerent: alia itaque  
 dentibus, alia cornibus, alia vnguibus armauit. alijs  
 quibus item potum pernecitatem, & agilitatem corpo-  
 ris dedit, qua se quirent ab injecto periculo liberare, &  
 validiorum vim eludere, atq; euadere. hominem verò  
 horum rerum inopem, inermem, atq; indefensum reli-  
 quit, nihilq; ei tantopere prospexit. Quarta quoque  
 ratio à me proposita fuit de disciplinam, qua sine in-

tuemur hominē minime implere posse vitæ munia. ant-  
 mantia enim ratione carentia omnia per se agunt, quæ  
 ad vitæ, naturæq; conseruationem pertinent absq; do-  
 centis ministerio, nulla disciplina, nulla doctrina instruc-  
 ta, sed sola quadam, magna hercle, & incredibili, nar-  
 turæ vi, atq; instinctu. siquidem animaduertimus aues  
 sub partus tempore semper construere nidos, eosq; quā  
 mollissime possunt, subternere; licet nullas alias vn-  
 quam sui generis aues uiderint nidificantes. canes præ-  
 terea cum pariunt, per se norunt quomodo se in partu  
 ipso; in foetūq; educando gerere debeant, tametsi, quod  
 exploratum habemus, nullam unquam aliam canem par-  
 rientem aspexerint. Quis etiam docuit araneas telam  
 suam quāq; tam molli, tam egregio, tam admirabili  
 opere contexere? De Bombyce tam exigua animante  
 nemo hercle ambigere possit, quin solo naturæ instinctu,  
 & lumine; nulla alicuius disciplina instructa opus suum  
 tam admirandum expleat, quam videmus, vbi tem-  
 pus lanificij ingruit, fila delicate nere, eademq; certa  
 ratione agglomerare, vt materiam textrinae sufficiat,  
 cum nunquam, iam non dico uiderit, sed neque uidisse  
 potuerit, quam aliam in huiusmodi opere imitaretur,  
 quia ei animanti vita est trimestris tantum, totumq;  
 genus à stirpe singulis annis statò tempore simul fundi-  
 tus interit, relictis ex se duntaxat ouis quibusdam te-  
 nuissimis pro semine, quæ supremo vitæ tempore pa-  
 riunt in reparandi generis certissimam spem. quod nos  
 olim in eo ipso poemate de huiusmodi animante expres-  
 simus, ijs planè verbis. breuis omnibus etas

Vix vlli lunæ completur tertius orbis,  
Et nunquam ex sese prolem videre creatam.  
Intereunt omnes . pecus occidit omne quotannis,  
Et cunctam euertunt fera fata ab origine gentem .  
Immortale tamen restat genus his , neq; morti  
Est penitus locus , æternum sed semina durant .  
Fera insuper naturali quadam industria norunt herbas  
quasdam vim medicamenti habentes ; quibus nullo ac-  
cessito medico morbo laborantes sibi ipse adhibent re-  
media ; quorum quicquam homo per se ne suspicari qui-  
dem potest , nihilq; planè omnium distinctè , discreteq;  
nouit , sed vix rationis lumine res communiter inuolu-  
tè , vniuersè , promiscueq; cognitas habet . ei enim ad  
humanas actiones , vitamq; benè degendam opus est  
diuturna , multipliciq; disciplina ; accedente ad naturā  
ratione , conformationeq; doctrinæ , quam consequi ne-  
quit , nisi ab alijs , quibuscum versatur , hauriat , Neq;  
verò ego tamen iccirco vnquam crediderim naturā ip-  
sam aduersus belluas adeo liberaliter egisse , & se eis  
tquam benignam , indulgentemq; parentem exhibuisse  
se , quod aliqui immeritò queruntur , vt hominem tam  
nobile animal , quem intuemur tquam regem ceteris  
dominari , penitus neglectui habuerit , eiq; malignè sub-  
ueniens nudo , inopiq; , & alienis opibus obnoxio se no-  
uercam professa fuerit . Nimtrum si vitæ præstidia ,  
quæ nobis per manuum ministerium disciplina suppeditat  
cum omnibus naturalibus instrumentis , quibus , vt  
memorauimus , muta animantia per se sunt prædita ; cō-  
feram , hoc vno ea omnia , quæ nobis natura negauit ,  
compensare

compensare possumus, longeq; præclarius nobiscum actum fuit, atq; cum illis. verum tamen nulla primum disciplina ab homine haberi potest, nisi ab alijs accipiat, erudiaturq; ab illis, quibuscū versatur, quod longè præclarius ei contingit, quãceteris animalibus. Cum igitur, vt hanc rationem deniq; concludam, homo, cui per se naturæ instrumenta desunt, neq; disciplinam, neque cetera vitæ subsidia, atq; auxilia necessaria, quæ modo memorata fuerunt, aliunde expectare possit, quàm ab humana societate, quæ vitam omnem continet, sequitur hominem naturali motu appetere hominum coniunctionem, atq; consuetudinem. Et, vt postea cogam, necesse est etiam confiteri civilem consociationem naturæ esse consentaneam. Præterea nullum animal ab alio perfectè erudiri potest, nisi sit rationis, Et sermonis particeps, quibus duobus præclaris, ac diuinis donis solum hominem natura locupletauit, atq; inde est omnis disciplina. neque enim ab illa tantopere extra, quàm intus armati fuimus, non tam corporis viribus, quàm animi diuina quadam vi, Et facultate, in qua se nobis eò se liberaliorem præbuit, quò parcior, Et ieiunior fuit in corporis præsidij elargiendis. His duobus enim naturæ adminiculis longè præclarius, ac magnificentius nobis supplere, Et representare possumus omnia vitæ necessaria subsidia. ex sermone namq; omnis, de qua modò egimus, fit disciplina, orta quidem primum, atq; à ratione profecta. Dedit itaq; homini natura orationem, per quam oritur disciplina, si ne qua hominum genus diu stare non possit. quare si à



*natura homini est datus sermo, quod est firmissimum  
 humane societatis vinculum, necessario est etiam ipsa  
 hominum conciliatio, communitas, atque societas ab ea-  
 dem natura attributa, quæ, ut modò conclusum fuit, ni-  
 bil sine causa agit, in quâ nulla apparet temeritas.  
 non enim homini dedit loquendi vim, et facultatem,  
 ut secum ipse loquatur, sed ut cum alijs sermonem cõ-  
 ferat. si quidem oratio docendo, discendo, communi-  
 cando, disceptando, cõsolando, consulendo, obiurgan-  
 do, arguendo, hortando, iudicando, colloquendo in-  
 credibiliter conciliat inter se homines, et naturali quo-  
 dam nexu coniungit. neque hercle ego cum loquor, meus  
 sermo, atque oratio ad me ipsum dirigitur, sed ad alios  
 potius, quibuscum loquor. Sequitur igitur humanam  
 societatem natura constare, estque per se consociarium.  
 Si homini naturalis est sermo, naturale est etiam ei vi-  
 uere in societate, et in communione, ut natura nihil  
 temerè, frustra, et inconsultè faciat, cuius enim causa  
 hominem loquentem fabricata esset, nisi ut is aptus fo-  
 ret ad cætus, ad concilia, et ciuitates? Hinc etiam  
 Aristoteles arguit hominem ad societatem, et congrega-  
 tionem aptum esse magis, quàm apes, quàm cetera  
 quæque animantia congregabilia, quòd nullum aliud ani-  
 mal sit particeps, composque sermonis, et orationis,  
 quæ inter se homines explicare queunt, quid utile,  
 quid inutile, quid iustum, quid iniustum; non tan-  
 tum, ut diximus, sicut belluæ, iucundi, et molesti  
 sensum indicare. Proinde, quia natura omne animal  
 diligit semetipsum, non potest omnis homo sibi nõ char*



rus esse, & statum suum curare, atq; ideo nequit non appetere ea, quæ ad vitam tuendam faciunt, se vt conseruet, priusq; à semetipso abiungi, atq; discedere poterit, quàm amittere appetitum earum rerum, quæ sibi conducant. Cum itaq; conuictus humani societas nō tantum vitæ hominum sit vtilis, sed etiam necessaria, sine qua nulla vita hominis esse possit, perspicuum est hominem hominum esse appetentem, talemq; appetitionem ei à natura esse insitam, atq; ingeneratam, quia se diligit ipse, vt probatum fuit, atq; ita est affectus, vt se conseruet, ac tueatur, vt etiam, sicut in pueris animaduertimus, nouum se agnoscat, neq; intelligat, quā ob causam id appetat, nisi quòd naturalis quidā in nobis insitus, atq; innatus appetitus existit earum rerum, quæ res sunt aptæ, atq; opportuniæ naturæ, odium vero earum, quæ sunt contrariæ. quia non tantum hominis, sed ceterorum quoq; animantium, & etiam, vt quidam uolunt, stirpium natura est sui ipsius conseruatrix, idq; habet apprimè prepositum, se vt egregie in sui generis statu custodiat. Sicut enim intuemur animantia sese mouentia sensuum distributione, & quadam compactione membrorum in vita custodiri, sic etiam ea, quæ terra gignit corticibus, atq; radicibus conseruari. Hac deniq; ratione nulla potest arctius concludi, suisq; cuiusq; sensibus comprehenditur, vt ne quidem audiat, si quis contra velit dicere. qui enim intelligi potest, aut cogitari, esse aliquod animal, quod se ipsum oderit, sibiq; consulto obstat. & inimicum existat? nisi velimus res inter se contrarias conuenire, atq; cōcur-

rere, vt idem animal se diligit, simulq; se oderit, quod fieri nullo modo potest. Ne quis verò huc obijciat eos, qui sibi vltro mortem consiscunt, laqueosq; , & alia exitiorum genera sibi ipsi parant. nequaquam sanè illi id agunt, quòd secum exerceant inimicitias, verum potius errore ducti propter nimiam vel doloris vehementis, vel cupiditatis vim. iracundia quoq; ita aliqui efferruntur, vt ea, quæ mala existunt, bona autument, mala contra, quæ bona, fugiantq; , quæ appetenda, quæ fugienda, appetant. & si quando perturbatione rationis, atq; ordinis in mala scientes ruunt, se tamen sibi vsum esse putant, optimeq; ita sibi se consulere arbitrantur. eos nanq; à recta ratione vitiosa natura detorsit, cui sententiæ quidem satis argumenti esse possit, quod appropinquante morte vnusquisq; vel sic affectus exalbescat metu, dissolutionemq; naturæ tantopere perhorrescat, cum neq; feræ, pecudesue istius timoris sint expertes, ipsæq; etiam iniecto mortis terrore horrescant, atq; refugiant. Alia mihi demum firma, atq; constanti ratione vinciendus es, quam nunquam soluere valeas. Nimirum qui conuictum humanum, hominumq; societatem euertere molitur, ille etiā simul iustitiam ab hominibus tollere nititur excellentissimam vnam Virtutem, omnium aliarum, vt dixi, dominam, & reginam, de cuius præcellentia non est quòd hic multa inculcem. sed reuoco te ad ea, quæ modo plurima in eius cōmendationē ipse congesisti, cuius splendorem Hespero, atq; lucifero ex Euripidis versu parem facis, totamq; orationem tuam in te reuoluo. constat

enim ex hominibus tuendis, id est ex hominum societa-  
te. neq; esse vlla in terris iustitia potest, nisi sit huma-  
ni conuictus societas, quæ si nulla esset, neque iustitiæ  
omnino vllus esset locus. quod quidem perspicuum est  
ex eius virtutis diffinitione, cuius vim, atq; naturam  
nemo integrè satis explicare possit, nisi humani conui-  
ctus mentionem incluserit. est enim, vt definiunt sa-  
pientissimi viri, affectus animi suum cuiq; tribuens, &  
societatem coniunctionis humanæ æquabiliter tuens. pro  
cuiusq; dignitate. sublata itaq; hominum coniunctione  
quid opus est in iustitiæ breui explicatione illis parti-  
culis. suum, inquam cuiq; pro dignitate tribuere, &  
societatem coniunctionis humanæ tueri? ea enim re, cu-  
ius causa aliquid existit, sublata, simul tollitur etiam  
illud, quippe iustitia existit, ut homines in communi-  
one viuentes tueatur, quasi quedam ciuilis descriptio,  
qua continetur multitudinis consensio, quæ pax esse di-  
citur. quippe ea vna uirtute concordēs tenentur ciuita-  
tes, ciuesq;, quo ad publica attinet, idem volunt om-  
nes, quæ concordia atq; consensio est, quasi quedam ci-  
uilis amicitia. ideo eam virtutem Aristoteles inter-  
dum nominat popularem, cuius virtutis fruendæ causa  
ex Herodoti sententia idē philosophus dixit reges olim  
fuisse constitutos, id est respub. quas memorauimus ini-  
tio à regibus administratas fuisse. vsq; adeò humanum  
genus coniunctum, ac coniugatum est cum iustitia; tan-  
taq; nobis est eius cognatio, vt (mitto quod sine ea ho-  
mines existere nequeant) cum ea in lucem editi, ad  
eamq; nati simus. neq; enim à nobis addisci potest, sed

quædã eius semina cooriuntur in animis nostris, tamen si nulla eius significatio eluceat, sicut in terra abdita latent quædam herbarum semina, quæ calore, & humore, adhibita quoq; aliqua interdum cultura, in auras eliciuntur, ita illæ quædam quasi scintillæ exercitatione, & consuetudine, ut inquit Plato, acquiruntur, legibus videlicet, institutione, & doctrina, siquidem natura hominem inchoavit. doctrina deinde perficit, et absolvit. Atqui inquiet fortè quis. nemo inficias eat hominem societatem appetere, ut cætera quoq; animantia. destinat enim illicò esse humanum genus in semper terminum funditus eversum, nisi sit maris, & foeminae coniunctio, liberorumq; & procreatio, & educatio, neq; verò in controuersiam vocari, an conducat suam quenque familiam regere, & cum suis in eadem domo coniunctè viuere Cyclopum, aut Arcadum more, sed omnem disputationem esse aduersus ciuitatem, & ciuilem coniunctionem tantorum malorum conciliatricem, sicut Flaminius magis in hac causa contentionis, quam veritatis cupidus conatus fuit probare. Eandem equidem rationem dico esse, quo ad hoc attinet, & familie, et ciuitatis, atq; ad utranq; natum esse humanum genus constat. Porro si mihi das hominem natura esse aptum ad aliquam societatem, ut solidis argumentis peruiamus, fateare etiam necesse erit, eundem aptum esse naturaliter ad ciuilem consociationem, quæ communitas non modo continet, & complectitur omnes alias communitates, sed etiam fit ex illis, ut dictum fuit. semper enim ab vno incipit multitudo. neq; intelligi po-

test, vt cuius omnes partes sint naturales, totum, & vniuersum illud non sit itidem. Quin etiam ciuile conjunctionem esse maxime naturalem fateri cogimur. si ad finem, & extremum respiciamus, ad quod alie cōmunitates referuntur. nam quicquid est finis aliquorum naturalium, constat id quoq; esse naturale, est enim forma, & ipsa eorum natura, quorum est finis. conuenit autem inter nos cōmunitates domus, & vici homini existere naturales, nō tantum, vt modò diximus, quòd inde in diē ei suppelitari possūt aliqua necessaria, sed etiam quoniam communitates illae, quae perficiunt domum, viri inquam, & vxoris, domini, & serui, patris, & filij, existunt secundum naturam. idem de vico dicimus. sit enim ex filiorum, consobrinorum, sobrinorumque, & vernerum, atq; nepotum in vna, eademq; domo sobolescentium propagatione, quae quidem principium, & quasi seminarium ciuitatis existit. eos namq; cum vna domus capere nequit ob nimium incrementum, fabricant sibi alias, atque alias domos propinquas, atq; contiguas, in quas exeant tanquam in colonias, quarum multiplicatio affert rebus pub. originem. quippe sicut ex multis familijs fit vicus, ita ex pluribus vicis euadit tandem ciuitas, quam faciūt propinquitates, coniugia, & sacra, mutuaeque consuetudines, ad quam, tanquam ad finē, referuntur, et propter quam existunt & domus, & vici communitates. quā obrem dixit Aristoteles hominem esse ciuile animal, ciuitatēq; vehementi animi impulsione, atq; libidine summo opere appetere. ciuilis enim societas est perfectio,

extremumq; omnium aliarum societatum ducta à prima  
 communitate naturæ, ascendensq; multis gradibus, &  
 ad summum perueniens, maximeq; iccirco expetenda.  
 siquidē domus ipsius communitasministrare quædam  
 potest duntaxat in diem ad necessitatem vitæ. quibus  
 singulis diebus nobis est opus. prima hæc hominum so-  
 cietas familia dicitur, quos quoniam ex vna, atq; ea-  
 dem penu viuūt, Charundas ὁμοστυπνούς pime-  
 nides verò ὁμοκκπούς vocabat, quod eodemlare,  
 & taberna contantur. pluscula deinde vitæ præsidia,  
 & paulo magis abundantius ex vici, seu pagi, quā ex  
 domus communitate sufficiuntur. At vero omnium  
 rerum, quarum vita humana indiget expletionem ciui-  
 tas affatim suppeditat, vt ibi homines non tantum vi-  
 uere, sed etiam bene, & beatè viuere possint in omniū  
 rerum abundantia, & copia, quæ non modo pertinent  
 ad victum, sed etiam ad splendorem, & cultum. om-  
 nia nanq; hominum victui necessaria nequaquam in vno  
 vico reperiri possūt, quæ habentur in multis. sua enim  
 quæq; ars in singulis vicis exercetur, in alio textrina,  
 in alio fabrilis, cæteraq; in alijs, atq; alijs, in suo  
 quæq; instituuntur. Cæterum bene, & beatè viuere  
 rectè dicitur congruenter naturæ, secundum quam non  
 est viuere in solitudine. nam eos, qui parent rationi in  
 expetendis, fugiendisq; rebus, cōuenienter naturæ vi-  
 uere dicimus, & id hercle fieri longè melius, atq; com-  
 modius potest, vbi præter victui necessaria haberi pos-  
 sunt virtutum exempla propter facta, & consulta for-  
 tium, & sapientium virorum, vbiuc legum imminet.  
 imperia,



imperia, quibus diuersa ratione homines informari possunt ad virtutem, vt humana vita sit omni bonorū genere cumulata expleta, atq; ab ipsis naturæ initijs profecta deinde sensim progressa non solum corporis, sed etiam animi bonis perfruatur, quorum expletionem nulla alia communitas suppeditare valet. Constat si quidē homo ex animo, & corpore tanquā suis partibus, neq; minus animi bonis, quā corporis ad summam felicitatem indiget. Cū igitur omnis homo natura se ipse diligat, necesse est diligat quoq; omnes sui partes consuetarieq; naturali libidine, atq; appetitu in ea feratur, ex quibus possint necessaria præsidia vtriusq; suis partibus affatim sumministrari, quō se integrō conseruare, ac tueri possit. cū vero id ex nulla alia cōmunitate præterquam ciuili consequi valeat, liquidō appareret hominem naturalem libidinem ad ciuilem societatem habere, ciuitatemq; ideo deniq; naturalem communitatem existere. Hinc Aristoteles dixit ciuitatem quidem principio constitutam fuisse ad vitam degendam, deinde ad bene degendam processisse. quod ita intelligo. initio quidem homines audita non oratoris cuiuspiam luculenti, vt aiunt, sed naturæ ipsius voce, in cœtum, & concilium ex vicis, & pagis in vnum conuulsisse, eademq; natura dūce, ac persuasrice, vt communitatem iam inchoatam perficerent, eiq; fastigium imponerent, ciuitatem primum instituisse, quo ex eā communione vberius, commodiusq; vitæ præsidia habere possent. deinde verō iam constituta ciuitate, moenibusq; circumseptā, eadem natura impellente, semperq; paulō magis



se mentibus humanis ratione explicante, ciues quoque animum adieciſſe ad virtutes, quæ mentes noſtras mirandum in modum ſuapte ſpecie, & pulchritudine commouent, quarum ſemina dixi eſſe in nobis, atq; in animis noſtris copiri. Quandoquidẽ in omnium rerum principijs ſuo more natura ſe occultat, atque retrudit, neq; tunc primum ſubitò ſinit ſe facile perſpici, aut cognoſci, atq; iccirco quæ facit, haud ſtatim perficit. ſed progredientibus ætatibus, quæ inchoauerat, paulatim, tardeq; abſoluit, quod quidem in omnium animantium ortu intueri poſſumus, hominis præſertim, qui recens ortus, vti exanimis, iacet, neq; ex eo loco, in quo eſt natus ſe cõmouet, deinde accedente in dies paulatim firmitudine, & animo, & ſenſibus vtitur, conſtititurq;, vt ſe erigat, & etiam manibus adiuuatur, antequã norrit, quem ad vſum ſibi datæ ſint manus. incipit etiam commentari, & aliquid diſcere, primum quidem ea, quæ ad corporis tuſelam, conſeruationemq; pertinent. nihil enim tunc altius cogitat, ſed tantum proxima illis, quæ vidit, et ſentit, & duntaxat corporis bona cognofcit. vim vero animi, infirma, imbecillaq; adhuc mente obſcure, quaſq; per nebulam, & caliginem percipit. quo autem plus ætate progreditur, eo magis naturam ſuam, & quaſi ſe ipſum agnoſcit. diſpicit, & ſentit quid ſit, quantumq; à cæteris animantibus ratione non vtentibus differat. incipitq; non tantum de corporis commodis cogitare, vt in prima commendatione naturæ, cum inquam primum nos nobismet ipſis cõcredidit, vt ſaluum, & integrum ſe quiſq; conſeruet, qui pri-

mus in nobis est appetitus, sed etiam de animi bonis, ad quæ nati sumus, aliquid suspicatur. iamq; electione, reiectioneq; vtens studet honori, dignitati, atq; existimationi. demum id appetit, quod bona animi affatim expleat, quæ est naturæ ipsius summa perfectio, atq; absolutio, ad quam omnia, quæcunq; ipsa agit, referuntur, quod est rerum omnium expetendarum extremum, summum, atq; vltimum. id ipsum procreationi ciuitatis contigit, quoniam nihil vnquam simul inuentum, & perfectum extitit. nam primo humani generis ortu rudis illa, & insciens multitudo congregata in coetum conuenit tum per se occulta quadam vi impellente natura, tū præsidia quisq; vrbium quærens spe custodiæ, & conseruationis sui, ac rerum suarum, quam in mutuo singuli auxilio locabant. quæ quidem nihil, aut certè parum ad animi bona attinent. mox vero eadem congregatio, sese paulatim aperiente natura, disiectaq; ea, quam diximus, animorum caligine, diuino atq; mirabili rationis vtentes dono abstraxerunt cogitationes suas à reb. humilibus, in quas se abiecerant, mentemq; ab oculorum consuetudine auocarunt sentientes se natos ad maiora, lōgeq; magnificentiora, nec tantum ad corporis quisq; sui conseruationem, & tutelam, verum etiā, & in primis quidem ad animi cultum, & ornatum, atq; edocti fuere multò inferiora esse corporis, quàm animi bona, vt in quibus sint maxima momenta non tantum ad bene. idest commodè, sed etiam ad beatè viuendum. id autem cumulat ex corporis incolumitate, & mentis ratione perfecta. continet enim vitam omnem. neq;

id vlla ciuitas consequi potest, nisi plurimis virtutum  
 fulta adminiculis, ad quas virtutes homines sic natu-  
 ra aptos animos habent, vt non modo ad eas percipiē-  
 das, exercendasq; procreati videantur, verum etiam,  
 vt à contrarijs sint alieni. Itaq; quonā ea societate cō-  
 iuncti essent, considerantes, sentientesq; sanctam esse  
 istiusmodi communitatis coniunctionem deo interposito  
 & teste, & iudice, pulchrumq; & decorum esse viue-  
 re in coetu a quo iure cum multis, scireq; in ciuitate &  
 imperare, & sua voluntate parere, atq; vti illis, qui-  
 buscum congregantur, moderatē, ac scienter, & in  
 pulcherrimis muneribus reipub. cum dignitate versari,  
 vitamq; decorē, & splendide agere, cogitantes item  
 non tantum se sibi esse natos, sed & patriæ, & suis, et  
 esse pulchrum, ac summa laude dignum multos iuuare,  
 & humanæ societati seruire, ciuium inquam saluti con-  
 sulere, quod est plurimis prodesse, nemini nocere, &  
 communem vtilitatem suis commodis antepondere, ac nō  
 modo labores adeundos communis commodi causa, ve-  
 rum etiam, si opus sit, vitæ non parcendum. id propter  
 coercere cupiditates oportere, quæ in nido animi deli-  
 tescent, domitasq; habere libidines, sua tūendo, ab alie-  
 nis mentem, oculosq;, et manus abstinendo. iamq; al-  
 tiora, & quadam supra se sapientes, deo tribuere ho-  
 norem rerum omnium effectori, et cum iustitia religio-  
 nem colere assuesacti fuerunt. hinc conditæ leges, hinc  
 magistratus, & iudicia cōstituta, vnde orta est respub.  
 vt sua quisque retinere posset, præscripta quadam re-  
 ctē, honesteq; viuendi forma. hinc haberi cœpta fuit

ratio equitatis, fidei, dignitatis, iustitiæ, atq; officij, idest cunctarum virtutum, & quam natura inchoauerat, ratio, quæ est lex diuina, & humana, ciuitatem absoluit, vt in ea non tantum bene, sed etiam beatè viui posset, & ipsam felicitatem assequerentur homines, quoniam est opus animi secundum virtutem. ex conuictu enim bonorum, vt dixit Theognides, fit exercitatio virtutum. Cõmunitas nempe ciuilis non præsens tantum commodum, sicut cæteræ societates, respicit, sed in longitudinem consulit, & in omnem vitam, quam tam animi, quam corporis omnibus bonis, atq; virtutibus expletam, ac munitam esse conuenit, vt inde haberi queat illud excellens bonum, quod rerum omnium expectandarum extremum esse diximus, omnium bonorū expletionem cumulatam. quod est congruenter naturæ viuere, quæ in suo quodq; genere perfectioni intendere uoluit, & quod inchoauit, adumbravitq; ab infimis per media gradiens, semperq; ad summū tendens perficit, & ad ultimam sui generis formam, speciemq; perducit, expolitq; & adornat, vt aptum sit vndiq; & absolutum, expletumq; omnibus numeris, & partibus, vt nihil addi possit, nihil, quod redundet, demi, semperq; ad perfectionem respicit. Vides iam arbitror non tantum primas cõmunitates humanæ vitæ esse à natura, sed etiam, & illustrius quidem, & maxime, ciuilem societatem, quod firmissimis rationibus, quas nemo refellere, aut diluere valeat, confecimus, ac coegimus. Iam nescitis Flamini quantum facinus facere adortus fueris, qui ciuilem hominum conuictum, quoad in te

fuit, dirimendo, iustitiam quoque tam egregiam virtutem, quam hominum societas procreauit, e terris stirpitus sustulisti, cum ea quoque pariter necesse sit splendidus honestissimarum virtutum chorus, quæ cum ipsa iustitia coniugatae sunt, euertatur. Proinde nullus erit posthac, te causam tam iniustam obtinente, beneficio locus. nulla inter mortales promerendæ gratiæ dabitur occasio, atque, ut video, humanum genus omnibus planè virtutibus spoliare niteris. Incassum laboras. contra naturam ipsam pugnas. Prius concidat omne cælum, omnis natura esse desinat, quam non existant hominum cœtus, concilia, & ciuitates, quæ plurimè sunt non modò naturæ consentaneæ, sed penitus herent in ipsa infixæ. omitto nunc propter necessitatem vitæ, cui à ciuili societate, ac coniunctione plurima sunt parata præsidia, atque auxilia, commoditates, & opportunitates, quibus sine nulla foret vita. nihil namque essent homines sine hominum præsidijs, & adiumentis, ut luculenter demonstrauius, essetque vitæ è vita tollere propter multiplicem vsum, ac fructum generis humani, quem ex ipsa ciuili communitate percipit. id profecto est æterna quadam vi, & lege sancitum, ut homo hominum sit appetens, audeoque affirmare, etiam si homines mutuo auxilio, atque opitulatione non indigerent, adhuc tamen appeterent vitæ societatem. Proinde æterna lege natura præscripsit, ut homo homini, quicumque sit, consultum velit, vel hac tantum causa, quod sit homo, ab eaque impellimur, ut inuicem docendo, consulendo, admonendo prodesse velimus, & id

quidem ex affectione, quam mutuam inter nos habemus. Hic est ille animi impetus, & vehemens quidam amor, quem Aristoteles solertissimus naturæ speculator dixit innatum esse omnibus hominibus ad communitatem, ciuilemque coniunctionem, quæ est communis hominum inter homines, qui conuenienter naturæ viuere volunt, commendatio. Iucundissimum est adeo per se homini hominem iuuare, ex quo efficitur, ut ille, qui sit naturæ obediens, non possit homini nocere, cum se ad homines tuendos, conseruandosque norit esse natum, idque existere naturæ consentaneum. Quid porro in vita iucundius, magisque expetendum, quam amoris, beneuolentiæque remuneratione studiorum, atque officiorum uiciissitudo? est enim cuiusque natura sui similium vehementer appetens, rapitque ad se sui generis omnia, quod quidem perspicuum esse potest ex beneuolentia, et affectione, quam non modo ad præsentem, sed etiam ad posteros habemus, quibus tanta charitate prospicimus, alij alijs, ut aiunt, telas tradentes. hinc testamenta, & ultimæ morientium voluntates, legitimæque commendationes tanta diligentia relictæ. illorum vero sceleratam vocem omnes odio, atque omnibus probis insectantur, qui nihil sua interesse dicunt, si ipsis mortuis statim vniuersi orbis consequatur desigratio. quod vulgato, & peruzgato Græco quodam versu eleganter exprimitur. causa autem tantæ charitatis non aliunde porro, quam ab ipsa natura proficiscitur, occulta quædam vi ad id nos impellente, nemo enim velit viuere in solitudine etiam omnibus bonis affluens, & in infinita



rerum copia positus, sibi negata aspiciendi hominis potestate. Quæ obsecro tam suavis voluptas, qui rerum optimarum adeo iucundus fructus esse posset, quem non ei omnem insuauem, iniucundumq; efficeret solitudo, cū inquirunt non haberet, qui cum partiri, atq; communicare tot sua posset bona? Natura enim, quæ semper fugit malum, nihil amat solitarium, vt diximus, simile sui querit tanquam adminiculum, cui innitatur, quod per se satis esse posset argumentum ad conficiendum homines ad ciuilem societatem esse natos. Atqui forte etiam hic occurris repertos esse aliquos, qui viuerent in agris, & in solitudine, congressusq; hominū, & societatem defugerent. ea verò, quæ nobis natura insunt, conuenire inesse semper, & in omnibus. Omnes sanè homines aptos ad ciuilem societatem naturam procreasse dicimus, huiusceq; communitatis appetitionem cunctis eandem ingenerasse, vt liquidò iam apparet, potest tamen quis aliqua fortuna, viq; aut casu impediri, ne in ciuitate viuat. egestate enim aliqui adeo laborant, vt eis opus sit perpetuò in agris manū mercede inopiam tolerare. nonnulli etiam reperti sunt, qui quoniam ius æquum cum multis utendo pati nequirent, fugerint, non modo ciuitatis communionem, sed etiam congressus hominum, et societate summè odierint, quasiq; aduersus naturam oblucentes, omnibus legum, atq; officiorum vinculis exoluti vitam inæqualem, & confragosam, procul à magistratibus, atq; iudiciis in solitudine duxerint. tales profectò neq; pudet quicquam, neq; metuant quenquam, neq; legem se putant tenere



tenere vllam, existimati similes volucrum illarū, quæ libero cœlo volantes sanguine se pascunt. quod quidem euenit perturbatione rationis, et ordinis, & quia porro sint à sanitate alieni. hos tu verò homines ducas? Ego sanè eos feras etiam asperitate anteire statuo. nulla enim tam aspera, tam trux, & immanis est bellua, quàm feritate homo exlex, & à recto remotus non vincat, quod præ cæteris animalibus sensu, et intelligentia præditus sit, quibus in contrarias partis, vt libet, vti possit. ijs si rectè vtitur, nihil eo melius queat cogitari, si peruersè, nihil immanius, quod dici solet de iustitia, quam munitam, stipatamq; armis esse conuenit, si illa arma, abiecta ratione, ad iniuriam, & vim conuerterit. Proinde sunt etiam, qui se ipsi plurimū confidunt, quiq; vsq; adeo muniti sunt virtute, & sapientia, vt nullius ope, nullius subsidijs, nullisq; adminiculis egeant, & se ideo à cœtu, atq; hominum conuictu auocant, totosq; se dedunt cognitioni, vniuersæ naturæ, rerumq; admirabilium contemplatores. hos sanè existimant plusquam homines existere, & quosdā quasi mortales deos habendos. propterea de ijs, & illis considerantes philosophi, eos dicunt nullam esse ciuitatis partem. sed aut deos, aut bestias existere. Cæterum finem illorum, qui in societate ciuili viuunt, oportet esse aliquem, ad quem omnis vita vniuscuiusque, & actio ordinatur, cum homo agat per intelligentiam, cuius opus semper finem respicit. at verò diuersa est hominum vita, variæq; existunt actiones, et studia. neq; ab omnibus in multitudine proceditur eodem modo ad

propositum finem opus est, itaq; ei multitudini aliquo  
 tanquam rectore, & duce, à quo cuncti eodem dirigantur,  
 vt societas conseruetur. neq; enim nauis, quam  
 in medio mari in diuersa ferunt venti, ad optatum por-  
 tum vnquam perueniret, nisi gubernatoris opera, atq;  
 industria accedente. dillabatur nanq; diffluatq; popu-  
 lus, nisi adsit rector, & quasi gubernator, qui eum  
 contineat, Quippè cum suæ quisq; rei seorsum, seiun-  
 ctetq; studet, in diuersa distraherentur omnes nemine exi-  
 stente, qui bonum commune curet, tueaturq;, et in me-  
 dium consulat. Publici nempè cura ciuitatem coniun-  
 git, atq; connectit, priuati verò studium, & amor  
 dislungit, ac dissipat, vt sit etiam in corpore cuiusuis  
 animalis, quod planè difflueret, dissoluereturq;, nisi  
 princeps aliqua vis regens, atq; gubernans præesset,  
 quæ omnium aliorum membrorum saluti, atq; incolumi-  
 titati prospiceret. Hanc autem rectionem esse à natu-  
 ra, nemo ambigat, qui aliquid sentit, aut intelligit. Sic  
 eadem ratione deus præpotens nō tantum generi huma-  
 no, sed etiam cunctis cœlestibus animis imperat. sic  
 etiam cum homo, vt diximus, constet ex animo, et cor-  
 pore, animus præcipit, præscribitq; corpori, tanquā  
 dominus imperans obediēti. rursus in animo ipso ra-  
 tio, quæ est princeps pars, vitiosis partibus præest,  
 iramq;, & libidinem temperans refrenat, atq; vtran-  
 quæ sub signa vocat, & totius animi motus regit. in  
 corpore quoq; inter membra vnum membrum obtinet  
 principatum, quem alij cordi, alij cerebro attribuunt,  
 cunctaq; mouet, ac regit. deniq; eadem similitudine

ratio existit in omni communitate . in qua necesse est semper vnum excellere , qui director rerum prudens , vel perpetuo , vel ad tempus quoddam certum , ac praestitutum inuicem alios gubernet . hunc penes , vt ceteri omnes sint . in officio , oportet sit omnis imperandi , praecipendi potestas , eiusq; officium est , vt , sicut ciues sua quisq; curant commoda , ita ipse rei communi prospiciat , suae vtilitatis penè oblitus , pacemq; , & concordiam inter omnes in ciuitate conciliet , atque conseruet , quod minus commodè fieri possit , nisi penes vnum sit principatus , vt praescribere valeat , dirigere , ordinare , iubere , atq; imperare . Iccirco conclusum est initio vocata in concilium rudi illa , & agresti multitudine , ad prudentiorem aliquem , qui esset omnium praesidium , & columen , delatum vltro fuisse principatum , sola natura impellente , secus eos non potuisse vnquam in populi unius corpus coalescere . quandoquidem natura comparatum est in hominum genere , vt quod est potentius , imperet imbecillo . ita foeminis praesunt mares . quod perspicue videmus , in primis communitatibus , quas à natura introductas , & esse naturales mihi concedis . vir enim uxori imperat , dominus ei , qui est natura seruus , pater liberis , maiores natu minorib. praescribunt . cum potentiam dico , & imbecillitatem , non tam corporis , & membrorum vires , quam animi , & ingenij vim , & facultatem intelligo . Nempe , vt memorauius , homo licet à quibusdam siluestribus animalibus corporis viribus antecellatur . tamen omnibus ille dominatur , quòd ratione , consilio , indu-

*stria*, atq; solertia omnia alia animantia anteeat. neque id tantum in hominum genere animaduertimus, sed etiā in ceteris animantibus. qua ratione Pindarus suis Thebanis probat principatum esse à natura, iustumq; ideo regnum; quòd scilicet etiam in animalibus ratione non utentibus perspicua imperij signa dignoscantur; cū semper ea, quæ sunt validiora, tenuioribus, magisq; imbecillis imperent, idq; innatum est omni planè animantium generi. Quod si Flaminius apud se existens cogitasset, non hercle tam acerbè omne imperij, atque rectionis genus probris omnibus, & contumelijs confidisset, neq; rempub. omnem à finibus naturæ exterminasset, quoniam nullo pacto potest ullum animal non appetere id, quod videtur accommodatum esse naturæ, uidissetq; quàm multa sequerentur incommoda, & absurda, nisi natura suadente aliqui parerent inter homines, aliqui imperarent. quod ni sit, ausim iterum, atque iterum dicere, atq; adeo libera voce affirmare, necesse sit omne cælum, mundusq; ipse, & cuncta natura intereat, cū videamus vniuersa ita diuina prouidentia ordinata, atq; directa fuisse, ut inferiora superioribus, cunctaq; vni ipsi deo, vt diximus, obediant, nisi id quoq; negare velis, deoq; rerum omnium molitori imperium in homines, coelitesq; ipsos in perpetuum abrogare adoriaris, ne fortè cogaris fateri hominem additum esse seruituti, cum deo, diuinæq; legi nascatur obnoxius. Vide vero istuc ne sit Titanum more contra deum, naturamq; bellum gerere. Verum tandem videamus, quæ nam sit ista seruitus, quam vsq; cò detea-

statis, vt omnem ciuilem societatem, vniuersumq; hominum genus dirimere, discerpere, ac dissipare tam impotenter molitus fueris. Primum equidem fateor tecum seruitutem postremum esse malorum omnium, etiam bello, & morte repellendum, omnesq; homines merito libertati studere, & iugum acerbissimum seruitutis, vt morbum, vt pestem, ac famem odisse. aio verò non omnem, quam tu vocas seruitutem, esse contra naturam, quod neq; Plato, neq; Aristoteles tam præstantes philosophi inficias eant. negoq; omnes, qui alicui parent, rectè seruos dici. Nempè aliqui nascuntur tuo modo serui, quibus & utilis, & iusta est illa seruitus: hi quidem corporum viribus, atq; muneribus opportuni existunt, mentis vero ratione, atq; consilio non ita. qui ideo sibi ipsi ad vitam tuendam haud satis esse possent sine alterius opibus, atq; præsidij. Natura itaque eorum corpora fecit firma, atq; robusta ad labores, & ad vsus vitæ necessarios, vt in grauiorum operum functionibus durare, & aduersus onera resistere valerent. dominis vero, quibus isti huiusmodi seruitutem seruiunt, data sunt corpora, vt elegantiora, ita plerunq; graciliora, inuvalidioraq; ad istiusmodi munera, & opportunitates minus utilia. verum quod eis corporis virium natura detraxit, mentis, animiq; solertioris compensatione mitigauit. existunt enim ad ciuilia munera, ad pacis, belliq; opportunitates, ad rerumq; indagandarum cognitionem aptiores. Vtrisque igitur vtraq; utilis est conditio, vt alter imperet, alter pareat, neq; est illa seruitus, quam vt mortem detestatur

natura, cum sit iusta, utilis, atq; admodum hominum generi necessaria. Ea vero omnia, quibus cuncti insectantur, detestanturq; seruitutem, in illam seruitutem dicuntur, quæ haud natura, sed hominum opinione inducta fuit, gentium inquam conuentis, & communis consensione, ut victi, captiq; in bello, victoris fierent potestatis, eiq; seruitutem seruirent, si ab eo in vita seruati essent, vnde ab antiquis seruos dictos esse volunt, nec tantum in victoris essent potestate, sed etiã illorum, quibus eos ipse addixisset, & iure nexi, atq; mancipij per æs, & libram obligasset. istuc seruitutis genus odit merito, atq; auertitur natura, in eamq; gentium legem philosophi inuebuntur, ut iniquam suasoris iniqui rogationem, quoniam persæpe euenit fortunæ in rebus humanis ludentis arbitrio, ut viri nobiles, & sapientes, seruiant ignobili, atq; insipienti. Hoc itaq; capite nonnullis visum est ius naturale à iure gentium ita dislunctum existere, ut inuicem contraria esse, ac disparata suo loquendi more dixerint, quoniam hoc modo parere, & imperare, non conducit utriq;: nam qui paret, haud quaquam à sua sponte facit, sed vi; atq; iniqua coactus conditione. Ex ijs quæ dicta sunt iam intelligere potes, alios alijs parere non solum non esse contra naturam, sed etiam naturæ esse valde consentaneum. quod ni ita sit, multa absurda incurrat hominum genus est necesse. neq; ideo libertas est adeo omnibus cara, quòd cuiq; liceat facere quicquid velit, neq; adeo abhorret natura quod quisq; transformet se in mores alienos, dumtamen ille, in cuius mores quis se velit

induere, sapientia, & virtute præstet, sitq; talis, à quo, erudiri, & iuuari queat, quod expedire, & vtile esse intueri possumus etiam in ijs rebus, quas terra gignit solo affixas. amputatis enim, atq; recisis naturalibus, siluestrium, steriliūq; arborum ramis inferuntur generosi, selectiq; generis surculi, & planta, quæ erat plane sterilis, in frugifera, ac felix naturam, & cōsuetudinem coalescit. multa quoq; quæ in vno bona sunt natura, alterius virtute, atq; industria persepe fiunt meliora. hanc ob rem mortales illi prisce parere regibus cœperunt. quod imperij genus initio delatum fuit ad vnum iustum simul, & sapientem habitum, vt ille præesset cæteris, existeretq; vnus in ciuitate iusti, et æqui custos, ac vindex, quæ sunt firmissima vincula ciuitatum, generetq; vnus ciuitatis personam, & communi vtilitati seruiens ciues sibi subiectos æquitate, & fide defenderet, essetq; cæteris virtutis specimen. Tali viro sponte sua, ac voluntate parent, boni præsertim, & innocentes, quòd id sibi salutare esse intelligūt, cum animi mortalium ferè omnium nimia libertate insolecant, cunctiq; plane licentia deteriores fiant. At vero, si quis existat, qui neq; vereatur quenquam, neque lege se teneri vlla arbitretur, sine freno, sine modo, belli cupidus, pacis, & quietis inimicus, hunc omnes defugiunt, auersantur, atq; deuitant, cuius quidem si cuncti homines existerent similes. humanum genus Platonis sententia parum abesset à feris. quanto melius cum illis agitur, qui cum multis æquo iure in ciuitate viuentes, se, suaq; omnia prudentiorum consilio, ac



fidei committunt, iurique, & legibus hoc est rationi, sua voluntate, libentibusque animis parent. cum inde nihil non æquum, aut iustum, expectare, aut metuere queat.

Equidem haud vsquam quenquam esse duco ita ab humanitate remotum, qui si suo arbitrato, atque, ut cuperet, actiones suas dirigere valeat, & penitus consequi, quæ vellet, nolit magis vivere secundum virtutem, quam à recto alienus. Principes enimvero, & qui alijs præsumt, tales esse oportet, ut cogitent civium se potius patrocinium suscepisse, quam imperium, aut dominationem, talesque rectores Plato idem non dominos, sed reipub. servatores vocat, in quorum tutela tuto, ac libere viuitur, nulliusque rei illis cura maior incubat, quam civium libertatis, quæ ab æquitate profisciscitur, cuius nihil est magis proprium, quam pari iure vivere in multitudine. Non ne, quemadmodum apud Xenophontem pater Cyrum admonet, qui ægrotant aduocant medicum, cuius se committant voluntati, præscriptoque pareant, ut eius præceptis sanitatem recuperent? Transitori quoque mare scientissimo gubernatori se totos tradunt, qui non ignarus locorum, ac regionum exploratam habeat anni rationem, & temporum, cælique naturam, ac siderum, ventorum, & omnium, quæ pertinent ad artem nauticam calleat, neque unquam ab eius præstituto discedunt. Verum hæc planè sunt humana, & humi iacentia, nunc à terra nos abstrabentes paulo altius curremus rationes. Christus, cuius natura non tantum erat hominis, sed seorsum quoque diuina, ac cœlestis, ascensum in cœlum ad patrem moliens Simonis

monis Petri custodiæ, curæ, ac diligentie concedidit manum illam, ac multitudinem, tam quæ promissa sua, auctoritatem, et fidem secuta fuerat, quàm quæ in posterum erat secutura, ecclesiamq; idest bonorum selectam congregationem nominavit, eiq; voluit unum semper caput præesse vicaria potestate, ad quod cætera illius corporis membra respicerent. Videmus quoq; in sacrarum literarum monumentis, seu potius oraculis per sæpe cœlitum concilium, cœlestemq; civitatem, vocari. ad cuius rationem, nisi me impedisses isto tam importuno intercurso, humanam, & terrestrem rempub, temperandam esse eram disputaturus. quod Homerus ipse etiam videtur non omnino ignorasse, ubi ait, quod sit in hominibus, esse dei speciem, & imaginem. ipse item deus, & homo Christus in veræ sapientiæ effatis toties regnum cœlorum nominans innuit in cœlo quoq; existere imperium, & regendi vim, ac potestatem. Insuper & ipse heros noster Petrus, cuius vicariæ fidei conceditam memorauimus Christianam rempub. nominat regale sacerdotium. Mitto eundem Homerum excellentem naturæ pictorem non solum loquem sæpius deorum omnium, atq; hominum regem, sed etiam in omni, quasi pagina Agamemnonem vocare *πριμεντα λαων*. totius inquam Græciæ exercitus pastorem, atq; rectorem, ad cuius nutum, atq; arbitriū caterorum ducum consilia respicerent, quod quidem necesse est in omni ferè belli expeditione tam terrestri, quàm maritima, in omniq; congregatione, in qua nisi emineat aliqua potestas, quæ alijs præsit, ac præscri-

bat recta, & cum ratione præcipiens, statim dilabatur, dissoluaturq; manus illa, ac multitudo. nemo tamen iccirco neq; Græcorum, neq; quorunq; aliorum milites, ducesve alios in exercitu summo imperatori subiectos rectè appellarit seruos, quod pareant duci illi, ad quem totius imperij summa spectat. opus est igitur in omni consociatione rectoribus, & gubernatoribus, sine quorum prudentia, diligentia, æquitate, ac fide nulla communitas stare queat, illisq; præsertim recta iubentibus parere omnes oportet. quod qui non faciunt, sed principibus, ac magistratibus, quorum descriptione omnis reipub. moderatio continetur, aduersantur, eos Plato è Titanum genere existere arbitratur. Quando autem pauci adeo inueniuntur, qui virtute excellent, nō multum admodum idonei existunt, qui rēpub. capeßant, eiusq; præclaris muneribus præsent. Ne tamen hic Flamini erres, & tragœdias vsquequaq; decantes in tyrannicas rectiones sine causa inuectus, hanc omnem obedientiam, voluntariam esse oportere dicimus, atq; ita tua omnis oratio extra septa, & cancellos vagatur, frustra; laboras, & inanem vmbra persequeris. diuidit nempe Plato omnem rectionem in violentam, et voluntariam. violentam vocat tyrannidem, & factionem. voluntariam verò, regiam, ac ciuilem nominat. differtq; rex à tyranno, quòd hic volentibus, ille inuitis, ac coactis imperat. hinc est quod libertatis tempore semper potentiora sunt, ac validiora legum imperia. parent autē volentes populi, tunc cū imperium est magis gratia subiectorum, quàm imperantium. secus enim illi, qui

principibus, ac magistratibus obediunt, serui essent. bene ideo se habere ciuitatē, recteq; administrari dicimus, cum non minus eorum, qui subiecti sunt, quā eorum, qui præsunt, vtilitas quæritur, immo maxime, & in primis populi commoda attendenda sunt. inde nihilominus sequitur etiam priuata regentium utilitas, quæ semper coniuncta esse debet cum publica, nec sine ea salutis rebus existere potest. Sic nauarchus maxime nauatarum, & eorum, qui sunt in naui, incolumitati studet. ex qua diligentia nihilo secius suæ quoq; saluti consulit. nam ipse etiam euadit incolumis, & portum cum vectoribus tenet. Ac in hoc sanè agnoscimus pastores distare à ciuitatum rectoribus, quòd pastores in primis vtilitatem suam, non ouium sibi propositā habent. At gubernatores reipub. præcipue commodorū ciuium rationem ducunt siue vnus, siue pauci, siue multi principatum tenent. neq; enim vlla rectionis forma reipub. rectè dici potest, nisi in qua illi, qui præsunt, publicæ vtilitati, communibusq; ciuium cōmodis in primis student, volentibusq; ideo imperant. Cū verò qui regunt, imperium ad suam, suorūq; domesticorū, ac propinquorum, amicorumūc tantum vtilitatem dirigunt, ea rectionis forma multum abest ab optima gubernandi ratione, eamq; verius tyrannidem, aut factionem, aut popularem licentiam nominamus. Oportet autem maxime à iusto imperio omnem vim abesse, dominandiq; libidinem, cunctamq; suspicionem auaritiæ, qua nulla pestis magis est contraria imperio, ac maiestati. sed qui imperat sit nullius rei egens, aut cupiens, sed inquam

plane existat se ipso contentus, & ex se totus pendeat. Hic verò Flaminius arridens, expecto, inquit, quorsum tandem hæc tendat oratio. nam, ut video, causam meam agis, teq; ipse induis in idipsum, quod maxime effugere niteris, & dum te expedire tendis ex laqueis mea oratione tibi iniectis, arctius te semper inuolutum constringis, teq; ipse configis tua met confossione iugulatu n. Seruitutem ego tibi obieci, peruiciq; nos manere in ciuitatis communione non posse, nisi proiecta, amissaq; prorsus libertate, nisiq; fecerimus nos metipsos potestatis alienæ, & alteri seruitutem seruamus id ipsum idem tu aperte, palamq; confiteris, dum reges gubernatores, imperatores, rectores, & magistratus, tanquam dominos in ceruicibus nostris collocas, qui quò plures extiterint, eò magis nos in seruitutē redigis, grauiorque dominatu premis, & quot rectores das, totidem nobis imponis tyrannos, & quò minime vis eò reuolueris. Ad ingenium redi, excute hic tandem intelligentiam tuam, & complicatam animi tui sententiam euolue, teq; si potes, explica. Explicabo mediusfidius, inquàm, teq; & omnes, qui in ciuitatibus æquo iure cum multis viuunt, in libertatem, cui tu adeo metuis, vindicabo, atq; quacung; oratio mea pertransierit, perq; volauerit, omnibus soluam compedes, atq; ergastula, libertatis ubiq; seminator, ut ne minimum quidem vssiam relinquatur seruitutis indicium.

Erras non parum sæpe Flamini, in hac autem re maxime, qui non vis intelligere, quantum sit discriminis inter eos, qui sua sponte, & voluntate parent, & il-

los, sicut distinguendum esse diximus, qui id inuiti faciunt, cum proprium sit libertatis munus, ut per eam quis agat quicquid velit, liberq; planè existat, quisquis nihil facit, aut dicit inuitus. Qui enim serui illi haberi debent, qui suorum commodorum gratia obtemperant magistratibus recta ratione in iubendo, & vetando utentibus? tibi res plena periculi videtur esse, quod nos ipsos subijcimus arbitrio alieno, alteriq; ita addicimur, ut in nos ille interdum vitæ, ac necis videatur habere potestatem. falleris hic sanè maximè, nempe, cum sub ius, iudiciūq; venimus, addicimus nos, nostraq; non alicui homini, sed legibus aut à rege iusto, aut à ciuitate non oppressa tyrannide latis, quia magistratus, gubernatores, regesq; obediunt quoq; ipsi legibus, idest rectæ rationi, nihilq; ab illis est agendū, quod non dici possit rectè, et ex ordine factum, & summa ratione obuallatum. Porro regem ipsum non subijci legibus, sceleratum vocem esse clamant, & detestantur omnes. nanq; ut est apud Xenophontem, leges non modò parere docent, sed etiam imperare. Ne igitur magistratus quoq; & qui populos regunt, in iubendis, ac vetandis rebus errarent, neue quicquam agerent ex libidine, conditæ fuerunt mira omniū gentium consensione leges, sapientissimorum hominum cogitata, atq; inuenta, quibus iura, ac iudicia describuntur. vnum, idemq; nempe propositum legum, & magistratuum esse debet, eademq; voluntas, & ratio. hinc aliqui magistratum, legem loquentem, legem vero magistratum mutum esse dixerunt, quæ luculenter differit

Theophrastus in eo libro , in quo de officio legum , & magistratuum copiose agit . legum sanè præscripto qui iudicant , quiq; repub. temperant , nunquam deflectere possunt à recta ratione , quæ est ipsarum legum non modo conseruatrice , & emendatrice , verum etiam eas generasse quodam modo videri potest , & earum est , vt ita dicam , quasi anima , atq; medulla . his porro dominantibus nullus est gratiæ , aut odio locus . non hæ mouentur ira , aut cupiditate vlla , semper eadem , & æquæ omnibus , nemini succenssent , nihil cupiunt , nihil dolent , nihil metuunt , aut sperant , nunquam letitia effervunt , nunquam stomachantur , neque fastidiunt , neq; desessæ oblanguescunt , neq; obdormiscunt , sed semper vna , atq; eadem voce cum omnibus loquuntur . Eas itaq; in ciuitate dominari , non magistratus , quos potius par est ipsis legibus , & maiorum sapientissimorum hominum institutis apprimè obedire , ab illisq; ne transuersum quidem vnguem discedere . Miseram nimirum congregationem illam , vbi leges parum possunt , sed ipse potius magistratibus seruiunt . Felicem contra illam , ac beatam ciuitatem , vbi leges ipsæ magistratibus dominantur , et omnia possunt . Plato inquit illi reipub. affore multa bona , quæ dii dant ciuitatibus . Porro legibus , ac moribus necesse est contineri omnem ciuitatem , quorum vnum sine altero esse non potest .

Hæc duo nisi essent , homines vi vterentur ad cibum , & ad maris , ac fœminæ coniunctionem , cunctaq; ex libidine fierent . hinc dicimus conditas fuisse leges ad salutem ciuium , vitamq; omnium quietam , ac beatam ,



ad compescendamq; improborum licentiam, ut oderint iniustitiam, iusti autem naturam diligant, atq; ut homines ab iniuria inter se attemperent, ut suumq; cuiq; tenere liceat, neque improbi magno cum bonorum periculo, & detrimento, nimium possint. est enim lex eorum, quæ iusta sunt, & eorum, quæ iniusta, recta distinctio auferens iniuriarum, scelerumq; licentiã. Nisi enim natæ fuissent in animis hominum cupiditates tanquam in humida materia quædã caries, nihil planè opus erat legum scriptarum promulgatione, quæ sicut supplicio afficiunt improbos, ita bonos defendunt emendatrices vitiorum, virtutum commendatrices. nihil berce nanq; opus esset legibus, si æqui, & boni essemus omnes. Si quidem cupiditates prius fuisse necesse sit, deinde leges adinuentas, quæ illis modum facerent, quæ furari, rapere, latrocinari, fraudare, adulterariq; versarent, iuberentq; sua re quæq; contentum esse, à vi, àq; iniuria omnino abstinere, ad rectè facta vocantes, deuocantesq; à peccato. Nempe lex vinculorum, verberumq;, & mortis minis prouidet non tantum, ne quis rem alienam rapiat, sed etiam ne alterius ledat famam, cui optimè maiores nostri in x i i. tabulis cõsultum esse volentes capite sanxerunt, si quis occentasset, carmenq; edidisset, quod infamiam alicui afferret, ut omnium indemnitati, & securitati, honori, atq; existimationi cautum esset, ijsq; vinculis improborum, insolentiumq;, & petulantium coerceretur licentia. rectè itaq; lex à sapientibus dicitur populi salus, quæ vult pauperes æquè, ac diuites posse in ciuitate. minatur enim

pœnas , ac multas , quibus saltem improbi ab iniuria ,  
 & scelere deterreantur . Hinc Romani imperij illi ple-  
 ni maiestatis fasces , tremendæq; secures , lictores , atq;  
 apparitores . Elaborarunt autem summopere , vt pœ-  
 na inflictæ vim haberent salutaris cuiusdam medicinæ ,  
 iustæq; , ac debitæ essent , neue maior pœna , quàm cul-  
 pa , sed noxia multæ par existeret . Hinc tot leges , qui-  
 bus omnes nationes pariter vtuntur , quæ scilicet ver-  
 santur circa illud ius , quod gentium dicitur , cui æquum  
 est acquiescere omnes populos , ac nationes , et sine quo  
 haud commodè genus humanū existere possit . inde etiā  
 leges scriptæ , quæ dicuntur populares , singulorum in-  
 quàm populorum instituta , quibus tanquam firmissimis  
 vinculis continentur singulæ ciuitates . quod enim rex  
 sanxerit , senatusue creuerit , aut populus iusserit , le-  
 gem esse conuenit . quod nomen illis scitis maximè con-  
 gruit , quæ sapientes viri alicuius populi , aut princi-  
 pum iussu statuerūt , vt in Græcia , sicut tu modo recen-  
 suisti , multi fuere legum latores . Nostra tamen ci-  
 uitas obtinuit , vt ius , quo ipsa utebatur , receptum  
 esset à cunctis ferè ciuitatibus , vtq; ciuile vbiq; voca-  
 retur , cum ob ingentis imperij maiestatem , tum propter  
 summam diligentiam coniunctam cum summa prudentia  
 in condendis legibus . Nempè nostros X. viros , qui  
 Romæ conscripsere xii. tabulas , necesse est fuisse ho-  
 mines prudentissimos , quòd tantulis tabellis tanta res-  
 pub. diu stetit , neq; post multos annos vllæ aliæ adie-  
 ctæ fuerunt leges , donec improborum hominum auda-  
 cia , atq; intemperantia eo peruenit , vt calliditate le-  
 ges

ges latas euaderent , atque eluderent . inde referti fuerunt tot formulis iuriconsultorum libri , excogitataeq; vbiq; tot leges scriptæ , æræue incisæ , tot rogationes , senatus consulta , prætorum iura , atq; edicta , plebiscita , & prudentum responsa , quæ omnia vsquequaq; Flaminius fastidiens , ac nauseabundus tantopere carpit , cuius acerbitate coactus sui quæ hactenus dixi de legum natura latius prosequi , quàm fortasse locus poscere uideatur . illa tamen scita fuerunt , atque instituta , vt eis omnino iustitia in animis hominum , vellent , nollentue , retineretur , ut saltem improborum uis , fraudue , ex quibus duobus fontibus oritur iniuria , coerceretur , ne bonis nocere valerent . sed iuris , & iudiciorum æquitate suum quisq; tenere posset , & neq; tenuiores propter imbecillitatem à potentioribus opprimerentur , circumuenerenturue , neque locupletibus obstaret inuidia ad sua vel tuenda , vel recuperanda , vtq; omnes in ciuitate tam tenues , quàm locupletes æque possent . At Flaminius hic libertatem mordicè tenet , vrgetq; , & identidem instat , non conducere nos , quos natura liberos creauit , vinculis legum constringi , & in seruitutem addici , nititurq; , & omnem lapidem mouet non veræ libertatis ergò , sed obumbratæ cuiusdam specie , vt non tantum liberum , sed solutum plane sit , & exlex , vbiq; humanum genus , ne quid à quoquā metu fiat , qui parum abest à vi , unde omnis seruitus inducitur . vt hic exultat ? vt hic volitat ? vt triūphat ? istæc planè ratio est maior illa , et ualidior machina , ultimūq; tormēti genus , quod expugnandæ ciuitati almo-

uere possit . hic est eius Achilles, quem aduersus Troia-  
 norū ingruentiū vim , atq; impressionē extrema fortu-  
 na exanimatus opponat . atq; hic hercle tandem aliquid  
 dicere videtur . Quoniā hoc itaq; est vlcus , ad quod  
 aperiendum non acu , aut chirurgi lanceola , sed alio sit  
 opus ferro longē validiore , ac robustiore , sude inquā  
 ferrea , aut gladiatoris lancea . in eius curatione etiā sit  
 longiusculus viderer , essem omnino à vobis ferendus ,  
 quod hic tota legū natura euoluenda esset , uerū ex his  
 me expediā , quā breuissimē potero , haud quaquam  
 imitatus improbū medicū , qui quotidiani lucelli , et sor-  
 didissimi quæstus gratia de industria ægrotationes,alen-  
 do,cōperendinandoq; curationem quantumlibet producit  
 atq; prolatat . Perge tuo cōmodo , inquit Ceruinus . Si-  
 quidem vacua est penitus ab interuentoribus dies , quā  
 nescio , in quibus alijs colloquijs meliūs ducere possemus .  
 delectant me hercle iucundū in modum ista , quæ longē  
 secus tractari solita sunt in scholis ab illis , qui dicuntur  
 iuris prudentes . itidē spondere ausim pro ambobus col-  
 legis meis , & pro istis , neq; enim Flaminiū ipsum ex-  
 cipio , licet tibi vehementer , et præfractē aduersari ui-  
 deatur . quē intus secum gestientē uidere uideor,quòd te  
 elicerit ad hæc tam planē , tamq; conclusē differenda .  
 Tunc ego . Hæc uenia inquā à uobis concessa , agam ali-  
 quātò liberiūs . Quis enim quæso dicebat Flaminius nō  
 metuat , ac reformidet istas tam imperiosas reginas , ac  
 dominas , quæ ciues dānis , multa , ignominia , exilio ,  
 vinculis , uerberibus , supremoq; interdū supplicio affi-  
 ciunt ? quis nō horrescat superbissimas illas secures uin-

culaq; carnificum, crucem, & arborem infellicem, miseriq; cruciatus carmen, et quæ plurima in oratione sua non modò lautè, sed etià libenter cōmemorabat? Addidit insuper, quod vsquequa; inculcabat, leges esse hominũ adinuenta, cùm ius tamen non sit hominũ opinione, sed natura constitutum. iocularia profectò sunt ista risu potiùs, quàm oratione eiicienda, quibus tamen ego respondebo, non quod Iseum dicere solui fuisse tradunt, leges quidẽ acriter statui, mitius uerò, quàm iubent illa, pœnas sumi oportere. uerùm dico, atq; assero probos uiros parere legibus, nō uì, aut metu, sed quod ius cogit, eos sua sponte, et uoluntate facefcere, legesq; ipsas uereri. cum honesti causa, tum quia id esse salutare, sibiq; maximè cōducere intelligunt. nihil enim uiri boni faciunt vnquã, nihil cogitant, nisi uolentes, & suapte sponte, neq; qui obtēperat legib. iccirco dici potest alicui potestati addictus, nexuq;, aut aliquo iure ciuili seruus, et, ut sunt dominorũ m̃cipia, suo spoliatus esse arbitrio. Quippe eadẽ ratione omnes, qui honesta sequuntur, quiq; ex natura uiuunt, quia obtemperant legi naturali, serui erunt, naturæ dominatu pressi. Quid aliud est enim legibus parere, quàm philosophiæ præceptis obsequi, & obtemperare? atq;, vt natura flagitat, uiuere, ac uirtutibus omnibus non modò uitam suam ornare, uerùm etiam se eis addicere? quod quidẽ sponte sua fit, nec quisquã vnquã bonus uirtutẽ sequitur coactus, aut inuitus, itaq; sicut honestum, ita et ius est ultrò, et per se expetendum, quod se in omne honesti genus, in omnesq; uirtutes fundit, legesq; ipse sunt totius honesti præceptis accom-

modata, iubent enim ea, quæ sunt uiri non solum iusti, uerum etiam fortis prudentis, temperatisq; et quæ sunt mansueti, et mitis animi, idemq; facit in cæteris uirtutibus. ac uitijs hæc iubens, illa prohibens, mensq; legis latoris naturam iusti, et æqui semper spectat, eoque quæcunq; iubet, aut uetat, dirigit, donec omnia hauriat, quibus iustitia absoluta perficitur. hanc nos quidem legem nominamus, et à legendo nomen fecimus quæ Græci νόμος dici maluerunt, quod per eam unicuiq; suum tribuatur. illi siquidem in legis nomine, æquitatis uim, nos uerò delectus naturam attendimus. ut ut sit id, si rectè perpenditur, nihil planè aliud est, quàm ipsa ratio humanas actiones ad signum dirigens, omnium domina, atq; regina, quæ oportet esse in omnium animis, et cum ea nos constat esse natos, unde si rectis sensibus ire uolumus, unusquisq; potest esse sibi ipse legis lator, sibiq; honesta, et iusta præscribere, prohibereq; contraria. Cum igitur lex sit hominum generi à natura data, nemo non à mente alienus eam iure accusare possit, aut insimulare, seruituti nos addicere, cum seruitutem ipsa per se natura oderit, semperq; libertati studeat: legem porro nobis à natura datam, ita probare solent. aiunt enim nobis à natura datam esse rationem, si ratio, etiam rectam rationem. at lex nihil est planè aliud, nisi recta ratio iusta in natura, in iubendo, et vetando, honesta imperans, turpia prohibens; et ubicunq; lex ipsa dominatur, omnes sunt in officio, recteq; se habent, et ordine administrantur omnia. quoniam nutu rationis res fluunt, ratioq; ipsa potius, quàm lex dominari uidetur. Quapropter nisi lex scripta accommo-



data existat ad naturam, quæcūq; ea sit, est magis quid-  
 nis aliud, quàm lex, minimeq; legis nomen meretur.  
 Lex enim est recta ratio profecta à natura, ad recta fa-  
 ciendum impellens, et à delicto auocans, quæ non  
 tunc esse coepit, cum fuit scripta, sed potius intelligi  
 potest fuisse semper vnà cum mente diuina, quæ semper  
 existit, et nunquam esse coepit. quod prastantissimus  
 theologorum omnium inter nostros innuere videtur,  
 cum suam theogoniam ita altè exorsus. vt vix nos hu-  
 mi strati intelligentia capere valeamus, inquit. ΕΝ  
 ἀρχῇ ἦν ὁ λόγος, καὶ ὁ λόγος ἦν πρὸς τὸν θεόν, καὶ  
 θεὸς ἦν ὁ λόγος. οὗτος ἦν ἐν ἀρχῇ πρὸς τὸν θεόν.  
 cum ea enuntiaret de vnigena dei filio, qui est patri  
 coæternus, vera ratio, vera lex, intimum animi uer-  
 bum, abstrusaq; cogitatio, sententia, voluntas, mens,  
 atq; consilium. Caterum tamen hic distinguendum,  
 cum de lege loquimur, ne genera confundentes obscu-  
 ritate inuoluamur. Sicut enim ius, iustumue est, tum  
 naturale, tum ciuile, quod legitimum vocamus, ita de  
 lege quoq; planè dicendum est. nempe alia est natu-  
 ralis, alia ciuilis, aut scripta. cum legem nomino,  
 de eo imperio intelligo, quo non tantum ciuitas, sed  
 domus etiam omnis, et familia continetur, sine qua  
 nec gens vlla, nec mundus ipse, nec vniuersa natura  
 stare possit, qua omnia deo, rationiq; obedire est ne-  
 cesse. Naturalem quidem illam principem, et ultimam  
 legem mentem esse dicunt, omnia ratione aut cogentis,  
 aut vetantis dei, ad iubendum, deterrendumq; idoneam,  
 non ingenij; hominum excogitatam, neq; scitum esse ali-



quod populorum, sed æternum quoddam, quod uniuer-  
sum mundum regit incredibili, imperandi, prohibendiq;  
sapientia, neq; eam opinione hominum constitutam, sed  
diuinitus existentem, diffusamq; in omnes, constantem,  
immutabilem, perpetuam, sempiternam, quæ ad offi-  
cium tacite nos, & ad rectum vocat, iubendo, vetan-  
do, à fraudeq;, & ab inturia deterrendo. huic legi qui  
obtemperat, non indiget neq; Lycurgi, neq; Solonis,  
neq; Charundæ legibus. habet enim in se ipse legem sibi  
semper præsentem, præscribentemq; quomodo se ge-  
rat, primum erga deum, quem colere in primis cuncti  
debent, quo deinceps iure viuatur non modo cum illis,  
quibuscum societate aliqua iungitur, sed etiam cum  
vniuerso hominum genere. ea profectò docet nostra lu-  
cra alienis incommodis non querenda, vetatq; ne alte-  
ri noceamus nostri commodi causa, nostrumq; potius  
feramus incommodum, quàm quicquam de alterius com-  
modis abradamus, detestaturq; vehementer omnem de-  
tractionem, appetitionemq; alieni, quam scientiam, ac  
notionem ipsa per se natura iniecit in animis nostris,  
neq; quisquam est omnium, qui non secum tacitus hæc  
sentiat, ac videat, & huic quidem legi sua sponte ob-  
temperant cuncti. atq; obediunt. Alterum legum ge-  
nus in diuisione fuit, quæ ciuiles, atq; humane dicun-  
tur. & harum quidem sunt duo rursus genera, vnum  
quidem earum, quæ haud scriptæ extant, sed tacita gen-  
tium consensione ab omnibus seruantur, vocaturq; ius  
gentium, quo iure omnes gentes inter se utuntur, ac ui-  
uunt. neq; est ulla serè tam barbara, tamq; remota na-

tio, apud quam id non valeat tam belli, quàm pacis tem-  
 pore, non adeo multum distans ab eo, quod dicimus natu-  
 rale, vt etiam à peritis naturale interdum nominetur,  
 quod qui violarit, scelestus, impiusq; ab omnibus ubiq;  
 iudicatur. hoc secundo iure munitæ, tutæq; sunt lega-  
 tiones, fœdera stabiliuntur, solidantur pacta, & om-  
 nes contractus tam in emendo, & vendendo; locando,  
 & conducendo, quàm in cæteris contrahendis, transi-  
 gendisq; rebus firmantur. Tertium genus est earum le-  
 gum, quæ scripto habentur à sapientissimis viris legum  
 latoribus excogitatæ, rogatæ, atq; latæ, iussa, et ve-  
 titata populorum vocant, quibus in singulis ciuitatibus,  
 totaq; interdum prouincia, & non nunquam latissimis  
 regnis respub. continetur. Illa porro princeps, ac sum-  
 ma lex, æterna existit, et neq; tolli vlla lege alia, neque  
 abrogari potest. est enim in natura infixæ, atq; ingene-  
 rata. quippe quæ natura existunt, sunt immutabilia, &  
 vbiq; valent, vt ignis, sicut apud nos, ita apud cunctas  
 gentes adurit. Est igitur illa diffusa in omnes gētes per-  
 petua, cōstans, sempiterna, quam nemo ignorat, cui tam  
 dii quàm homines, vt aiunt, sunt obnoxij. Est enim il-  
 la, quàm Pindarus in quodam cantu, ubi de Hercule agit,  
 canit esse reginam omniū mortalium, atq; immortalium,  
 quæ ius vbiq; dicit præpotenti manu. eam autem Em-  
 pedocles, vt refert Aristoteles, appellauit æthæra, quòd  
 perpetuò diffundat se in omnia, per inexplicabilem cla-  
 rritatem. Gentium verò conuentia, id est perpetua illa  
 cunctarum nationū cōsensio, licet nulla alia unquam lege  
 abrogentur, tollanturue, tolli tamen possent, si denuò

inter omnes gentes secus conueniret . quod quia difficile  
 limum factu existeret , summa enim ratione , quæ est lex  
 diuina , & humana , in eas leges cunctæ gentes consen-  
 sere , hoc ideo quoq; ius dicitur quodammodo immuta-  
 bile , perpetuum , atq; æternum . At scita populorum ,  
 quod fuit tertium in diuisione , quæ inquam singuli po-  
 puli sanxerunt , scribiq; mandarunt , quo in singulis ci-  
 uitatibus in pace uiueretur , alia lege , nouoq; scito tolli  
 possunt , & plerumq; tolluntur , si aut non iure rogatæ  
 fuerunt , easq; vsus coarguit , vt Romæ nouimus Seias ,  
 Apuleias , & Liuias , centumq; alias , aut si eas ali-  
 quis status reipub. inutiles fecit . Nanq; earum quæ-  
 dam latæ sunt perpetuæ utilitatis causa in sempiternum  
 tempus valitura , vt aliquæ cum ipsa vrbe natæ , cun-  
 ctæq; leges x i i . tabularum , quarum nullam vn-  
 quam abrogatam fuisse legimus . quedam vero earum ,  
 quas creuit senatus , populusq; iussit , aliquibus tem-  
 poribus reipub. desideratæ , sunt quodammodo morta-  
 les , & pro temporum varietate mutabiles . nam sicut  
 in nauis gubernandæ ratione , alia in prospera nauigatio-  
 ne , alia in aduersa tempestate vsui sunt , ita in admini-  
 stratione reipub. belli tempore leges sciscuntur in populis ,  
 quæ post secutam pacem abrogantur , & planè inutiles  
 fiunt . quod etiam de omni temporum mutatione , in-  
 elinationeq; intelligo . Sunt etiam aliquæ , quas in-  
 dies ætas retractat , expolitq; , & in meliorem ra-  
 tionem mutat , nanque humana solertia non omnia ,  
 quæ cogitat , illicò perfectè videt , ac sentit , verum  
 in dies hominum ingenia magis , ac magis acun-

tur, atq; illustrantur, & persæpe quæpiam, quæ animus tuus heri, & nudius tertius ignorauit, hodie scire incipit. natura enim paulatim nobis sese detegit, atq; enudat. iccirco quotidie, prout tempus desiderare videtur, nouæ conduntur leges. nam quicquid senatus creuit, populusq; iussit ad ciuilem, popularemq; vsum, lex habetur. Etenim, vt in humanis corporibus pro ratione morborum noua sunt semper admouenda remedia, ita in administranda repub. ad coercendam improborum ciuium licentiam, leges rogandæ, ac ferendæ sunt tempori congruentes. Ciceronis ætate, vt ipse refert, nondum decem, & centum anni exierant, ex quo de pecunijs repetundis à L. Pisone lata fuerat lex, nulla antea cum fuisset. Cæterum leges, quas tu carpis varias esse coarguens, atq; inuicem sibi contrarias, nullo pacto leges existere censemus, easq; magis populi fauore, quàm merito legum nomen tenere arbitror. Formulas vero illas, vt ad omnia à te obiecta respondeam, tam stipulationum, quàm iudiciorum, quæ tenui de causa, nimisq; exili, atq; abiecta scriptæ tibi videntur, vt de stillicidiorum, parietû, & aquarum iure, de cloacis, deq; domorum, & prædiorum seruitutibus, non parum necessarias prisca illi nostri existimarunt ad tuendam ciuium pacem, ac quietem, qui persæpe istis de rebus inter se controuersantur, & litigant, ad iurgiaq; & ad manus veniunt. Multa tamen fatendum pestifera, & perniciofa interdum in populis scita fuisse, vel principum scelere, vel populi ipsorum negligentia, aut auaritia, quæ quodq;

aliud potius sunt, quàm leges, vt si non totius ciuitatis, sed principis duntaxat, aut vnius tantum partis ciuiũ gratia constitutæ fuerunt, aut si non maiori saltem parti, & in summum prosunt, fraudes potius corruptæ, et deprauatæ ciuitatis, quàm leges dicendæ sunt. quandoquidem oportet leges, & iura consentanea esse naturæ, ac rationi, quæ omnibus vniuersè est eadem. & vt tandem breuiter, sicuti res est, eloquar, illa princeps summa, & vltima lex à deo ipso lata, & in cordibus nostris infixæ nobiscum nascens, si rectè, atq; perfectè à nobis intelligeretur, vellemusq; congruenter naturæ viuere, nemo nostrum alia lege scripta indigeret, essemus enim omnes natura iusti. iustis autem legem non constituendam nemo est qui nesciat. cum, sicut dixi illa sit iusti, atq; iniusti distinctio. continet namq; in se, atque complectitur omnes leges cum scriptas, si rectè, optimoq; iure rogatæ fuerunt, tum eas, quas omnes gentes diuturna consensione approbarunt, tam iuris publici, quàm priuati, ab eademq; natæ sunt apud nos primum quidem xii. tabularum leges, deinde aliæ per multæ, quibus alis confertos esse consultorũ libros. summa enim illa tanquam genus vniuersum se virtute fundit in omnes, fons publici, priuatiq; iuris, ad officium, ad recteq; faciendum impellens, & à delicto auocans, cupiditates, quæ nascuntur in animis, tanquam quosdam morbos coercens, atq; refruens, bene facere iubens, quibus possumus, prohibensq; ne cui noceamus commodi præsertim nostri causa, sed quales se gerere, erga nos ceteros mortales cupimus, tales nos itidem

erga alios omnes esse potenter imperans. Huc porrò spectant omnes leges. id vnum incolumem quietà, beatamq; seruat, ac tuetur ciuitatis coniunctionem. id firmissimum est nō modò rerum pub. sed totius humani generis vinculum. Quoniam vero ea, quæ sunt à natura, hominum industria plerunq; meliora fiunt ( etenim quæ natura inchoat, hominum sapientia perficit, quæ uè cōfusa, et quasi per caliginem, ac nebulam quandam nobis ostendit, nos distinguentes illustramus ) sapientissimi homines legum latores, quorum antiquissimi fuerunt in Græcia Minos, et Rhadamanthus, philosophiæ lumine adiuti iuris, ac iusti, quod erat planè inuolutū, naturam, ac vim mortalibus ostenderunt, & quæ natura fusa, & liberè animis hominum suggerit, illi articulim, distincteq; diuidentes in genera plurimos ab eo fonte riuulos deduxere, legesq; iudicia, et iura enucleatè descripsere, vt agnationum, gentilitatum, tutelarum societatum, fiduciarum, mandati, creditæ, depositæ uè pecuniæ, usucapionum, alluuiorum, seruitutum, nexorum, mancipiorum, parietum, luminum, multorumq; aliorum, declarantes, quæ publica, quæ uè priuata, quæ testamenta rupta sint, quæ uè rata, quid suum cuiusq;, quid alienum, quid sacrum, quid profanum, qui ciuis, qui peregrinus. qui liber, aut seruus. et quoniam delictis pœnæ constituendæ sunt, vt quos natura, aut ipsa turpitudine, & pudor ab iniuria arcere nequeunt, pœna saltem, & suppliciorum metus deterreat, ne magistratus, & qui repub. gerunt, improbis ignoscendo bonos perditum eant. quæ enim rogo esset

hominum vita? quomodo res se haberent, si omnibus  
 proposita esset agendi, quicquid collibitum animo esset,  
 impunitas? Cum igitur delictorum distincta sint gene-  
 ra, diuersa quoque legum capita conscribenda erant pro-  
 pter eos, qui nihil timent, nisi testem, & iudicem, neque  
 honesto ipso quicquam mouentur, ut boni sint, & in-  
 nocentes, quo noxia par esset poena, atque animaduer-  
 sio, quod probari potest in tribus delicti generibus, quæ  
 cum paria iudicentur, vna eademque animaduersione in  
 x. i. tabulis antiqui coercenda statuere, parique suppli-  
 cio eorum reos afficiendos, proditorem patriæ, sacrilegum,  
 & legum euerforem. Si nullum existeret ius scriptum,  
 errari posset in multis, non tam opinionum vanitate,  
 aut quod non omnes ius naturæ per se nullo docente sen-  
 tiant (æquitas enim per se omnib. elucere potest) quam  
 quia homines aliqui inducti specie alicuius commodi re-  
 cusent viuere congruenter naturæ, & iuri naturali pa-  
 rere. Quoniam item interdum contingit, ut ea quæ  
 aliquando iusta sunt, procedentibus ætatibus, aut aliquo  
 casu mutari possunt, & esse minus iusta, opus fuit lege  
 scripta, quæ tum improbos ab iniuria deterreret, tum  
 ab errore auocaret ignorantes. Atqui forte inquires. er-  
 go omnia esse iusta defendis, quæ posita sunt in populo-  
 rum institutis, et legibus? id hercle ego minimè. inter-  
 dum enim errant homines, etiam qui habentur sapien-  
 tiores. nemo namque præter deum est verè sapiens, qui  
 neque errare, neque falli potest. Porro leges condere res  
 est ardua, quæ non modò consilio, atque prudentia pluri-  
 mum indiget, sed etiam, ut sensit Plato, sine diuino fa-



uore, atq; præsidio, seniorumq; consilio id munus perfectè minime impleri potest. Iccirco facit Socratem ante suarum legum promulgationem cœlestæ auxilium implorare, & inuocare Adrastian, quam dicebant immutabilium legum esse reginā, cuius reginæ nec oculos, nec manus alicui licebat effugere. Hanc vir prudentissimus fingitur sibi assistere voluisse, ne fortè in describendis legibus erraret, quem errorem idem Plato plurimis verbis vehementer detestatur. Perrarò tamen solerti homini contingit errare, si in ferendis legibus nihil ab illa principe, & summa lege deflectat, quam sequi debet, & ad illam cynosuram cursum tendere, sicut in omnibus etiam rebus industria, et solertia humana, quoad potest, imitatur naturam. quamobrem ciuitatum scita, & instituta nihil aliud esse videntur, quàm illius æternæ legis quædam quasi explanatio, atque illustris explicatio, quæ eam omnibus apertam, et dilucidam reddit, in qua dixi fusa consistere omnia iura, & iusta, quasi legum occulta quædam semina. neq; absurdum cuiquam videri debet, cum in alijs quoq; rebus permultis humani ingenij solertia naturæ latebras, & obscuritatem scrutetur, atq; adhibito rationis lumine illustret, quando homo homine acutius videt, & vnus interdum perspicit, atq; intelligit, quæ nemo aliorum omnium ullis vnquam ætatibus intelligentia consequi potuit. Verum tamen nisi leges omnes, quas quisq; tulerit, ad illam principem referantur, ad illamq; respiciant, & illi sint omnino consentaneæ, et ad naturam, quæ nihil nisi iustum admittit, accommodatæ exi-

stant . nullo pacto leges sunt habendæ , neq; hoc nomine dignæ censentur . Igitur omnis legis latoris mens , et ratio huc dirigenda , cuius officium est de honesto , bonoq; , et iusto considerare , eaq; populis , qui sunt futuri felices , proponere , et legum quasdam quasi formulas , quas illi sciscant , describere , vt rerum publicarum administratio recta , vitaq; ciuium sit prudens , fortis , temperata , et iusta , cæterisq; munita , atq; adornata virtutibus , in quas , vt diximus , omnis lex naturalis se fundit . hæc verò omnia complexi vno verbo honesta dicimus . Nihil porrò præclarius , quàm videre ciuitatem optimis florentem moribus , et institutis , virtutibusq; ornatam , quas leges ipsæ singulatim nobis proponunt . iubet lex naturæ ea , quæ sunt hominis fortis , quod quoniam late patet , constituunt distinctè legum latores , iubentq; præstituta , ac descripta poena , ne quis in acie locum deferat , neu fugiat , neu arma abijciat . rursus eadem natura iubet ea , quæ sunt temperantis . apertius illi vetant adulterari , vetant quoque conuicio quenquam verberare , et ab omni petulantia per singula genera discurrendo abesse , eaq; omnia persequuntur , in quibus notari possit intemperantia . itidē pariter in omnibus virtutibus , et vitijs se gerentes faciunt , et à virtutibus legum suarum semina eliciunt . Leges vero quæ variæ sunt , inconstantes , inuicemq; sibi contrariæ , censeo omnino tollendas esse , aut vtrasq; , aut alterutram , illamq; quæ à iusto discedit , ac ratione penitus vacat . Nam omnino iniquas à tyrannibus ciuitati impositas , atq; iniustas , in quibus non proponitur

utilitas, neq; commoditas saltem maioris partis ciuium,  
ad ipsorum tyrannorum commodum tantum latis, nul-  
lo pacto leges habendas diximus, nullq; omnino rem,  
aut rationem esse nobis cum tyrannis in hoc tam pre-  
claro negotio pertractando. reddidimus etiam causam,  
cur mutabiles essent aliquæ, quæcunq; quæ promulga-  
te initio mirum in modum placuere omnibus, postea  
procedente ætate antiquentur, abrogenturq; non mo-  
dò illæ, quæ nō sunt perpetuæ. sed ad tempus introductæ,  
verum etiam in æternum latæ. quod nulli mirum adeo  
videri debet, qui norit omnia hæc humana, atq; infe-  
ra perpetuo esse in motu, vt Platonem dicere tu quoq;  
ipse aduersus te pro mea sententia confessus fuisti, usq;  
adeo, vt quidam philosophi ambigant, an eadem hodie  
sit respub. aut ciuitas, quæ heri, & nudius tertius.  
sicut etiam de fluminib. quæ perpetuo fluunt, quæri  
solet ab ijs, qui naturam speculantur, & idem signifi-  
cantius natura exprimit in auinis nostris. Siquidem  
per sepe quod heri mihi consilium mirum in modum pla-  
cebat, hodie non ita, illudq; aut prorsus abijcio, aut  
saltem aliquibus, vel additis, vel detractis excultum  
perpolio, exornoq; & in melius refero. Draco, fa-  
teor, apud Athenienses leges scripserat, quas deinde  
Solon ferè omnes sustulit, quod in illis mors erat defi-  
nita poenæ tam ijs qui furati essent olera, quàm sacrile-  
gis, & patriæ protitoribus, peccataq; omnia perinde,  
ac si essent paria stoicorum sententia, ultimo supplicio  
multauerat, tam capitalia, quàm illa quæ aspersione  
aquæ, vel dierum numero tolli dicuntur. propterea

ferunt Demaden quendam acutè dicere solitū, non atramento, sed sanguine Draconem leges suas exarasse. Rectè vero excogitatas, scriptasq; leges illi supremæ, idest menti diuinæ consentaneas, ac naturæ congruentes nemo vnquam verè redarguere possit. liquet namq; eas ad hominum salutem, ciuiumq;, & societatum incolunitatem, & ad eorum quietem, tranquillitatem, securitatem conditas fuisse, vt illi non tantum commodè, tutoq;, sed etiam honestè, ac beatè viuerent. sunt enim ad naturam accommodatæ, eamq; adiutant, excolunt, atq; adornant. Neq; est quòd ciuitatibus propter leges seruitutem obijcias. Nos legibus libenter, nostraq; summa voluntate seruimus, omnes vt liberi esse possimus, quibus qui parent, rationi obtemperant, quæ est legum ipsarum procreatrix, emendatrix, conseruatix, iusta, & iniusta dijudicans, iniuriæ, & prauitatis vindex. qui vero eis non obediunt ad naturam propius belluorum, quàm hominum accedunt. his coercetur improborum licentia. hæ vocant ad rectè facta. à peccatis auocant. hæ cauent ne improbi nimium possint cum bonorum periculo, ac detrimento. hæ volunt diuites, & tenuiores æquè posse in omni coetu, ac ciuitate. harum ope hominum animi nimia libertate non insolescunt. his potissimum homines à pecudibus differunt, neq; vtuntur ad cibum, aut ad libidinem, fraudeq; inuicem abstinēt. hæ supplicio afficiunt improbos, bonos vero defendunt, confirmant, commendant. augent quæ ab eis poenæ constituuntur, infligunturq;, sunt quædam quasi salubres animorum morbis adhibitæ medicinæ.

his

his summi, & infimi iuxta parent. magistratus quoq;  
eisdem, principes, imperatores, et reges ipsi obe-  
diunt. his sine neq; latronū societas diu stare possit. Par-  
ua persequor. legis imperio mediusfidius cælum ipsum  
est subiectum, vniuersusq; mundus, & omnis natura  
obtemperant. Hæc viri amplissimi coactus fui de legū  
natura altius fortasse, quàm expectabatis, repetere, in  
qua re non sum iudicandus fuisse multus, cū, etiam si  
non Flaminio respondendum fuisset, haud planè de re-  
pub. differi possit, nisi vis legum prius explicetur, qui-  
bus tanquam firmissimo fundamento omnis ipsa respub.  
nititur, fulcitur, ac continetur, legesq; ad omnem ci-  
uitatem fundandam, temperandam, ac conseruandam  
non tantum sūt vtiles, sed omnino necessarie, quæ in  
quocunq; hominum cœtu, aut societate parum valent,  
nulla ibi esse potest respub. aut ciuitas. Veteres ideo  
dixerunt eas vinculum esse totius dignitatis, quam te-  
nemus in repub. easq; vocarunt tum fundamentum li-  
bertatis, tum fontem æquitatis, in eisq; mentem, &  
animum, consilium, & sententiam ciuitatis positam es-  
se, & vt corpora nostra sine mente, atque animo, sic  
ciuitatem sine legibus, suis partibus, ceu neruis, & san-  
guine, ac membris vti non posse. Ex his Flaminii,  
quæ à me hæcenus dicta fuere, omnes tuæ argumen-  
tationes, cunctæq; rationes cuiq; æquo rerum æstimatori,  
recteq; intelligenti profligatæ, prostratæq; iacere videri  
possunt, confectumq; negotium. Veruntamen con-  
feramus propius, & tua argumenta ad veritatem re-  
uocemus, ad singulaq; quæ restant, à te obiecta non-

nulla breuiter, & conclusè dicamus. At verò quor-  
 nam tua propè omnis oratio versata est circa deformi-  
 tatem morum, iactauitq; se rota in rebuspub. et ciuita-  
 tibus vbiq; terrarum prolapsis, ac deprauatis, quero  
 de te, autumes'ne tempus vnaquam fuisse vllam, quo ci-  
 uitates, & respub. toto orbe fuerint meliores? arbi-  
 traris'ne rempub. inter omnes gentes florentem mori-  
 bus, & institutis, omnibusq; virtutibus ornatam for-  
 mari posse, atq; institui, vt detractis cūctis vitijs pul-  
 cherrima sit, & impleat omnes numeros, omni lau-  
 de cumulata? Non potes hercle negare, si quid planè  
 perfectum fuit vnaquā in rebus humanis, & absolutum,  
 posse quoq; etiam nunc existere. quod etiam visus es  
 fateri, cum diceres philosophos eas respub. descripsisse  
 in fortunatorum insulis, quæ magis fingi possunt, quàm  
 reperiri. Quæso rursum. nunquid illi philosophi, qui  
 instituunt respub. præcipiant ciuibus, qui futuri sunt  
 beati, ea quæ effici possint, licet factu difficilia, an  
 quæ nullo pacto fieri queant? vt si mihi quis deus sum-  
 mam cœlestium felicitatem spandeat, si viribus corpo-  
 ris annixus Aegæum mare transuolauero, quod quidem  
 irritum foret, vanum, & nugatoriū. Primum quidem  
 cretendū est sapientissimos viros tam in Græcia, quàm  
 alibi, quos sua quæq; ætas vehementer admirata fuit,  
 vt in quibus existeret summum ingenium, summāq; pru-  
 dentia, non ea præcepta viuendi tradidisse, quæ nullo  
 modo homines obire possent. nugari enim, & iocari in  
 re tam seria, & graui ineptè, atq; intempestiue omni-  
 bus visi fuissent. nempe ciuitates, ac respublicas ea ab-

solutione, ac perfectione instituerunt, ut facile in eis bene, & beatè viui posset. Si igitur tales esse queunt ciuitates, aut respub. fuisse etiam aliquando, aut nunc esse, aut futuras fore fatendum est. fuisse certe non negabit, qui ad ciuitatis nostræ, populi inquam orbis terrarū principis prima illa tempora felicissima respexerit, cum res, ut ait Ennius,

Moribus antiquis staret Romana virisq;. Cum populi sūma potestas esset, sūma senatus auctoritas. qua repub. nullā unquā neq; maiorē, neq; sanctiorē, neq; bonis exēplis magis abūdantē fatebitur, qui apud optimos scriptores legerit, quæ vita ciuium, qui mores fuerint, quibus artibus, & domi, & militiæ Roma creuerit, partumq; sit. & auctum imperium, cum domi, belliq; boni inquam mores colerentur, hominesq; malarum artium essent planè insolentes, in quorum domibus memoratur nihil splendidum fuisse præter ipsos. nōdum in ciuitatem auaritia, et luxuria immigrauerant. voluptatibus, & cupiditatibus nullus erat tunc locus, quibus nunc laxatæ sunt habentæ, hominesq; ferè conuersi sunt in belluas. Itaq; si aliquando fuerunt aliquæ respublicæ bene institutæ (nempe qui colligunt annales vrbs nostræ tam Græci, quàm Latini, huiusmodi Romanam ciuitatem fuisse pleno ore contestantur, priscorumq; temporum, cum res essent optimo statu, laudes insatiabiliter deprædicant) posse etiam sperari futuras fore non negabit. De iniustitia vero, auaritia, ac rapacitate Romanorum, quos tu insimulas omnia omnium regna, atq; imperia vi, & armis ad se transtulisse, ni-



hil magnopere hic laborandum esset, cum luculenter  
proditum sit memoriae tot doctissimorum hominum lite-  
ris, nullam vspiciam nationem fuisse iustitiae, aequitatisq;  
seruantiozem, vt neq; mea; neq; alterius cuiuspiam in-  
digeat propugnatione. Attamen ego Cremonae in ho-  
nestissima Romanorum ipsorum Colonia Romanis pro-  
genitoribus natus non possum pietate salua deesse anti-  
quae patriae defensionem, in tam manifesta praesertim ca-  
lumnia, tamq; acerba impugnatione, quod neq; cuiquā  
vestrum molestum fore duco, cum nemo sit, de quo ali-  
quopere non benemerita fuerit ea ciuitas, aliqui etiam  
in ea rem suam bene gesserint, multoq; melius fortasse  
gesturi sint in posterum. Ac ne cui loco Flamini uidea-  
tur à me non responsum tuae criminationi, dico primum  
falsum esse vulgi veterem opinionem. Nullam rem-  
pub. posse administrari sine maxima iniuria, quam sen-  
tentiam audio confutatam fuisse olim, prostratam, ac  
protritā plurib. & illustribus literis à P. Scipione  
apud M. Tullium Ciceronem contra Philonem inductam  
personam, vt nihil mihi sit opus hac de causa nunc pri-  
uatim aduersus te dimicare, cum ex ijs, quae haecenus  
à me fuerunt dicta, possit videri etiam ad hanc rem  
vniuersè satis responsum fuisse. Quatenus verò atti-  
net ad populum Ro. equidem fateor eam ciuitatem exi-  
guis profectā initijs eò opum, ac fortunarum creuisse,  
vt Roma dei opt. max. fauente numine, ne dicam an-  
tiquorum more, satis volentibus, atq; ferentibus, to-  
tius orbis terrae imperij sedes fuerit, nullaq; humanae  
opes armis Romanorum resistere valerent. neq; sanè

inficias ierim Romanos armis vniuersa, & terra, & mari suæ ditionis fecisse. fuerint primi tantæ vrbis cōdutores, vt libet pastores, & fugitiui, peior etiam, & sordidior quantum vis, illa omnis conuenarum manus, dum tamen eorum ducem, ac regem propter præclarè facta deum deo prognatum patre crediderit omnis anti-guitas. Defendimus verò nihil ab eis Romano imperio adiectum, quod non optimo iure, & summa æquitate quæsierint. Principio quidem contempti, spretiq; à finitimis populis præ superbia renuentibus cum gente noua sanguinem, & genus per nuptias commiscere, addita etiam id summissè petentibus verbis contumacibus, atq; procacibus contumelia, eorum virgines vtcunque ad sese illectas sibi copularunt, ne sublato fœminæ usu, omnis spes futuræ ciuitatis funditus interiret, frustra q; moliti essent tantæ vrbis fundamenta. quod quidem factum iure naturæ defendere poterant, quæ semper intenta est cuiusq; generis per continentem sobolis procreationem conseruationi, communiterq; instum est eadem naturæ omnibus animantib. vt habeant libidinem procreandi, cum raptas præsertim mulieres in matrimonij legitimam coniugationem duxerint, in societate, inquam, eas acceperint non modò ciuitatis, sed etiam fortunarum omnium, & liberum ipsorum, quo nullum vinculum arctius esse possit, nulla charitas sanctior. quicquid ei vrbi iam opibus validæ deinde accreuit, dei euenit ipsius propitij fauore, atq; propensa beneuolentia, accedente populi ipsius virtute. nam multi circum populi sese Romanorum virtuti vltro dedidere, ut Col-

latini, & Campani à Samnitibus oppressi, multiq; per-  
 varias etates alij. plurima præterea & gessere, &  
 consecere Romani bella irritatis circumquaq; finitimo-  
 rum animis, ægrè ferentium, neq; patientium tantam  
 molem propè res suas consurgere. nullum tamen bellum  
 ex tot ab illis vnquam susceptum fuit non iustissimis de  
 causis, non summa æquitate, quæ apud eos optimo iu-  
 re sanctissimè præscripta erat, bellumq; gerebant, vt  
 quieti communi consulerent, vt inquam pia, & æterna  
 pax esset, & nihil in posterum haberet insidiarũ. Re-  
 ligiosissimè adeo is populus iura belli seruauit, vt nul-  
 lum iustum duellum esse ducerent, nisi quod ante rebus  
 repetitis denuntiatum esset, riteq; indictum, vel nisi  
 pro rebus ablatiis, vel de imperio gereretur contra eos,  
 à quibus ipsi prius iniuria fuissent laceßiti, vel qui ius,  
 & fidem, fœderaq; religionum, et deos ipsos neglexis-  
 sent, ne quid tale ipsi postea committerent, ceteriq;  
 tardiores essent ad iniuriam. In bello quoque mouendo  
 sicut summa æquitas procul ab omni dolo malo, ita etiã  
 summa erat obseruatio, vt viderentur non hostilem in  
 modum agere, sed patrijs legibus cum hospite, ac pere-  
 grino ciuilem in morem domesticam rationem contra-  
 here. Ideo qui olim cunctis populis Latinis perduellis  
 erat, ipsis placuit mitigato vocabulo vocari hostem,  
 quod nihil differt ab hospite. Nempe deos prius sem-  
 per testes faciebant tanta cerimonia, ac religione, vt  
 propius ad superstitionem videretur. Siquidem cum  
 patre patrato res agebatur, interpositis fecialibus ora-  
 toribus belli, & pacis, fœderum, & induciarum indi-

cibus ; ac disceptatoribus , aut verius sacerdotibus , tot verbenis , tot graminis puri , ceterarumq; herbarum velamentis , tam multis vltro , citroq; repetitis rogationibus , tot legibus solenni ritu recitatis , tot imprecationibus , execrationibusq; contra eos , qui fallere mente agitent . Hinc ius feciale inductum , quod deinde ab omnibus gentibus receptum fuit , tanquā summa equitate præscriptum , sanctissimeq; constitutum , quo in hanc vsq; diem reges , populi , nationesq; etiam longinquæ vtuntur . cum omnibus fœdera religionum , quibus cum hoste deuincitur fides , sancte seruabant , vsque adeo , vt singuli nefas ducerent cum non legitimo hoste soluti sacramento pugnare , & quod aliquis temporibus adductus hostibus spondidisset , in eo ipso fidem seruandam voluerunt , multiq; ideo duces hostibus à patre patrato dediti fuere publico consilio , qui priuata temeritate contra publicas rationes aliquid cum illis pepigissent , nonnulli quoq; cum iure iurando tenere itur , aut ipsi fide pleni ad crudelißimum hostem , vt promiserant , vltro redierunt ad certum , paratumq; supplicium : aut iurati sua sponte non redeuntes à senatu victi remissi fuere , ne conditiones , pactionesq; bellicæ priuato periurio perturbarentur . mandatum quoq; literis fuit , sæpius imperatores nostros proditorū scelere dolo malo potuisse facile vincere , & conficere maxima bella , verum abstinuisse , quod esse viri probi , ac fortis ducerent consequi , quod vellent , virtute , consilijsq; honestis , non fraude , aut malitia , ipsosq; proditores , tanquam societatis humanæ communes hostes ,

ad suos in vinculis censuere deducendos. Innumerabilia hic mihi memoranda essent, de populi Ro. istius generis equitate, si id in presenti maxime agerem, quæ omnia omitto, cum ad eos viros loquor, qui multa, & audierunt, et legerunt ipsi, quæ populus omnium gentium. victor terra, mariq; facinora præclara fecit. Vnum vero satis existat pro omnibus argumentis Romanæ equitatis probandæ, quod memoriæ proditum fuit, Quinti Fabij Labeonis arbitri à senatu olim dati Nolanis, & Neapolitanis de finibus utriusq; populi iudiciû publica auctoritate ab omnibus improbatum, repudiatumq;, quoniam, licet speciem aliquam publicæ utilitatis præferret, ab honesto tamen, & ab equitate recedere iudicatum fuit. Exitus quoq; bellorum ipsorum illis victoribus aut mites erant, aut necessarij. quandoquidem, vbi de imperio decertabatur, Lenius cum victis agebant, modumq; seruabant in puniendo, memores semper rerum humanarum. atq; animaduersum est nulli populo de hostibus mitiores placuisse pœnas. plurimos enim populos armis subactos, atq; deuictos constat ab eis in societatem, atq; in ciuitatem etiam, & communionem rerum omnium susceptos fuisse, vt Tusculanos, Aequos, Volscos, Sabinos, Hernicos, ceterosq; non parum multos tum Latinos, tum Hetruscos, et complures alios. Nempe alia ratio erat, vbi inter duos populos certabatur, non vter imperaret, sed vter esset. interdum eos adegit necessitas, vt in victoria suæ mansuetudinis paulum obliuiscerentur, sicut olim contra Senones, & Gallos, maxime contra pœnorum

pœnorum perfidiam Numantia , Carthagineq; diru-  
tis , atq; deletis toties ab hoste superbissimo neglecta fi-  
de , violatisq; fœderibus , ac deceptis dijs . In ceteris  
omnibus bellis mitius semper egerunt , vt eius populi  
proprium , & germanum esse videretur , quod à pru-  
dentissimo poeta vno versu elegantissime cōclusum fuit,  
regere imperio populos ,

Parcere subiectis , & debellare superbos . proinde  
socios , fœderatosq; , & quicumq; vltro dediti recepti  
essent in fidem , contra vim externam pijs armis defen-  
debant . Hinc factum est , vt Romæ videretur ipsius  
iustitiæ , atq; æquitatis positum esse domicilium , ecq;  
confugiebant exteri , reges , populi , nationes , & qui-  
cunq; inter se habebant controuersias , vt eas de senatus  
sententia finirent , portusq; erat , & refugium omnibus  
gentibus Romæ , atq; illud verè nominari poterat non  
tam imperium , quàm totius orbis præsidium , nostriq;  
imperatores in maxima laude ponebant , cùm socios ,  
prouinciasq; , & gentes longinquas æquitate , & fide  
defendissent , & quos iusto , ac legitimo bello populos  
ipsi subegissent , eis se plerunq; perpetuò patronos , ac  
defensores præstabant , illudq; patrociniū etiā ad  
posterios , & hæredes interdum manabat . Non ne T.  
Quintius populi Ro. imperator Philippo rege , Mace-  
donibusq; deuictis senatus auctoritate in Nemeæorum  
Iudorum celebritate plurima frequentia imperato tuba  
silentio , totam Græciam à seruitute tyrannorum erep-  
tam libertate donauit , iussitq; Græcas omnis propè ci-  
uitates viuere suis ipsarum legibus sub tutela Po. Ro. li-

berasq; , & penitus immunes deducto vndiq; Romano  
 praesidio reliquit , mirantibus cunctis , & vix creden-  
 tibus , esse aliquam vsq; terrarum gentem , quae sua  
 impensa, suo labore, atq; periculo bella gereret pro alio-  
 rum libertate in regionibus longinquis , valdeq; à se tot  
 terrae, marisq; spatijs disiunctis, curaretq; , ac provide-  
 ret tanta diligentia, ne quod vsquam iniustum esset im-  
 perium , sed vt vbiq; ius , fas , lex omnia possent . His  
 porro artibus , atq; virtutibus effectum est , vt vbiq;  
 maximae provinciae in tutela , atq; praesidio populi Ro .  
 esse expeterent , atq; omnia sua eius virtuti , fidei , ac  
 felicitati commendarent , se seq; vltro tam miti , iustoq;  
 imperio , ac potestati subijcerent . cumq; vni ciuitati  
 sua voluntate cunctae ferè gentes obtemperarent , vix  
 sunt Romani , quod tu reprehendis , toto orbe terrarum  
 omnia omnium regna , atq; imperia ad se transulisse .  
 Praeterea urget idem idem , ac clamat Flaminius . in om-  
 nibus reb. pub. & ciuilibus congregationibus pessum se  
 habent mores , demersae sunt leges , & tyrannorum opi-  
 bus , atq; potentia tremefacta libertas iacet , magna-  
 que in omnibus ferme ciuitatibus secuta est perturbatio atq;  
 confusio , eaq; fiunt , vt ab omnib. ferè desitum esse vi-  
 deatur e virtute agi , utq; omnis ciuilis coniunctio ma-  
 gis existat hominibus impedimento , quam ulli usui . ista  
 est sanè ratio hominum parum considerate loquentium ,  
 atq; ignorantium , quae fieri solent in omnibus rebus pub-  
 licis inclinationes , mutationes , & temporum momē-  
 te , quae omnia diligenter colligit Theophrastus , et hu-  
 ius rei praeclare causas reddit . Fatemur quidem , res



publicas , quæ erant olim pulcherrimæ , nunc turpissimas , atq; deterrimas principum per atates negligentia , aut scelere factas esse , & quæ olim in ciuitatibus gerantur bene , rectè , frugaliter , & honestè , nunc malè , prauè , nequiter , turpiter administrari , imperiumq; in cunctis vbiq; ciuitatibus . omnibusq; fermè regnis ex iustissimo , atq; optimo intolerabile factum esse , atque in superbiam , meramq; dominationem conuersum dolemus . Fatebor quoq; , vt etiam de nostra , qui hic sumus , sanctiore repub loquamur , quæ quondã non tam imperio , & bellica laude , quàm summæ sanctitatis fama , quàm miræ probitatis gloria , quàm omnibus egregijs artibus floruit , certè eam nō habemus omnino , qualem ego vellem , sed uix eius euanescentem umbram , & præclara quondam labente disciplina , morum , & temporum vitio vbiq; debilitatam , dilapsam , delumbatā , & fractam tenemus , remissa paulatim seueritate , Effætaq; quodam modo patrum virtute . Verum nunc primum mihi aliqua spes oboritur posse aliquando rem in melius referri , & in pristinam dignitatem , ac splendorem restitui , si unquam ad quenquam vestrum , qui hic tres adestis , vel potius ad omnes , ad alium post aliū admirabili successionē summa tam augusti imperij , tãq; sacrosanctæ auctoritatis summum columen dei immortalis res humanas miserantis munere peruenerit . quod vt me adhuc viuo eueniat ; deum ipsum nuncupatis votis etiam , atq; etiam quæso . Hac , & peiora nos quoq; hanc negamus ipsi , dolemusq; , & inani lamentatione cum bonis non parum sæpe comploramus . Non

tamen proinde nomen reipub. aut ciuitatis cuiquàm videri debet ita detestandum, atque tu arguis, neq; adeò proijciendum, neq; obliuione sempiterna obruendum. Nec Vero eorum vitiorum, quæ tu innumerabilia ad vnum religiosè collegisti, coniunctionem hominum causam fuisse concedimus, vt etiam si non in coetum congregati essent, ab eis non fierent peiora, atq; immaniora. Quid porrò crudelius, truculentius'ue, illæ agresti, barbara, atq; inculta antiquitate, quam tu fabulosam nullo auctore innixus autumas; etatē iam olim fuisse auream, & iustitiam in terris tunc versatam inter homines falsò inculcans? Falleris profectò, et vehementer erras, si tamen ista ex animo enuntiasti, neq; ætates distinguis, sed confundis tempora, omnes illas laudes attribuens asperæ illi, rudi, atq; immani ætati, cum genus hominum esset solutum planè, aut verius dissolutum, sine legibus, sine moribus, sine consilio, antequam ciuili coniuñctio inter homines esset vlla, quæ dicta fuerunt de felicitate illorum temporum, cum primum constitutis ciuitatibus, positisq; vrbibus orta est respub. nam tunc poetæ, quibus vehementer inniteris, iustitiam inter homines versatam terras canunt incoluisse. cum scilicet Saturnus regnaret, quod apertè memorant, quem etiam primum congregandorum hominum in coetus, & conuenticula auctorem fuisse tradunt. Quisquis nostræ huic sententiæ refragatur, legat historicos, qui res Romanas scribunt, Polybium (loquor enim de ijs quorum monimenta nunc extant) Salustium, & T. Liuium. intelliget quantis laudibus prosequantur

Romane reipub. incunabula conferentes cū forma reipub. suæ quisq; tempestatis prima illa tempora, cū ciuitas optimis moribus floreret, cū potestas omnis, vt dixi, esset in populo, in senatu summa auctoritas, cōtinentissimiq; essent maiores nostri, domi modici, militiæ, & in publicis muneribus amplissimi, qui quanto minus virium, atq; opum habebant, tanto minus in illis erat auaritiæ. Quod Romæ contigit, idem ferè omnibus ciuitatibus, & rebuspub. euenisse exploratum habemus. Ita enim natura humane res se habent, vt omnia initio optimè constituta, progredientibus deinde ætatibus, hominum negligentia, animorumq; remissione in prauitatem dilabantur, paulatimq; optimis consuetudinib. de via deflectentibus, dum, suauia quæ sunt, prima mortales habent, neq; consulunt in posterum, cuncta fiant deteriora. videmusq;, vt ait Virgilius.

Omnia fatis

In peius ruere, ac retro sublapsa referri,  
Præsertim si, vt idem subijcit poeta, humana industria non occurrat, atq; adiuuet. Neq; enim verò nos defendimus respub. perennes esse, immutabiles, sempiternas, immortales, neq; ignoramus eas continenter fluere, & labi, ac nunquam eodem statu permanere. Sola supera illa immortalis respub. cœlestiumq; augustissima, atq; amplissima ciuitas, ad quam nobis viuentibus obstructus est aditus, quæue fugit nostram aciem, et humani oculi obtutum, vt pulcherrima, et ex omni parte omnium bonorū confertissima, ita prorsus est immutabilis, æternis legibus firma, atq; robusta, semper eadē,

*semper sui similis, procul omni morbo, ac senio, neq; carie, neq; labem sentit vllā, qua nihil exactius, nihil perfectius, nihil amplius cogitari potest. Inferæ vero planè omnes, quæ nobis sunt aspectabiles, hominum institutis fundatæ, ac constitutæ, non modò obnoxie sunt, vt videmus, mutationi, mobilitati, inconstantie, omniq; motui, inclinationi, atq; momento subiecte, verum etiam interdum stirpitus conuulsæ, atq; euerse intereunt, sintq; illis etiam sua, vt ita ego quoque dicam, fata lege æterna naturæ, vt nihil humani sit sempiternum, sed quicquid existere cœpit, aliquando esse desinat, omniaq; orta intereant. quod nemo non videt, qui non sit planè à sanitate alienus. sed præclarè cognitū fuit ex cunctis tam græcarum ciuitatū rebus pub. olim florentissimis, quàm ex barbarorum opulentissimis regnis, quæ nihil hic attinet singula memorare, cū hanc conditionem neq; ipsa Romanorum res princeps, & caput orbis terræ euitare ualuerit. quandoquidē cū iam nihil mortale eius armis resistere posset, ipsa magnitudine, vi, ac mole laborans sua in se ipsa concidit, & quædam quasi labe corruens desedit.*

*Neq; verò id fatendū est de solis ciuitatibus, rebusq; publicis, verū de vniuersa hominum inter homines coniunctione, deq; omni humano genere, quod interdū vsq; eò insolescit, in eamq; morum, ac vitiorum omnium sentinam dilabitur, vt opus sit maximo illi rerum omnium effectori, ac gubernatori præpotenti manus maximarum terræ partium, ac deniq; uniuersi orbis elutionibus, exustionibusq; mortalium nequitiam vbique*

coercere, totumq; hominum genus paucissimis exceptis delere, atq; extinguere, aeternæ cuiusdam, et inexpli-  
cabilis iustitiæ severitate id exigente, ut noua soboles  
in mundo renascatur. Atq; in oraculis Veræ sapientiæ  
ad æternam vitam editis continetur, ad extremum fo-  
re, ut terræ omnes ubiq; conflagent, totusq; ignescat  
mundus, vnoq; & eodem occasu omnia generata, or-  
ta, atq; concreta funditus intereant, ut planè termi-  
nus, & finis sit naturæ, atq; mortalitati. in principe  
enim humani generis parente ipse fraude, atq; perfidi-  
a, ut memorauimus, deprauata fuit hominum natu-  
ra, caroq; humani generis corrupta, cui animus adhe-  
rescens corporis contagione non parum uitiositatis con-  
traxit, quæ naturæ ita affectæ contagio latius, tanquã  
ex traduce in cunctum hominum genus vniuersè dima-  
nauit. & licet diuinæ, atq; cœlestis victimæ sanguine  
admirandum in modum humani animi penitus expiati,  
sacraq; Lauatione lustrati, extra omnem planè culpam  
positi fuerint, attamen affectio quedam, quasiq; deco-  
loratio, eiusce infectionis veluti vestigium, in singu-  
lis ob corporis societatem remansit. Quippe eò facile  
omnis rei natura prolabitur, atq; incumbit, quò senel  
inclinata fuit. ceu si ab arida materia ignè forte illap-  
sum executias, in ea tamen labefacta, atq; præusta resi-  
det adhuc quodammodo fomes, qui de facili, celerri-  
meq; adnotam flammam rapiat, atq; comprehendat. sic  
profectò res se habet in animis nostris. istiusmodi enim  
naturæ infectione ad nequitiam promptiores existunt  
homines, ut nisi domitas cupiditates habuerint, stre-

nueq; , & nauiter illecebræ restiterint , quæ vetusta-  
 te carnis in nobis post reditum cum deo in gratiam  
 remansit voluntati nostræ quantumuis liberæ ap-  
 posita , luxuria , atque lasciuia disfluant , suisque  
 met ipsorum sordibus inquinati persepe non mo-  
 do freno , & castigatione , sed etiam purgatione indi-  
 geant . Hacce de causa dixit Plato , quod tu non ta-  
 cuisti , omnes respub. sui temporis improbas esse , cor-  
 ruptis ciuitatum moribus , auaritia , ceterisq; appeti-  
 tionibus in animis hominum victa , iacenteq; ratione  
 dominantibus . Non est hic locus , vt causas perse-  
 quar , quibus respublicæ , immutentur , & deteriores  
 fiant , qui locus à græcis copiosè , luculèterq; tractatur ,  
 & huic disputationi commodius fortasse tempus dabi-  
 tur , si vnquam posthac denuo conuenerimus , & de his  
 reb. sermonem institutum prosequemur . Satis nunc  
 sit ostendisse omnem rempub. vt ceteras quoq; res , pul-  
 cherrimè institutam tam eorum qui præsumunt , quàm qui  
 parent , nequitia fieri posse pessimam , ac flagitiosissimam  
 quod cum contingit , non perinde statim accusanda est ,  
 detestandaq; hominum coniunctio , atque consociatio ,  
 quod tantorum malorum causa existat , sed potius ob-  
 uitam eundum cunctis opibus , vt quæ dilapsa sunt , re-  
 stituantur , & in pristinum splendorem vindicentur ,  
 quod Socrates , Plato , Xenocrates , Aristoteles , Xe-  
 nophon , Theophrastus , nonnulliq; alij fecere , & om-  
 nes , qui Politica scripserunt . neq; , vt tu censes , ab  
 huiusmodi scriptione deterrendi sunt , detrahendiq; viri  
 docti . Quid est obsecro in rebus humanis tam egre-  
 giè ,

giè, tamq; præclarè initio formatum, confectumq;, & elaboratum, quod semper splendeat, neq; aliquândo vetustate obsolescat, pristinumq; nitorem non tandem amittat? omnia mihi crede, assiduo temporis decursu, longoq; usu debilitantur, frangunturq;, & deteriora paulatim facta collabuntur in prauitatem, cunctaq; tam quæ viuunt, & sentiunt, quàm vita, sensuq; carentia vetustate, diuturnitateq; extabescunt. Quid ni? agri ipsi fruticantur, plantaq;, & vineæ siluescunt. metalla æruginem cōtrahunt, ipsaq; diuorum templa, sanctissimaq; delubra senescunt, & corrumpuntur. haud propterea tamen statim euertenda, sed potius fulcienda, sustentandaq; sunt hominum cura, atq; industria. tergentur crebro aquæductus, & riui, fosseq; purgantur. ferrum à rubigine vindicatur, ac collustratur, & si opus fuerit, recoquitur, ac denuo conflatur, ipsaq; artium instrumenta persæpe reficiuntur, atq; reconcinnantur, quod probè videre potes in calamo, qui nisi retusus crebro temperetur, acuatq;, scribentis voluntati minus respondebit. Multa istiusmodi persequi possem, sed genus videtis. Vbi igitur ciuitatis mores deformati sunt, respub. q; à magistratibus, aut à principibus non rectè administratur, non tæcirco probris infectanda est ciuilis hominum conciliatio, neq; illicò demigrandum ad solitudinem. sed censemus potius enixius occurrendum esse, ac subueniendum moribus in præceptis dilabentibus, fulciendamq; adminiculis rem inclinatham, funditusq; collapsam erigendam denuo, ac restituendam. Quæ enim per deum hominum inscitia est, res appri-



mè vtilis, summeq; necessarias continuo damnare, & à se proijcere, si fortè interdum casu aliquo, & non sine nostra culpa eas nobis obesse contingat? Forte fortuna quispiam equo illatus, parieti, aut solo caput illiserit, latusue offenderit, nemo propterea post hac equum ascendet? nemo equo vehetur, sed potius iter pedibus ingreditur? Ferreis item instrumentis, quæ ad vitæ commoditates sunt inuenta, ceu cultris, aut securibus, sarculisue, & rastris non utetur amplius, si quis forte imprudenter, perperamq; aliquo eorū vtens sibi ipse digitum, aut pedem, aliamue corporis partem vulnerarit? Ne innumera istiusmodi hic colligam, quid igne hominum vitæ magis necessarium? igni tamen interdum maxima incendia excitantur, quibus totæ ciuitates, & magnæ terrarum partes ambustæ conflagraverunt. rursus, sine aquæ vsu vita hominum esse nequit, aqua tamen, si quando flumina, aut lacus inundarunt, interdum quoq; eladem affert populis latè accolentibus.

Sol quoq; æstiuis mensibus sæpe agros, & sata perurit, atq; deuastat. Solem ideo, si possumus, cælo deripimus? nec potius à nobis æqua estimatione ratio inibitur quantorum bonorum, ac commoditatum fons ille lucis suo lumine cuncta illustrans sit omnibus ubiq; mortalibus? idem dicere possem de eloquentia nobis à natura ad salutem nostram, & aliorum multorum data, quæ Stoici vnam de summis virtutibus esse existimabant, cum sit copiosa loquens sapientia, sæpius tamen eadem non modo ciuitatibus, publicisq; rationibus plurima detrimenta inuexit, sed etiam ipsis ea præditis fuit perni-

ciosa. Idem deniq; de multis rebus, quæ in nobis existunt arguere possumus. Quoniam namq; interdū multa videmus, atq; audimus, quæ videre, atq; audire nollemus, ergo optandum erit nobis priuari videndi, audiendiq; potestate, tam præclaris sensibus, qui sunt nobis à natura attributi, vt essent rerum interpretes, nuntij, & satellites animi in capite, tanquam in arcè mirificè collocati? innumerabilia sunt huiusmodi, nec omnia persequor, quæ suapte natura, atq; per se optima sunt. eis tamen si homines abutantur, pessima fiant, & perniciosissima. Si igitur diligenter, recteq; perpendimus id, quam rempub. vocamus, atq; hominum eiusmodi conciliationem iure sociatorum, ab omni culpa natura vacat, & nihil prorsus per se affert mali, modo bene institutæ ciuitatis leges, mores, & consuetudines seruentur, plurimorum potius bonorum, & cōmodorum mortalibus generatrix existit. At vero eadem labefactata ubi in tyrannidem prolapsa est, in multa mala, & detrimenta incurrimus, quæ non essent, si nunquam hominum genus in cœtus, et concilia coactum fuisset. Ista ratio est non aliusmodi, atq; illa.

Vtinam ne in nemore Pelio securibus

Cæsa cecidisset abiegna ad terram trabes.

Cætera nostis apud vetustissimum pœtam. Non committam vt hic in discrimen vocem, & contentionem, plus boni ne, an mali inuexerit hominibus ciuitatum, et rerum publicarum constitutio, pluraue sint inde secuta adiumenta vitæ, atq; præsidia, quàm detrimenta, & incommoda. Possem insuper facile probare, etiam si

vitiosa sit respub. ac deprauata, longè satius adhuc esse ita nos in societate, quàm discerptos, ac palantes in agris viuere solitarios. atq; in tyrannide rectè subductis calculis esse plus boni, quàm mali. sed tu quæ laudanda insunt, silentio obruis. sola vitia insectaris, & acutius illa uides, quæ praua sunt, quàm quæ recta. cõparanda tibi erant saltem, quæ luculenter enumerasti iniquissimus rerum æstimator, cum magnitudine utilitatum. nam incommoda vitæ ciuilis, si vlla essent, commodorum compensatione lenirentur. Est profectò non ferenda prætermisiss bonis malorum excerptio, ac omisiss virtutibus vitiorum collectio. isto nempe modo cunctæ prope res incidere possent in aliquam vituperationem. Loquor tamen hic, quod vos velim in omni oratione meminisse, de repub. collapsa, ac deprauata. nam vbi de integra, & incorrupta loquemur, nulla istiusmodi ratio ineunda erit. itaq; in ciuium coniunctione, ac ciuitate quâumlibet corrupta, locus adhuc est rationi, qua dicitur, optima de malis. Verùm obijcis Dicearchi peripatetici librum de hominum interitu, nullum vitæ maius periculum imminere homini, quàm ab homine. Quæso te, in agresti illa, atq; inmani vita, in solitudine, inquam, existimas tuti essent homines ab hominibus, quos nulla lex, nullus pœnæ metus à maleficio arcerent? Procul dubio cum homo hominem conspiciatus esset, prædam se suam nactum duceret, nec solum feris, quas à corporibus nostris murorum oppositu, & multitudine freti remouemus, essemus obnoxij, sed etiam omni homini. nec tyrāni, quos

nobis inculcas omnia rabidè inexplebili cupiditate appetentes tantum obesse possent, dum eorum potestati subiecti essemus, quantum profunt ciuium inter ciues multa aduumenta, atq; præsidia. Possunt quidem tyranni aliquandiu ciuitatem seruitute oppressam tenere. Sed eorum, qui vi subiectos sibi populos coercent, omnium ferè deniq; vnus, & par est exitus. eorum ideo vitia, sicut etiam improborum magistratuum, tolerari possunt, quod plerunq; iniusta imperia magis acerbata sunt, quàm diuturna. Tyranni namq; vt quotidie videmus, aut ex insidijs paucorum intereunt, aut tota ciuitas in libertatem erecta, consentiensq; et conspiras in eos impetum facit, pauciq; admodum in lecto suo cubiculari confecti morbo moriuntur. Cum tyrannis item minus periculose viui potest, atq; cum belluis, quibuscum humano generi nulla planè est societas. belluas hic intelligo non tantum ratione, & sermone carentes animantes, quibus expositi essemus, nisi viueremus in societate, oppidis septi, atq; obuallati, verùm etiam homines agrestes, atq; immanes tango, quos nulla humanitas, nulla vitæ cultio mitigasset. parùm à feris distantes, quales fuisse tradunt, antequàm concilia, coetusq; iure sociati essent ulli, cum nullæ latæ essent leges, sed vi agerentur omnia, semperq; validioris esset melior, et superior conditio, quando non vis ad fabulas trahi, cum homines humanis carnibus vesci solitos fuisse memrant, quod tamen & Plato, & grauissimi philosophi asseuerant. Quin & tyranni ipsi quoq; habent leges, licet haud planè æquas, quas sibi proponunt seruandas

in sibi subiectos populos, ne soli relinquantur. atque sub illis, tamen si ciuitates non sint liberæ, viuitur tamen tolerabili ad tempus conditione seruitutis, ciuesq; prudenter ferunt illorum potentiam, donec repellendæ seruitutis sese tulerit occasio. Atqui aduersus immanitatem illorum hominum, quos nulla disciplina molliuerat, nulla proderat imbecilliorum tolerantia, nulla patientia, aut prudentia, vt hæc sententia valeat non ad æquitatem rationis, sed ad, id quod aiunt, minima maiorum eligenda: est namque inculcata omnium auribus ea sententia, de qua supra, homine bono nihil melius, malo autem peius nihil esse posse. Caterum miror te aliqui doctum hominem, ita rudes illos mortales vltimæ antiquitatis ornas, vt qui te audierit, non eos homines, sed quosdam quasi deos terrestres, ac mortales fuisse arbitretur, probos, sanctos, integros, simplices, innocentes, abstinentes. et secula quò antiquiora, cò meliora, ac feliciora fuisse contendis. periculosum hercle argumentationis genus. Aequum saltem erat te meminisse principem hominem humani totius generis parentem ita fœdè aduersus deum procreatorem suum se gessisse, vt propter eius noxam, atq; fallaciam nō modò in ipsum sceleris auctorem parum obedientem, & noxium seuerissimè animaduersum fuerit, verum etiam ab eius liberis, nepotibus, pronepotibusq;, & posteris omnibus perpetua serie futuris, ab vniuersoq; hominum genere iusta, debitaq; pro tanti delicti gravitate poena expetita sit. Quid? non ne qui primus humano semine maris, & scemine commistione editus fuit in lucem,

ob inuidiam melioris fortunæ germanum germanus sceleratissimo patricidio interemit, cum nondum ciuitates existerent vllæ, sed vna tantum toto orbe terrarum esset familia, & vna domus, quatuorq; homines eatenus, non plures, procreati essent? vt intelligas minus constare, quod ais à vulgo vsurpari, quod pauciores, eò beatiore, neq; rudes illos homines ante institutas ciuitates adeò sanctos, atq; innocentes fuisse. Lege librum genealogum apud Hebræos, quorum literis antiquioribus, idest simplici veritati nos, qui à Christo illustrati fuimus, maximam fidem habere oportet. intelliges in ipso nascentis mundi exordio humanum recens genus iam tunc pollutum fuisse, hominesq; cum suis cupiditatibus natos. non enim pateris te vocari ad fabulas, ne tibi memorem cælum Aethere, & die genitum à filio Saturno regni cupiditate exectum fuisse. mox ipsam Saturnum à filio Ioue victum, paremque iniuriam metuentem profectum esse in exilium, & in Latio diutius delituisse. Alia eiusdem generis flagitia, atq; portentâ tibi remitto, quæ poetæ fabulis tanquam integumentis maxima mysteria inuoluentes commenti fuerunt plurima. nos autem philosophi & sumus, & tecum esse volumus. illud unum affirmare possumus vna cum humano genere post primi hominis ex argilla ficti noxiam, et fraudationem ortas fuisse cupiditates omnis, quæ hominum animos huc, & illuc rapiunt, & à recta ratione sæpius deuocant, & homines cæcos reddunt, nec suæ queng; dignitatis memores esse sinunt. Plura porrò ab illis peccari necesse sit, qui animi morbis, atq; ægritu-

dinibus nullam medicinam ad mouere norint , studijs  
 nanq; , & artibus , quæ traditæ sunt nobis sapientiæ  
 disciplinis , constat nos fieri posse meliores . eas vero  
 nullas fuisse nemo neget , cum adhuc homines disiecti dis-  
 cerptiq; in agris , & montibus uitam solitariam de-  
 gerent , cunctiq; viuerent in diem , cum potius nostræ  
 consilia sempiternū tempus spectare debeant . Atqui ,  
 inquis , inuenti sunt sapientissimi viri , qui cœtus ho-  
 minum , & concilia , multitudinemq; omnino defuge-  
 rent , & quod intolerabilius videtur , cum præcepta  
 administrandarum rerum publicarum tradidissent , ip-  
 sasq; instituisent respub. & ciuitates illustribus ingenij  
 monimētis , se tamen planè ab earū gubernatione auo-  
 cantes in ocium , & solitudinem contulerunt . Dupli-  
 cem te scire arbitror esse viuendi rationem , alteram  
 agendi , alteram cognoscendi . harum vtra sit melior ,  
 res est adhuc controuersa , & plena dissensionis , aliquā-  
 do fortasse à nobis , qui hic sumus , vbi locus erit , iu-  
 dicanda . Porro quoniam non omnes apti sunt ingenio  
 ad rerum occultarum , & admirabilium indagationem ,  
 pluresq; semper reperti fuerunt in omni ætate , qui fa-  
 cilius rempub. capefcere possent , & in eius rectione , ac  
 gubernatione occupari ponentes curas omnis in ea ge-  
 renda , solitudinesq; , labores , & vigilias pro adipi-  
 scendis honoribus , & imperijs perferentes , iccirco  
 philosophi illi , quos obijcis abstinuiffe ab earum rerum  
 pub. administratione , quas ipsi instituisent , cum eis  
 esset admirabilis incredibilis q; vis ingenij , scirentq; se  
 natos , vt plurimis quamplurimum prodesent , post-  
 quam



quàm rectas in communione viuendi vias tradiderunt, quas sui ciues facile sequi possent, relinquentes ipsi vsum alijs, reiç; administrandæ potestatem, & gloriam, sibi tantum scientiam retinentes, ut magis in commune prodeffent, abduxerunt se penitus ab omni rerum publicarum curatione, à vulgic; commercio, & ad altiora se retulerunt, cœli, totiusç; naturæ contemplatores, perscrutatione rerum cognitione dignissimarum delectati, quarum notitiam, atq; scientiam multis traderent, quo mortales immortalibus, dijsç; simillimi fieri possent. in quo statu collocati, sicut vltro non requirunt honores, ita neq; tamen mandatos labores omnino recusant. Intelligis itaq; præstantissimos viros se à pulcherrimis reipub. muneribus, non quòd eis in societate viuere parum placeret, sed vt ciuib; suis eo genere vitæ magis consulerent, deç; hominum genere præclarius mereri possent, relinquentes alijs ciuib; eas artis, ac studia, quòrum vsus est communis, fructusç; omnis in exercitatione, & consuetudine consistit, ipsi ingenij perspicacia et, mentis acie delectati ea indagare maluerūt, ad quæ perspicienda datū est paucis aspirare.

Querenti ideo olim Socrates, vt refert Xenophon, quid, cum tanto studio conaretur alios efficere optimos ciuitatum gubernatores, ipse tantopere abstineret ab eiusmodi gubernatione; neq; vnquam rempub. capefferet, respondit. ecquid ipsi videretur magis conducere, si aut vnus ipse publicam rem administraret, aut plurimos eandem administrare doceret: Itaq; quòd tuis vitio vertis, non capeffunt rempub. nisi coacti.

Quamquam, si rectè cuiusmodi sit iste coactus intelli-  
 geres, non ita reor unquam excanduisse. Ne in ci-  
 uitatibus instituendis Philosophi ab illis, qui repub.  
 gubernant, omnino remouent ambitionem æque, atque  
 auaritiam, duas pestes ciuitati perniciosissimas, sum-  
 meq; improbant, ac notant, eos qui tempore comitio-  
 rum ad honores petendos mouentur atque ambitiosius,  
 quam eorum honos postulat, se inferunt, atque intru-  
 dunt ad reipub. gubernacula circumeutes vicatim, &  
 in foro omnibus inspectantibus blandius petentes, sum-  
 meq; contendentes, vt ad imperia nominentur, antese-  
 rantur, eligantur, indignissimum queng; salutando,  
 prensando, amplexando. Plato igitur conspiciatus  
 suis temporibus nimium mores ad ambitionem incubuis-  
 se, censuit philosophum, idest grauiissimam personam  
 in potestatibus, magistratibus, & imperijs adeundis  
 minus decere ad honorum studium cupiditate duci, atq;  
 non propensus senatus, populiq; suffragijs uocatum, il-  
 latumq; & quodam modo arreptum repub. accede-  
 re, sed senatui deniq; parendum, ne non obtemperando  
 maiestas imperij ab ipso videatur minui, modò id ro-  
 gatus faciat, & quodam modo recusans. coactus enim  
 hic intelligit id, quod magistratus, et leges iubent. Ic-  
 circo idem ipse Plato ad hoc optimam similitudinem in-  
 ducit. non secus facere eos, qui in repub. de muneribus  
 fungendis inter se certant, quam si duo nautæ conten-  
 derent, vter ipsorum potissimum gubernaret. Nam  
 quæ de philosophorum ambitu plurima cauilatus fuisse  
 verborum contumelijs eos insectatus, comitia ista quæ

dem sunt, & maledicta, non accusatio. & in eo ipso de quo (ô Dij immortales) Platonem Philosophorum principem reprendis, homo sanctissimus potius summam laudationem meretur, qui in Siciliam profectus magnos labores adiit, cunctaq; est conatus, vt tyrannum crudelem, ac tetrum, si posset molliret, & ad humanitatem reuocaret. Illos verò, quos ciuitates suas in turpissimam seruitutem adduxisse memoras, easq; diu oppressas crudeli dominatu tenuisse, defendimus, non tam fuisse philosophos, quàm homines potius quosdam fallaces. callidos inquàm, tectos, versutos, & veteranos maximos, qui philosophiæ simulatione, sub sordidoq; palliolo. viam sibi ad dominationem præstruxere, cuiusmodi non parum multos quotidie conspiciamus fictæ, atq; adumbratæ probitatis speciosa imagine, splendidis, inquàm verbis, atque illustribus vitia maxima occultare, similes pomparum ferculis, nouasq; et inusitatas sanctimonias, & religiones vsquequaq; architectari, ac nihil vnquam boni agere sine venditione, & populo teste, vt ijs artibus facile in repub. ad honores irrepan, quos humani generis liberator, dum in humanis ageret, probè noscens eleganter, aptè, atque rotundè descripsit, nunc extrinsecus ouis mitissimæ pecudis pelle tectos, interius lupum agere, lupinamq; rapacitatem sub lanæ mollissimis velleribus oculere, id est, alia loqui, alia sentire, nunc nobilium virorum sepulcris asimiles memorabat, quæ cum extrâ magnificis operibus cœlata sint, affabreq; facta, collustrata, ac splendida transeuntibus videantur; intus tamen cada-

ueribus conferta, tabo, illuuię, & odoris intolerabilis fœditate omnes ab aspectu deterrent. Idcirco tam detestandę simulationis artifices sępißimę exagitabat, execrabaturq; tanquam illis additus, & semper incumbens, suisq; cauendos, & remis, ac velis fugiendos summopere, summaq; auctoritate denuntiabat, pręmonibatq; cautę agendum. neq; facily cuiq; passim habendam fidem. fraudis; perfidię, & insidiarum plena esse omnia, vt eius etiam testimonio verissima sit illa sententia, nullam capitaliorem iniustitiam, quàm eorum, qui cum maxime fallunt, id tamen agunt, vt in eo ipso æqui, boniq; viri videantur. Quòduero attinet ad eos, qui omnia cõmunia ita in repub. esse voluerunt, vt nihil quicquam prorsus cuiusquàm esset priuati, aut separati, vt ne vxores quidem ipsas, neq; liberos à cõmunitate exciperent, summeq; beatas respub. fore putarunt, si ciues in commune etiam videant, audiant, tangant, gustent, lætentur, doleant, & spirent; sensusq; omnis, & affectiones habeant communes, nihilq; separatim agant, aut cogitent, facilia quidem potius dictu, quàm re, aut factu. Non sum is, qui defendere velim omnes omnium philosophorum opiniones, cunctasq; legumlatorum sententias. Errauerunt illi quidem persepe baud leuiter in multis hallucinati, neq; quicquid Socrates, aut Plato, aut Aristoteles dixit, oraculum habendum censeo. Secus nihil opus fuisset Christum summum illum legislatorem, quem vnũ non tantũ sequimur, sed etiam pię, sanctęq; colimus, precamur, ac veneramur, circumscriptis omnibus rerũpub.

formis à philosophis vsq; ad sua tempora adinuentis , nouam ipsum rempub. & ciuitatem instituere ad cœlestis ciuitatis rationem , quatenus humanis diuina consentiunt . Damnat quidem Plato , & insectatur in libro quarto de legibus venationem aquatiliū , at Christus planè contrarium sensit . Statuit ille mendicos omnino vrbe expellendos , ne tale animal , vt ipse ait , in ciuitate numeretur . hic verò summa humanitatis charitate , atq; misericordia benignè accipiendos præcipit . Plato item lege cavit , ne quis cum serua coeat , nisi id ita occultè faciat , vt resciat nemo . at Christus testatus fuit nihil vsquam adeo abditum esse , atq; abstrusum , vt nō aliquando detectum palam fiat . Innumera sunt præterea illius philosophi , & aliorum istiusmodi scita ; aut placita , quibus in verissimis diuinæ sapientiæ institutis apertè contradicitur , Nempe ea illi dixerunt aliqua rationis probabilis specie inducti , quæ postea alij vsu , et tractatione edocti , tanquam inutilia , damnarunt . Porro nisi tu mihi occursasses , largiter disputaturus eram in vtrāq; partem de hac Socratis communitate , quem admodum etiam de plurimis alijs opinionibus ad ciuitatem pertinentibus facturus eram . multa enim hanc materiam tractanti intercurrunt scitu , atq; explicatu digna , quæ vix omitti possunt , cœu , exempli causa . conducatur ne ab optima lege , an ab optimo rege rempub. gubernari , & an satius sit eiusdem administrationē esse penes vnum , aut plures . deinde si penes vnum , vtrū præstet , cum hereditario iure , originisq; , & generis beneficio maioribus suis , in regno succedere , aut comi-

tijs habitis, initisq; suffragijs iudicio, & electione ciuitatis in demortui regis locum suffici. rursus si res sit penes plures vno, à paucis'ne prudentioribus, an ab vniuerso populo melius sit eam administrari. vtrum item sit laudabilius, honorabiliusue in vita rempublicae capessere honoribus, imperijsq; adipiscendis clarum, an abditum, & ab oculis semotum, paucisq; contentum iudicibus, & spectatoribus in cognitione rerum, & naturæ contemplatione versari. tum ex ijs ambabus uitis vtrum vna sine altera existere possit, plurimæq; aliæ id genus questionēs, quas fortasse, si vnquam ocium nacti fuerimus, aliquando suo quamq; loco prosequemur, latiore enim speculationem requirunt. Nihil est præterea, quod magnopere respondere laborem ad ea, quæ memorasti de illis, qui iudicati fuerunt humani generis inimici, & planè hostes, quod congressus hominum, & societatem, tanquam morbum, et pestem defugerent. hos tu tuo arbitratu tibi affingis tales fuisse, quod minus probarent ciuitatem, ciuiumq; societatem, ex qua, vt erant viri sapientissimi, non ignorarent omnium malorum fontem extitisse. De sensu tuo istuc comminisceris nulla ratione, aut auctoritate suffultus contra omnium sententiam. Ego verò cum sapientibus illos potius iudico fuisse ea asperitate, & immanitate naturæ, feros, atq; adeò inhumanos, vt nequirent, se dare in alicuius familiaritatem, neq; cum vllò consuetudinem iungere, & id propter videbantur hominum genus odio prosequi se vsquequaq; in solitudinem immergentes. Equidem quosdam huiusmodi auste-

ros noui, qui in frequentissimis ciuitatibus viuentes, atq; in collegijs etiam summorum virorum cooptati, neq; , quo magis miror, à quodā literarum genere planè abhorrentes, ita tamen angusto animo, ea ingenij forma, rudi inquam, atq; impolita vsq; adeo aridos, atq; ieiunos, vt neq; in collegiarum consuetudinem, & familiaritatem, cum quibus necessitas vitæ, & muneris societas eos copulabat, se insinuare possent, aut certe scirent, totius humanitatis expertes, & ad humanam consuetudinem ineptissimi, vt sui ipsorum ignari, inconditi, inconcinni, sine sensu, sine sapore, tardi, elingues, stupidi, ac bardi. & si quando istiusmodi aliquem necessitas cogit ob publica munera, aut rei suæ causa, cum aliquibus congregi, videas illum etiam in turba, ac multitudine planè solitarium, defixum, & quasi modò nascentem, semper hæsitatem, implicitum, impeditum, morosum, suspiciosum, semper aliquid violatum existimantem ab illis, quibuscum ei est res, atq; negotium, illum omnes fugiunt, atque deuitant, & solum relinquunt sibi met ipsum inimicum, & cum suis ipsius moribus conflitantem, neq; vlli sermonis eius duritiam, & inclementiam ferre queunt. Tales sunt illi, quos tu sapientes esse existimas, à repub. ciuitateq; , & ab hominum coniunctione alieni. Eorum naturam, & consuetudinem, pluribus, quàm par erat, fortasse uerbis, persecutus fui. sed mihi licuisse arbitror, propter tam apertam, frigidam, & ieiunam calumniam, quam per summam iniuriam contra rempub. adhibuisti, cuius stem modi est illud, quod in philosophos homines gra-



uissimos, integerrimosq; , quos insimulas ambitionis, retorsisti. Cupere inquis eos dominandi libidine, reipub. aut à philosophis gubernari, aut eos, qui gubernant, philosophari. Hæc calumnia est eorū, qui cuncta, quantum vis benefacta, ac laude digna, in deteriore partem semper detorquent, quiq; , vt inquit Propbetes maximus, quod bonum est, malum dicunt, quod item malum, bonum uideri volunt, omnia peruercentes. Næ Plato, qui illud à dijs optasse dignoscitur, ab administratione reipub. à turbaq; , & à subsellijs curiæ abiunctissimus fuit, in ocioq; , & in literis perpetuò inuolutus vixit, in studijs cognoscendi semper aliquid occupatus. At Theseum Athenienses, nonnulliq; alij populi suos legumlatōres in exilium proiecerunt. istuc equidem non diffiteor, sed factum fuisse contendo propter eorum asperitatem, atq; insaniam, qui potentiores antea fuerant, quiūc olim soluti legum vinculis soliti erant in summa licentia viuere, suamq; voluntatem, atq; libidinem pro lege habere. illis enim haud adeo facile erat statim assuefieri humanitati, & graue videbatur æquo iure viuere cum multis, præsentēsq; voluptates, ac breuem cuiusuis obiectæ vtilitatis speciem amittere nihil in posterum longius consulentibus. hanc non aliam ob rem eos statim pœnituit ciuitatis.

Vides igitur id euenire hominum, non rerum vitio, ciuium inquam magis inscitia, aut malitia, quam ciuitatis, hoc est ipsius hominum coniunctionis natura. istiusmodi multa temere in populis sunt, vt ciuium excellentium eiectio ad quoddam tempus, quem

Græci

Græci, ἀταρταχισμός vocant, qui in populari gubernatione introductus fuit, nec mirum, si neq; omnium iustissimo Aristidi pepercerint Athenienses. Tute ipse ex Platonis sententia in libro, qui Epimenis inscribitur, innuisti, quod ego quoq; Paulò ante confessus fui, humana esse mutabilia planè omnia, perleuiq; temporum momento maximas sæpe fieri inclinationes, & vsquequaq; cuncta sursum, deorsum ferri, turbari, misceri. Quid mirandum, si ciuitates quoq; in temporum motu, & conuersione rerum, aut perturbatione versentur? Quippe natura ipsa cuncta ciens motibus, et mutationibus suis nihil mortale patitur diu esse idem, atq; immutabile, variasq; semper conuersiones molitur. Quid? nonne, si quis etiam solus uiuit, diuersos intus motus, & mutationes in animo secum sentit? agitur enim semper animus motu interiore, præsertim illa pars, quæ sensum, & appetitum habet, hoc est, motus intimos turbulentos, rationiq; non obtemperâtes, vt modò hæc, modò illa, contraria etiam interdum velit, neq; sibi constet, & persepe secum ipse impacatus pugnet. Hæc vnica ratio satis per se esse poterit contra illa omnia, quæ tu de malis memorasti, quæ sunt in ciuitate. quod quidem solatio esse debet omnibus in ea congregatione consistentibus, vbi deprauati, deformatiq; sunt mores, & omnia in deteriore partem mutata existunt. Hac responsione totus ille liber quantuscunq; magni illius peripatetici de hominum interitu corruit, & profligatus iacet. hæc item eadem resellimus tyrannorum omnium obiectam iniustitiam, atq; crudelitatem. om-

nia itidem omnium regum, populorum, & gentium bella, quæ etiam interdum non cupiditate, aut libidine, temere, sed pro totius reipub. salutè consultò, necessarioq; suscipiuntur, tum quoq; eadem ratione responderimus, ad ciuiles dissensiones, ciuiumq; discordias, stultitates, odia, inimicitias, seditiones, secessionesq; & ciuium cupiditates, libidines, magistratuum auaritiam, iudicum iniustitiam, militum questum, & crudelitatem, cæterorumq; hominum tam locupletum, quàm tenuium improbitatem, furta, rapinas, dolos, fraudes, iniurias, cunctaq; flagitia, & scelera, quæ tu singula satis studiose ad vnum enumerasti. Hanc ob rem quoq; Plato dixit, cunctas sui temporis respub. sibi videri improbas, atq; intolerabiles, nempe collapsas, & deprauatas. Aristoteles quoq; post illum omnes omnium rerum pub. institutiones carpsit, aut verius euertit. Hinc item videtur, quò magis hominum genus distat ab illa rudi, ac simplici antiquitate remotum, eò deprauatius euasisse. Hinc Actij versus, multos iniquos, atq; infideles regno, paucos vero bonos. Hinc iustitiam ipsam terris excessisse dicitur. maioresq; nostri uisi sunt abstinentius, innocentiusq; rempub. gessisse. Hinc deniq; colligis vitia omnia ex contagione disseminari, propagari, diffundi, atque increbrescere in populis, & frequentibus hominum conuentibus, et nisi essent ciuitates, ac respublicæ, haud tantam putas vitiorum segetem, ac siluam in hominum genus inuasuram fuisse. Sic enim mordicus pugnas vsquequaq; intrans, & vrgens, identidemq; corruptos, & depraua-

tos ciuitatis mores esse fremis, & tempora ista calamitosa mihi obiectas, quibus funditus euersa est reipub. gerenda ratio, atq; impressione me penè cogis descendere, quò minimè volebam, ad eam rationem, vt vitia etatis, & mala, virtutum, bonorumq; compensatione lenienda defendam, & longè plura adiumenta, atque praesidia subductis rationib. suppeditata esse humane vitæ ex hominum conciliatione, quàm detrimenta, multoq; plus boni hominibus inde inuectum, quàm mali. Nam si in discrimen, & contentionem veniant vtraq; mundi etates, praesens scilicet, in qua lapsorum morum ruinam perpetua lamentatione comploramus, atq; illa, in qua nulli erant mores, sed homines vi, atq; impetu omnia agebant, neq; multum aberant à belluis, nemo erit suæ mentis compos, qui non longe malit his temporibus, quàm illis se natum fuisse, sit deprauata res quantum libet, dilapsa, deformata, delumbata, demersa iaceat. Centies dicam, nihil in rebus humanis esse ita absolutum, ita sincerum, vt nullis planè intercurrentibus malis sit omnino cunctis bonis cumulatam. nihil tamen obstat, quin res illa dici possit bona, expetenda, atq; eligenda. Etenim in hominum conuictu quædam adeo præcellentia bona existere intuemur, vt si quæ sunt mala, ex altera parte ponantur, ne appareant. Quis quæso, si fertilissimi campi segetem spiciis crebris, atque vberibus latissimam viderit, non laudet agri illius nobilis fertilitatem, tametsi interdum auenam rarò vsspiam subortam inspexerit? neq; desinet iccirco mercatura esse quaestiuosa, quòd

maximis in lucris interdum aliquid damni contrahat .  
 Sanè est comparatum natura cunctis rebus , vt semper  
 ex maxima parte de tota re iudicetur , & illi , qui re-  
 ctè loquendi rationem tenent , totam rem nominant ex  
 eo , quod latius funditur , & maiores partes continet .  
 Ponantur igitur in vna libræ lance bona , & commo-  
 da , quæ ad nos perueniunt ex hominum æquo iure so-  
 ciatorum conuictu , in altera contrà , mala , & incom-  
 moda , procul dubio lanx bonorum terram , & maria  
 deprimet omnia . sed nunquam efficies , vt ad hanc col-  
 lationem , concursationemq; deueniã . nolo tantam iniu-  
 riam facere deo quidem primùm huius vniuersitatis  
 quasi parenti , cuius prouidentia ciuilibus vitæ induxit  
 exordium , tum nature , cuius instinctu , atq; impulsu  
 cæpti sunt primùm homines congregari . Quis queso  
 ferat , nisi fortasse ad ostentationem ingenij , conferri  
 hanc magnificentiam tot rerum illustrium , uitæq; splē-  
 dorem cum squalida illa , agresti . atq; immani uita , quæ  
 esse poterat communis cum belluis , semisomni , & pla-  
 nè mortua ? nollem nimis creber inculcare , nullam esse  
 posse hominis vitam sine hominum adiumentis propter  
 artes victui pernecessarias , nisi vnusquisque sibi esso  
 posset Hællæus Hippias , vt omittam solitarios nullis hu-  
 manis præsidij septos , multis iniurijs expositos fore ,  
 cauendaq; eis plurima , tum ab hominibus ipsis , tum  
 à bestiis . Porro humana vita multarum rerum indi-  
 get , quæ haberi nequeunt , nisi multorum hominum in-  
 communiōe viuientium opes accedant . Quæ per deum  
 immortalem in vita illa rudi , & agresti existere po-

terat valetudinis curatio , cū nulla adhuc adinuenta  
esset medicina ? quæ nauigatio ? quæ mercatura ? quo-  
modo fruges , fructusq; colligi , ac conseruari poterant ,  
cū nondum vlla inducta esset agri colendi ratio . nihil  
inter se homines contraherent , nihil transigerent , nulla  
esset , quam alter alteri haberet , fides , nulla spes ,  
quam ponerent in mutuis præsidij , nulla charitas . ho-  
spitalitati quoq; locus vbi esse poterat , quæ tantopere  
à Theophrasto laudatur ? aberat beneficentia , aberat , li-  
beralitas , bonitas , maximæq; huiusmodi virtutes non  
agnoscebantur . nulla erat gratia , officiorumq; remu-  
neratio , ac vicissitudo studiorum , quæ sunt vincula  
cōcordiæ . nondū auditū erat inter mortales dulce nomē  
amicitiæ , quæ conflatur consuetudine mutua , morumq;  
& studiorum similitudine inter homines , quorum con-  
spiratione , atq; consensu efficitur , quod innuit Pytha-  
goras , vt ē pluribus vnum fiat ex beneficijs vltro , ci-  
troq; datis , atq; acceptis . nihil profectō suauius coniū-  
ctione bonorum . & homo sine amicis , etiam si omnibus  
rebus affluat , vitam sibi ingratam putet . Quæ enim  
quæso illa esset vita ? quā parū abesset à pecudū natu-  
ra ? nemo alteri cōsuleret . indigēti , aut uim patienti ne-  
mo opitularetur . nulla esset liberalis educatio . abesset  
sapientia omnis , quæ est in cultu hominis occupata , da-  
ta , vt esset naturæ comes , & adiutrix . nulla vigerent  
studia ingenuarum artium , nullæq; planē essent artes .  
nulla existeret ratio , & institutio vitæ . nulla rerum  
neq; cœlestium , neq; humanarum scientia , neq; Sophia  
Græcum nomen vnquam introductum fuisset . Caren-



dum nimirum omnino nobis fuerat, in sempiternum ornatrice vniuersæ vitæ, omniumq; recte factorum, atq; dictorum parente philosophia. caruissimus penitus literis, quæ quàm sint hominum vitæ necessariæ, nemo nescit, inuentæ, vt subsidio obuiuioni esse possent, existentq; cuiusq; hominis voluntatis notæ, & scita posteritatis causa scriberentur. Non aqua, non igni, non aere, vt aiunt, pluribus locis utimur, quàm literis. nullus esset ingenio, iudicio, industria, virtuti locus.

Cogitate animis uestris duos homines, alterum agrestem, ferum, immanem, inculto, & vasto, ac torrido corpore. hirsuto, aspero, & incondito capillo, fluentibus buccis, vultu, ac facie planè rustica, atq; illiberali, habitu obsoleto, sentum, squalidum, pannis obstitum, neglectum, multaq; illuuiæ, & incuria scabrum, atq; immundum, quales fuisse necesse est rudes illos ultimæ antiquitatis homines. qui neq; ius, neq; bonum, atq; æquum sciebant, melius, peius, prodesset, obesset, nihil videbāt. Contra verò animo, volutate alterum cultu digno homine libero, honore, dignitate, gratia spectabilem, in omniq; iudicio elegantem, qui vel ipso oris habitu, ac specie præferat omnia signa liberalis animi, facilitatis, māsuetudinis, comitatus, dignus, vt aiunt, cui regina matrimonio vltro copulari velit, quales plerosq; nunc habent honestæ ciuitates. utrius quæso istorum vnusquisq; vestrum mallet esse similis? Necesse erat profectò errare in multis rudem illam antiquitatē. ad id nanq; solū, quod aderat quodq; præsens ante oculos habebant, se quisq; accommodabant parum



admodum in posterum consulentes . omnia fortuito , & ut sensus ferebat , agebant , nihil consultò , nihil maturè , nihil prudenter . nondum artes vllæ erant , quæ naturam adiuuarent , quæ sine illis planè iners existeret , atque ociosa , ut quæ semper expectat humanæ industrie adminicula . Porro sæpius audiui hominum ingenium esse , sicut ferrum , quod quidem alio ferro , usuq; assiduo acuitur , ita consuetudo hominum inter ipsos excitat , acuitq; intelligendi prudentiam , alterq; alterius cogitata adiuuat colloquendo , conferendo , commentando , disputando , & alij alia vsquequaq; adinueniunt , semperq; aliquid iam olim adinuentis additur à posterioribus , si qua fortè ratione vitæ bene , beateq; degendæ in hac mortalitate omnium commoditatum , ac bonorum expletionè , ac cumulo addi possit fastigium . Principiò credendum est , ut probauimus , viuendi necessitatem acuisse mortales ad ea studia , quæ corporis , vitæq; sustentandæ cōmoditates pariunt . Intelligimus sanè ædificatis vrbibus genus humanū mansuetudine animorum , ac verecundia paulatim mitigatum fuisse . & homines quidem primum cœpisse contemplari , tum facere , deinde agere , atq; ita gradatim optimarum artium vias fuisse traditas . hinc omnes opificum exercitationes , qui in humili arte versantur , profectæ sunt . hinc quoq; omnis vitæ liberaliter , et ad virtutem degendæ cultio . hinc deniq; omnis veri inuestigandi consideratio , rerumq; cognitio per suas cuiusq; causas . Nempe natura sola innixi prisca mortales stant artibus vix vitam tuebantur , quam quidem natu-

ram potentiorē arte non diffitemur, certiorē verō  
 artem existere, nemo est, qui ignoret, cum in planē co-  
 gnitis, penitusq; perspectis, & in vnum exitum spec-  
 tantibus, ac nunquam fallentibus rebus verſetur, detq;  
 rationes certas, & præcipuē faciendi quod velis, quæ  
 habent ordinem, & in faciendo errare non patientes  
 vias. Primum igitur inferiores artes cœtui ciuitatis,  
 hominumq; communioni debemus, sine quibus vita es-  
 set aut nulla, aut parum abiuncta à cæterorum animan-  
 tium statu. Etenim vniuscuiusq; studia in congrega-  
 tione excitantur præstantium virorum sapientia, vir-  
 tuteq; & excellenter factis ad amplificationem, per-  
 fectionemq; rerum humanarum, & ad eas commodita-  
 tes augendas, quæ ad vitam bene degendam pertinent.

Hinc in primis valetudinis curatio. hinc tot rerum  
 medicinae, tot remedia, tot fomenta, totq; saluberrimæ  
 potiones. hinc & nauigatio, atq; omnis mercatura, tot  
 rerum, quibus hominum vita indiget, importatio, to-  
 tidemq; ferè, quibus interdum contingit abundare, ex-  
 portatio. hinc agricultura, frugum, fructuumq; per-  
 ceptio. hinc ferri vsus ad agros colendos, ad cæteraq;  
 vitæ munia pernecessarij. hinc artis lapidisq; cuiuslibet  
 generis fodinae, opificinaq;, tot tabernæ, tot rerū apo-  
 thecæ, tam egregiæ artes multitudine infinita, varie-  
 tate admirabili. Quid dicam tot multifariam opifices,  
 tot fabriles industrias, tot formarum compositiones,  
 compactiones, coagmentationes, commissurasq;, vsq;  
 adeo aptas, & congruentes, omniaq; in vna quaq; ar-  
 te ita continnè, peritè, atq; affabre laborata, vt ubiq;

ars cum natura certare , eamq; interdum antecire videatur ? Quid quaeso fabrorum , qui domos ædificant , opera magis in vita necessarium ? eorū nisi esset industria , quomodo habitaremus ? quemadmodum domos , ac cætera ædificia moliremur ? nobis hercle redeundum esset denuo ad vngues , quibus olim sibi quisq; domos in terra effodiebant , vt frigorū vim frangerent , calorū sedarent molestiam , imbres , ceterasq; cœli tempestates arcerent . Nunc ædificia eleganter , concinneq; ad aptum vsum , & condecentiam architecti , fabriq; tum certa ratione describunt , tum manu , operaq; conficiūt , plenas inquam dignitate domos pro cuiusq; facultate , industria , atq; fortunis . quis non magna cum admiratione contempletur pictorū opera , aut eorū , qui signa fabricant ? quanta eorū solertia , quanta prudentia ? Quis non admiretur artifices eos , qui argentariam faciunt ? cœlatores , vasculares , & qui fusoriam exercent , qui textrinam , sutrinam , tonstrinam instituunt ? tum fabros diuersi generis , tanta instrumentorū varietate , tam ferrarios , quàm lignarios , tignarios , cœmentarios , zonarios , Phrygiones , figulos ? nolo cum ijs pistores , factores , coquos , dulciarios , piscatores , venatores , aucupes , & quos ille in scena enumerat , ne forte arripias ad reprehendendum , atq; in nos id ipsum reflectas , istiusmodi artes ad delicias fuisse excogitatas , luxuriæ planè illecebras , gulæq; irritamenta , quibus sine tamen quàm facillè queat uita humana consistere , in animis vestris cogitandum relinquo , quod ne idem de cæteris artibus mihi respondeas , omis-

sis alijs, esset enim opus infinitæ dictionis. vna pro  
 omnibus tibi agri colendi industria satis esto. quæ quàm  
 sit vitæ hominum necessaria, nemo non norit. hanc au-  
 tem vnam ex tot artibus consultò excerpto, quod vul-  
 go patere, faciliq; , & exposita omnibus vel medio-  
 crius ingenijs, et neq; multæ esse intelligentiæ, neq; ne-  
 gotij videatur. Cedò igitur, putas ne solitarius homo  
 procul ab hominum conuictu, atq; conspectu, priuato  
 vsu, atq; experientia peruenisset vnquam ad tot rerum  
 notitias, atq; intelligentias, quas habere oportet eum,  
 quem agri colendi studium tenet? Ea ars profectò in-  
 finitam prope diligentiam, & solertiam requirit, vbi  
 opus est tot, & tam varijs arationibus, fossionibus,  
 stercorationibus, sationibus, occationibus, runcationi-  
 bus, sarritionibus, segetumq; purgationibus, ante  
 quàm frumentum, cæteraq; leguminum semina matura-  
 rescant. quanta item cura, laborq; requiratur in me-  
 tendis, colligendisq; suo tempore spicis, purgandis, cõ-  
 dendisq; fructibus, nemo eorum, qui interdum rustica-  
 ti fuerint, ignorat. Quid memorem tot aquarum duc-  
 tus, amniumq; deriuationes, pratorum, segetumq;  
 irrigationes? quid dicam de foenifecijs instituendis,  
 pratis item sciliendis, frondibus arborum stringendis,  
 multisq; alijs suo quibusq; tempore maturandis? neque  
 enim vnquam ferè experienti, nauso, ac diligenti agri-  
 colæ quies datur. nunc opus fossas tergere, nunc agrũ  
 vepribus sepire, nunc seligere semina, eademq; ne pau-  
 latum fructus degenerent, medicare, vomeres, & sar-  
 culos acuere, aratra, rutraq; , & rastella, ac plostra

retractare, furcas, ligones, secures, falces, stimulos, fuscinulas, ceteraq; ruris instrumenta, quorum innumerable multitudo, recudere. sentio me nimium à litore, et ab instituto itinere abstractum prouehi, non tam incredibili studio rerum rusticarum, quod me semper vehementer sine satietate delectauit, in quo metuo ne vobis nimius videar, quàm quòd mihi cōcedendum duco in ijs, quæ ad hanc industriam spectant, paulum insistere, ne in singulis quibusq; artibus cōmorari cogar. Quis nanq; satis explicet. quæ rursus attinent ad uinearum culturam, cui industriæ, ac labori, vt inquit excellens poeta, nihil vnquam exhausti est satis, in vituario ipso prius faciendo, deinde fodiendo, pastinando, repastinando, fermentandoq; solo, & vti in vineis nouis ponendis, ita etiam veteribus restituendis. quis credat eas tot fossionibus repeti, atq; iterari? quàm certa, & exquisita sint ratione iugandæ singulæ vites, reli-ganda capita, quæ ordinum coniugatio, quibus opus sit statuminibus, tabulatis, iugis, & pedamentis? Et quoniam vites suapte natura multa luxurie circumquaque in immensum serpūt multiplici, atq; erratico lapsu, ne siluescant, & nimium se effundant in omnes partes, experimur, quot, quibusue opus sit castigationibus, putationibus, pampinationibus, ablaqueationibus. quid tot sarmentorum vt amputationes, ita etiam immis-siones, & propagationes? quid dicam de arborum cæterarum tam siluestrium, quàm pomiferarum positio-nibus, & earum ordinibus in quincuncem dirigendis, deq; earundem non modo consitione, sed etiam institione,

qua nihil inuenit agricola solertius, deq; omni circum  
 eas amputandas, purgandas, collucandas industria?  
 quàm varia sit ratio, quantaq; solertia, et cura in po-  
 marijs, hortis, oliuetis, castanetis, salictis, vlmarijs,  
 arundinetis faciendis, arbutisue ceteris excolendis po-  
 nenda sit? quanta cœli, siderum, ac temporum sit ne-  
 cessaria obseruatio, tam in arationibus, et semente, faciē-  
 da, quàm in colligendis fructibus, et materie tempesti-  
 uè cœdenda? quanta deniq; industria requiratur in quæ-  
 rendis, pascendis, procurandisq; gregibus, atq; armē-  
 tis, in apibus item parandis, tenendis, administran-  
 dis, in ceterisq; omnibus villaticis pastionibus, ut uilla  
 abundet illis rebus, quas dixit Cato, hœdo, agno, por-  
 co, gallina, lacte, caseo, melle? nunquam finiam, si  
 voluero vel ipsa rerum capita percurrere in hoc vno  
 duntaxat studio. infinitum prorsus esset singulas quasq;  
 artes tãgere, quas præstâtes, ingenioq; excellentes uiri in  
 congregatione viuentes aperuere, nouaq; indies semper  
 adinuenere, vt vnus ipsius ciuilibus communionis ope  
 humanum genus non solum à glandibus, à castris, seu po-  
 tius cauernis recesserit, verum etiam iam magnificè, et  
 splendide, summaq; cum dignitate vitam degere possit.  
 Non immeritò rerum maximè necessariarū inuentores,  
 vt tradunt, ab antiquis relati fuerunt in cœlestium nu-  
 merum, testari volentibus, quantum illis hominum genus  
 se debere profiteretur. ut Libero patri vini inuentori,  
 frugum Cereri, artium vulcano, medicinæ Aescula-  
 pio, alijsq; permultis aliarum artium repertoribus,  
 quos innumerabiles nihil attinet hic recensere, cum iam

à nonnullis luculenter scripti sint libri de rerum inuentoribus, pluresq; Plato ipse colligit in libris, quos de legibus conscripsit, qui multas res ad victum, vitamq; necessarias ostenderunt. Quid uerò uetusta persequarè non ne paulò ante opinio infederat omnibus, terrà duntaxat à Phasi ad columnas Herculis esse habitabilem, planeq; antipodes fabulæ ascribebātur? At nostra etate mare nauigantium solertia vsque adeo processit, vt ignotos populos, nouasq; gentes sub alijs sideribus habitantes, vrgentesq; aduersa nobis vestigia, idest ipsos antipodes, nouum potius, & quasi alium mundum inuestigauit, atq; inuenit, quodq; Alexander Macedo huiusce rei cupientissimus nunquàm assequi potuit, Dei opt. Max. prouidentia, Caroli Quinti Romanorū perpetui imperatoris temporibus reseruatum fuit. Porro hæc dicta sint de infimis, & minus liberalibus artibus, & penè sordidis opificum, & tabernariorum opificijs, atq; instrumentis ad corporis tantum commoditates, ad beneq; viuendum pertinentibus, quæ nullæ essent, nisi fuissent ciuitates. Age verò non tantum bene, sed etiam beatè viuendi artem, diuinam sanè, atq; incredibilem conferamus, qua rudis illa ætas omnino caruit, à quæue omnium vitiorum, & peccatorum correctionem petimus. ea enim tota est in cultu animi, quæ in primis vir bonus, & fortis efficitur. Siquidem ostendit quid verè bonum, quid malum sit, proprièq; & rectè nominari potest, viuendi ars, vniuersæ vitæ ornatrici, benefactorum omnium, recteq; dictorum parens, quæ præclarè tuetur, quod dedit nobis natura,



quod deest largè supplet, & acquirit, ars artium omnium excellentissima, quam hominum conciliatio, communitasq; peperit, atq; adinuenit. eamq; fatendum est iccirco omnium bonorum, quibus humana vita sit beata, causam fuisse. A ciuili igitur coniunctione, quæ est respub. per philosophiam didicere homines appetitum meliori parti animi subijcere, obedientemq; præbere, atq; immanes, feroces, indomitosq; animos, eorumq; turbulentos motus regere, iactationesq; incitatas, & impetus inconsideratè elatos, sedare, & subgyrum rationis reuocare, nihil contra ius expetere, fugereq; omnino alieni non modò detractationem, verum etiam appetitionem, & animo stabili, ac firmo iustitiam retinere. Eiusdem reipub. beneficio cognouimus felicitatem, & beatam vitam esse, viuere secundum virtutem, prudentiam, temperantiam, & ipsam, quæ latius diffunditur, iustitiam, omnisq; alias, illustres præsertim, ac principes virtutes, ad quas homines studium adhibere vnà habitantes assuefacti sunt, sicut etiã ad eas actiones, quæ sunt virtuti consentaneæ. ab eadem tot sunt circumspectiones, tot diligentie, animaduersiones, & virtutum ipsarum exercitationes. quid aptum sit personis, temporibus, ætatibus, vt in laude viuatur, decorè, & honestè, ad dignitatem, ad amplitudinem, & claritatem. qui sit ordo; quid maxime deceat in factis, dictisue, atq; consilijs. qui modus, aut mensura, quæ moderatio omnibus rebus adhibenda, omniaq; agenda ad mediocritatem. seruandam in primis illam personam aptè, decenter, & cum di-

gnitate, quam cuiq; natura, aut fors imposuit quidam cum excellentia. in omnibus actionibus se grauitè, constantè, atq; honestè gerere, & nihil agere, nisi summa ratione, vt nullum sit cuiusq; absurdum nec dictum, nec factum, mira vniuersæ vitæ æquabilitate, atq; omnium officiorum conformatione, & ita viuere, ne quid omnino in vita ab humanitate discrepet, consensu, & conspiratione omnium virtutum. ne quis quid secum animo verset, agatûe, quod non sit magni animi, atq; excelsi, dum cogitat se ad amplitudinem, & ad magnificentiam natum. Didicimus indidem fidem seruare dictorum, conuentorumq; perpetua constantia, eamq; etiam hosti datam quibusuls vtilitatibus adducti non fallere, neq; spectare fortunam, dum præstetur fides. tum pro virtute ipsa ita nos gerere, vt nullum laborem homini intolerandum existimemus. Didicimus præterea, quæ cuiusq; ætatis degendæ ratio. quemadmodum item sit viuendum cum parentibus, cum liberis, fratribus, & propinquis, cum amicis, cum ciuibus, cum peregrinis, & externis. quid cuiq; sit præponendum, posthabendumûe. distinguere negotiorum gerendorum momenta, & officiorum gradus perpendere. æquum esse adolescentes vereri maiores natu, & semper meminisse verecundiæ, seniores autem nihil non grauitè agere, aut dicere, & bonis exemplis semper florere. Multa præterea à sapientibus viris, qui præceptis salutaribus abundant, quotidie in cœtû ciuitatis, in circulis, & congressibus accurate, copiosèq; disputantur, grauis, & vtilia, & ad beatè viuendum ma-

ximè necessaria, omnibusq; obseruanda proponuntur,  
 quibus tanquã totidem speculis admoniti homines uir-  
 tutis nitorem, diuinamq; quandam, atq; coelestem præ-  
 stantiam intuentes, ornant se modestia, continentia,  
 liberalitate, magnitudine animi, honestate, cunctisq;  
 virtutibus, tum naturalibus, tum illis, quas volunta-  
 rias vocant, quibus freti assueuerunt nihil extimesce-  
 re, dolorem, laboremq; despiciere, atq; omnes libidines  
 domitas habere voluptatum conciliatrices. Harũ vir-  
 tutum suffimentis in congregatione lustrati didicimus.  
 humanas res contemnere, antepondere semper honesta  
 iucundis, & omnia, quæ vulgus admirari solet, infra  
 nos ducere, ac non tam nostris vtilitatibus, quàm sola  
 honestate adducti rectè agere. omnes fortune motus,  
 mutationes rerum, & temporum magno, erectoq; ani-  
 mo parui pendere, leuesq; illos, imbecilles, & nihil ad  
 nos pertinentes ducere. pecuniam, si habemus, ad li-  
 beralitatem conferre, si non habemus, contemnere, di-  
 uitias, honores, potentiam, opes, formam, valetu-  
 dinẽ vires, & id genus cætera vulgò uehementer bona  
 credita, non supra modum expetere, eaq; putare haud  
 esse bona, nisi virtus accedat. ipsum summum, extre-  
 mum, atq; vltimum bonum, quò omnia nostra consilia  
 sunt referenda, non nostris commodis, sed honestate  
 maximè metiri. qua vna virtute adducti audemus ag-  
 gredi res magnas, & apprimè arduas, laborum, et pe-  
 riculorum plenas, idest opera erecti animi, pruden-  
 tia, consilioq; nitentis, rerum humanarum dispicien-  
 tia insignes. semper mortem seruituti, turpitudiniquæ  
 antepondere.

anteponere . laborare , & pugnare magis pro multorum salute , quàm pro suis quisque commodis , atq; vtilitatibus . edocti namq; fuimus à teneris excellentium virorum doctrina , non nobis solis nos natos esse , verùm ortus nostri partem patriam , partem amicos , & propinquos , omnesq; tandem bonos vendicare , & humanum genus hominum causa natum esse , habendamq; rationem cuiq; haud sui tantum , sed etiam aliorum , & eorum commodis inseruiendum , pulchrumq; ideo , ac decorum esse pro salute communi , proq; reipub . & patriæ incolumitate caput suum vouere , & interdum suæ ipsius salutis , non tantum emolumentum obliuisci , ac solo honoris , & dignitatis splendore duci . Hinc extiterè præstantes viri tam apud nostros , quàm apud exterarum nationes , qui res magnas , ac vebementer arduas pro patriæ charitate gesserunt , vt ne vitæ quidem suæ summo reipub . tempore pepercerint . Congregationi præterea , ac ciuitati debemus iura , leges , & instituta , iuris inquam ciuilibus scientiam , quod ab hominibus adinuentum , semper apud omnes nationes in pretiò fuit , ob maximarum vtilitatum fructum . eidem quoq; acceptam referimus religionum constitutionem , dispositionemq; ceremoniarum , tot libamenta sacrificiorum , tot placationes , tot expiationes , & parentandi sanctitates , multarumq; præterea rerum scientiam , quæ sunt scitutum iucunda , tum necessaria , post mortem non interire animas , neq; in morte omnia solui , sed etiã post dissolutionem nature , vitæ exactæ rationem haberi , et

sicut pro rectè factis præmia debentur, ita pro maleficijs pœnas constitutas esse. In cōgregatione hæc, multoq; plura ad mores pertinentia edocti fuerunt homines. deniq; admoniti sunt, quod factu est difficillimum, vt se ipse quisq; nosceret, cuius præcepti tanta est excellentia, vt antiqui non cuiusquam hominis ingenio, sed Delphici dei oraculo ascripserint. quarum notitiarum prisca illi mortales palantes, & in montibus dissipati erant penitus ignari, & vsq; adeò rudes, vt ne, sicut diximus, verecundiam quidem nosset, sine qua in vita nihil rectum existere queat. quæ licet egregia sint, præclara, atq; illustria ad omnem magnificentiam, ea tamen humana sunt, atq; ante oculos posita, & in actione consistunt. Verùm in ciuili congregatione vltèriùs cogitatione progressi mortales, mentemq; à consuetudine oculorum abducentes notitiam incredibiliter adepti fuere rerum æternarum, quas sola intelligentia percipimus à sensibus abiunctas, easq; à natura occultatas, abditas, atq; reclusas acie mentis, ingenijq; altitudine admirabili sapientes inuestigarunt, cunctasq; naturæ latebras, omnia abscondita, atq; obscura lustrarunt, & ipsam naturam quodam modo vicere, & quasi deprensam, atq; constrictam tenuere, quod solitarius homo procul ab hominum conuentu, atq; aspectu nunquam solo vsu, tam breuiq; experientia consequi potuisset. Inter se igitur homines in congregatione cōsuetudine mutua exercitati, proprietatem, & naturam vniuscuiusq; rei indagare ingressi fuerunt, rerumq; ini-

tia, & quædam quasi semina, vnde quæq; existant generata, concreta, atq; exorta, quæ cuiusq; generis tam animati, quam inanimi, muti, aut loquentis sit origo, quæ vita, quis interitus, quæne ex alio in aliud vicissitudo, ac commutatio, quod est infinitatem rerum, atq; naturæ obscuritatem contemplari, vnde terra, et quibus librata ponderibus, quibus alueis, aut cauernis maria sustineantur. tum cœli spectatores incredibili observatione deprenderunt totius mundi motus varios, ac dissimilaneos, & uem eiusdem conuersiones, intuentesq; sidera innumerabilia cœlo inherencia, alia quidem certis infixæ sedibus cognouerunt cum cœli ipsius motu congruere, alia, quorum vagi motus, qui rata tamen, & certa mundi spatia definiunt, suos quæq; tenere cursus, multum inter se aut altitudine, aut humilitate distantia, eorumq; norunt cursus, progressus, & vias, nec non cuncta cœli momenta numeris inuestigarunt, mundum in primis ipsum cœlo soliuago, atq; volubili, & in orbem incitato vna, atq; eadem conuersione circum ipsum se contorqueri, ac verti aduersus astrorum cursus. hinc astrologi cœli ipsius motus, ac siderum cursus specularum solis defectiones, & lunæ, fastosq; dies in multos annos prædicunt, & omnes cœli affectiones perspectas habent. Hinc quoq; mathematici, & geometræ omnes, tam qui circa cœli spatia, dimensiones, interualla, magnitudines, formas, & figuras, quam qui circa numeros versantur, hinc insatiabilis quædam est cognoscendis rebus cœlestibus voluptas. Hinc magni, &

præclari viri , qui à publicis negotijs auocantes se to-  
 tos contemplationi dediderunt , vt in sola veri inuesti-  
 gatione versarentur vsq; adeo , vt non defuerint aliqui ,  
 qui animantium quoq; ortus , victus , naturas , ac figu-  
 ras , stirpiumq; ipsarum , & omnium rerum , quas ter-  
 ra gignit , causas , & rationes explicarint . Nec con-  
 tenti huiusmodi rerum omnium cognitione , verum se  
 supra se ingenij præstantia altius extollentes , ex pul-  
 critudine mundi , & ordine rerum coelestium admira-  
 bili senserunt esse præcellentem aliquam , atq; æternam  
 naturam , vimq; occultam , & potestatem , quæ esset  
 causarum omnium princeps causa , mentem scilicet sum-  
 mam , & sempiternam , solutam , liberamq; , et ab om-  
 ni penitus concretione mortali segregatam , omnia sen-  
 tientem , omnia tuentem , nutuq; regentem , ac permo-  
 uentem , immotam ipsam , & in se eadem semper per-  
 manentem , quam deinde propter immensæ , inexplica-  
 bilisq; magnitudinis , ac maiestatis cognitionem plenam  
 non modò admirationis , sed etiam horrois , atq; for-  
 midinis Deum homines vocitarunt , cuius numini , ac po-  
 testati vbiq; parent vniuersa . Dies deniq; me deficiet ,  
 si voluero quoq; percurrere , quot , quantaq; humane  
 vitæ civilis coniugationis opera allata sint adiumenta  
 ex recta differendi ratione , atq; scientia , quantaq; per  
 disertos viros ornamenta rebus , & actionibus nostris  
 importata fuerint . ea enim per omnes artis manat , ac  
 funditur , quas explicat , atq; illustrat , earumq; genera-  
 tum definit , tum incise , membratimq; dispertit , nescitq;



sequentia, atq; concludit. vera item, & falsa dijudicat, ne cui falso, aut mentienti, quem ὁδοῦμενον vocant, assentiamur, utq; norimus soriti, quem quidam acerualem vocant, resistere, neue fallamur vnquā falsa probabilitate, res prius Græcorum literis traditas, mox à nostris auctas, atq; exornatas. Hinc ad nos manauit omnis doctrinæ liberalis cognitio, omnis historia, omnis sermo elegans. hinc ars, quæ tradit elementa loquendi, hinc rhetorica, & dialectica, hinc poetarum, oratorumq; & totius ingenij monimenta, quorum ornamentorum, aut potius decorum, ac luminum ne auram quidem olfecerat illa rudis antiquitas planè infans, & elinguis. Quis non miretur quàm nunc niteat oratio puri, dilucidiq; sermonis ornamentis, optimorumq; & grauissimorum verborum flumine, quæ nullis adhuc existentibus ciuitatibus erat rudis, aspera, squalida, atque absurda, quàm varia item disertorum hominum tum loquentium, tum scribentium copia? quàm propriè, quàm scienter de vna quaq; re dicunt? quanta vbertas, quanta facultas, quanta suauitas, quantus lepor, quantus splendor, quanta verborum magnificentia, & gloria? ut grandia ornate? ut enucleatè humilia? quanta cum diligentia, & animaduersione omnia? ut res oratione, ut verba sententijs illustrentur? quàm cuncta apta, quàm conclusa, quàm rotunda, & inter se conuenientia, seu contentione sermonis agatur, ut in disceptationibus iudiciorum, senatus, aut curiæ, seu cùm sedati, quietiq;

loquuntur homines in circulis , congreſſionibus , & etiam in conuiuijs ? Quid memorem eloquentium hominum laudationes , conſolationes , cohortationes , monita , & conſilia ad reges , ad imperatores , & ad ſummos viros ? hinc magni , & clari in rerum publicarum adminiſtratione principes , quorum nobilitata nomina nihil hic attinet enumerare . hinc iuris conſultiſſimi viri , hinc in bello præſtantiſſimi duces , atque imperatores . Quis non admiretur , cum in oratoribus , tum in cæteris ſcriptoribus quædam . quaſt verborum , ac ſententiarum fulgura , quasdam quaſt faces , ac fulmina ? quis non ordinem , ſcientiamq; rerum ſuo loco collocandarum maxima cum admiratione contempletur ? quàm ſubtili , quàm recondita , quàm multiplici ratione tractent omnia , quantaq; verborum , & ſententiarum varietate ? Hinc magni atque præclari cum apud Græcos , tum apud noſtros viri euafere , quorum fama diſfuſa eſt vbiq; , tranauit maria , montesq; altiſſimos tranſcendit , quiq; vniuerſum orbem terrarum implerunt nominis ſui gloria . Quæ ars obſecro eſt in vita , aut eſſe poteſt , quam hi non magnificè , ſplendideq; tractarint , inſtituerint , explicuerint , docuerint ? Nunquam finiam viri ampliſſimi , ſi omnia tangere voluero , quotquot ciuilis ſocietas humanæ vitæ attulit adiumenta , præſidiaq; , & ornamenta . admoneor enim vela trahere præcipiti iam in occaſum ſole , proſugata præſertim , & ad extremum perducta quæſtione . Quid porro

diui immortales , hæc vita desiderat , quo sit beator .  
quod non hominum ingenia , ex quo in societate ciuili  
viuitur , non inuestigarint , aperuerint , adinuenerint ,  
ostenderint , patefecerint ? vt perillustre sit ciuilem  
hominum communitatem dei præpotentis ipsius in hu-  
manum genus propenso numine , naturaq; suadente  
conciliatam fuisse , introductam , aut verius coor-  
tam , quo diuino , atque incredibili munere nullum vn-  
quam concessum hominibus fuit vberius , maius , aut  
præstantius , quodûe hominum genus magis attingat .

Quid tu per deum nobis non confers sancta socie-  
tas ? tu nos abduxisti à glandibus , à cauernis , à lustris ,  
à sordibus , & volutabris , ab obscuritate , à tenebris ,  
& à nocte quasi perpetua in hanc præclaram , & ple-  
nam decorum omnium lucem , ad vitam , victumq;  
non hominibus modò , sed diuis etiam ipsis dignum  
vocaſti . tu nos traduxisti à dura , rudī , atque aspera  
vita in hunc cultum humanitatis , in hos mores , in hanc  
pulchritudinem , venustatem , conuenientiam rerum &  
condecentiam , in hunc splendorem , in hæc dignitatis  
ornamenta , in tantum concursum honestissimarum ,  
artium , ac studiorum , in hunc tantarum virtutum  
splendidissimarū coetum , ac cœmitatum , in has tot ( di-  
vestram fidem ) opportunitates , habilitatesq; , in hunc  
aspectum , cogitatione nq; tot , tantarumq; rerum il-  
lustrum , in hanc publicam magnificentiam , in hoc  
deniq; claritatis , veritatēq; lumen . qua uita nihil il-  
lustrius , nihil splendidius spectari queat . Te remota,

omnis virtus, omne decus, omnis uera laus erit deferenda, omnis plane hominum actio erit denuo naturæ feritas quadam, atque immanitas. Tu nos plurimis, pulcherrimisq; artibus, & virtutibus instructos, atque ornatos euehis ad honores, ad dignitates, ad triumphos, ad victorias, ad claritatem, ad amplitudinem, ad honestatem, & ad virtutis quandam quasi diuinam, & coelestem præstantiam, atq; excellentiam. Tu nos humiles natura, atque proiectos à terra subleuas, tollisq; ad dei immortalis cognationem, & contubernium; quasiq; ex hominibus in deos conuertis. Tibi accepta habemus, planeq; referimus cuncta bene viuendi, recteq; agendi, & faciendi consilia. Tibi debent homines humanitatem, doctrinam, religionem, cerimonias, fruges, iura, leges. Quid obsecro, pulchrius, iucundius, atq; optabilius pacata, ac libera ciuitate, vt omittam tot amplas prouincias, & gentes vno, atq; eodem iure sociatas, regnaq; latissima, ac florentissima, vbi tot, tantasq;, & tam egregias res homines moliuntur, profitentur, agunt. vbi neq; honores magni defunt vnquam fortissimis viris, neque viri fortissimi defunt magnis honoribus. vbi tot exempla, ac documenta illustrium virorum haberi possunt, quos magnitudo animi, virtusq;, & gloria rerum gestarum in altum extulit. ubi versamur inter nos aptè, decorè, commodè, vbi si ad rationem viuere velimus, nihil omnino nobis desit, ac plane diuisimus. Que sine te potest esse aliunde tanta iucunditas?

ditas, tanta suauitas, quanta prouenit ex bonorum cum bonis coniunctione, consuetudine, atque commercio ad participandum alium alio, ex studiorum optimorum deniq; similitudine, de quibus omnibus tibi ab hominibus immortales agenda sunt gratiae. Qui te sustulerit; lumen simul virtutum omnium sustulerit, Solemq; ipsum quodammodo è mundo detractum extinxerit, omne bonum è vita ablatum, vitamq; ipsam funditus euerterit, sequaturq; necessariò maxima perturbatio, atque optimarum omnium rerum euersio.

Quæ cum tot, tantaq; sint Flamini, vt præclare coegimus, atq; peruicimus, quæ mihi videntur ita conclusa, ita firma, atq; robusta, vt minimè labefactari possint, vides hic nihil loci fuisse illis maledictis, quibus ciuilem societatem fixisti eius immerito tanquã extiorum omnium causam, quòd omnia laus reipub. ante, quàm tu natus esses, occuparit. Ego igitur, ne tua opinio tot, tantaq; bona euerterit, tua bona venia ijs præstantissimis viris non abnuentibus meæ sententiæ approbatoribus intrepidè cum sapientibus concludam, claraq; voce apertè, palamq; pronuntiabo, nihil planè inuita melius esse, atq; optabilius, quàm equo iure viuere cum multis in ciuitate, ex qua re humani generis charitas conseruatur. Tantum abest, vt me pigeat, quod tu modò nobis vitio vertebas, inter nos commentari, differereuè, aut etiam scribere de rerum publicarum refectione, quas vtinà nos sæpius recolentes, vt nunc cœpinus, iam collapsas, deprauatas, ac deformatas ali-

quando possumus erigere , atq; corrigere ad antiquorum sanctitatem , ne hac etate quicquam heroicis temporibus inuideremus , cum homines in coetibus , et concilijs e virtute agerent , cum pariter , & qui imperabant , et qui parebant , boni essent , et sua spote iustitia colerent .

Prouectus sum oratione , quam putaram , longius . non sum tamen secutus copiam , quam poteram . stilum potius repressi , & dictioni adhibui modum , cum a me dici multo plura potuissent . Si vos tamen dicendo detinui plusculum quam voluissetis , Flaminij eloquentia fuit in causa . ita orationis quadam copia , & facultate fretus me exercuit , dum e vita vite societatem , aut potius vitam ipsam tollere nititur , vt coactus fuerim coram vobis vniuersam reipub. de qua queritur , inter nos , capita rerum peruolans , speciem , & quasi formam adumbrare , delineare , et strictim veluti in tabella describere , quam spero vos copiosius dilatabitis , explicabitisq; , et quasi inductis coloribus illuminabitis , si quando alias huiusce rei ergo huc , aut aliò contigerit nos conuenire , quod sepe contingat faxit deus . Cum dicendi finem fecissem , ego quoq; deposita penitus oris asperitate , quadamq; quasi tristitia , & austeritate , quam in contentione , tempori seruiens , uultu contraxeram , Flaminium intuens ei primum , deinde cæteris liberaliter , comiterq; arrisi , vt omnes intelligerent ambos in disunctione sententiae esse inter nos beneuolentia coniunctissimos . Cumq; Ceruinus , & Polus , qui inter se coniunctiores sedebant , nescio quid inter se pressa vo-

ce colloquerentur de facultate, & dicendi copia, quod planè ego à dictione admodum fatigatus liquidò percipere nequii, surgamus, inquit Montius, & aduesperascente iam die in urbem redeuntes, Vidam, qui frequentiam hominum, & ciuitatis coctum laudat, in summa solitudine, quam Tridentum adueniens tantopere adamauit, relinquamus. quibus dictis optimi viri abiere. Ego autem more meo, ne officio deessem, ad portam vsq; ciuitatis, ut par erat, sedulo eos comitatus, nō vltra, dimisi, & vt postea de Priullo audiui, qui tres eos reipub. principes cum ipso Flaminio insequabatur, in itinere totus eorum sermo fuit de me, & Flaminio, dum vtriusq; in vtrinq; partem controuersam dictionem propè dimicationem conferrent, vtrius oratio fuerit ad veritatis speciem propensior. FINIS.




SERIES FOLIOR.

A. B. C. D. E. F. G. H. I. K. L. M. N.

O. P. Q. R. S. T. V. X. Y. Z.

AA. BB. CC. DD. EE.

OMNES SVNT DVERNIONES.



CREMONAE  
IN CIVITATIS PALATIO  
APVD VINCENTIVM CONTEM  
M. D. LVI.

Folio 3 . a. linea 6. tanta	tantæ
7. a. lin. 26. insulis	insulis
7. b. lin. 5. coeli	coeli
25. b. lin. 7. rhetorum	rhetorum
27. a. lin. 3. eiecerunt	eiecerunt
25. a. lin. 6. pararent	parerent
27. a. lin. 28. Demetriū, Phal.	Demetriū Phal.
39. a. lin. 3. abstniente	abstniente
40. a. lin. 21. obturasset	obturbasset
51. a. lin. 4. quampiam	quampiam
52. a. lin. 5. ex tacita	et tacita
56. b. lin. 9. accersito	accersito
60. b. lin. 9. eodemlare	eodemlare
61. b. lin. 10. tardeq;	tardèq;
61. b. lin. 20. vidit	uidit
65. b. lin. 1. opus est. itaq;	opus est itaq;
66. a. lin. 6. præcipiendi	præcipiendiq;
69. a. lin. 9. cœlestēq; ciuitatē	cœlestē ciuitatem
71. a. lin. 18. sceleratum	sceleratam
71. b. lin. 10. succenssent	succensent
80. b. lin. 27. augent quæ	, augent. Quo
89. b. lin. 5. post hac	posthac
89. b. lin. 27. copiosa	copiose
91. b. lin. 9. ad, id quod	ad id, quod
92. b. lin. 17. est	est
92. b. lin. 21. etate	etate
93. b. lin. 6. notant, eos qui	notant eos, qui
94. a. lin. 12. philosophiæ	philosophiæ
98. b. lin. 4. rationem	ratione
99. b. lin. 19. animo, uolutate	, animo uolutate

5 items - 5 Apr 12



